

## سنت لوقا رو شاستر

### تعارف

آي شاستر هان سنتون را كوم شاستر لڪڻ آڻو سنت لوقا هي. سنت لوقا آي شاستر اندازن سن 55 شون 60 عيسوي ري بچ ۾ لڪيو هتو. سنت

لوقا تموم گهڻو پڙهيو لڪيو هان ڊاڪٽر پي هتو. او يهودي قوم شون ڪونهي هتو پڻ يوناني قوم رو هتو. اوني پرچار ري كوم ۾ تموم گهڻا گهمرا

سنت پولوس پيٽا سفر پي ڪيئا. سنت لوقا پريو يسوع ري زندگي ري باري ۾ جانچ ڪري اوئون باتون ني ترتيب شون لڪيو.

ايئي شاستر ري خاص بات آي هي ڪه پريو يسوع غريبن هان محتاجون رو تموم گهڻو فڪر ڪري هي. سنت لوقا ايئي شاستر ۾ پريو يسوع

ني پويتر هان بي عيب انسون ڪري بتايو، جڪو پوري دنيا ري منڪون ني مگني ڏيون ري شارو آپ پليدون هويو.

### خاص مضمون

پويتر سنون ڏيون آڻي يوحنا هان پريو يسوع رو جنم . . . . . 52:2-1:1

پويتر سنون ڏيون آڻي يوحنا رو پرچار هان پريو يسوع رو پويتر سنون ليون . . . . . 38-1:3

پريو يسوع رو آزموتو هان پرچار ڪرڻ . . . . . 50:9-1:4

پريو يسوع رو يروشلم شهر ڏيما جاوڻ . . . . . 27:19-51:9

پريو يسوع ني جهالڻ هان اوني ري موت . . . . . 56:23-27:19

پريو يسوع رو جي اٺڻ، درشن ڏيون هان آڪاش تي جاوڻ . . . . . 53-1:24

## شروع آئي باتون

1 پيارا ٿيوفيلس، جڪو باتون مهون ۾ هوئي هي، اوئون باتون ني تموم گهٽي منڪون محنت ڪري لکئي. 2 مهوني آي باتون اونون منڪون شٽائي، جڪون آپ پيل آپري اونڪيون شون ڏيئي هان پريو يسوع را پرچار ڪرڻ آلا هيا. 3 مهني پي شئي نموني اينون باتون ري پوچا گاچا ڪي هي هان پلو شمجهو ڪه آي باتون ٿونري شارو صحيح نموني لڪون. 4 هون ايئي ري ڪري لڪون پريو ڪه ٿي وشواس راکو ڪه جڪو باتون ٿون شيڪئي هي، او سجي ساجي هي.

## سنت يوحنا ري جنم ري اگڪتي

5 يهوديا علائقي ري بادشاه هيروديس ري ڏنن ۾ ايشور رو هيڪ پوجاري هتو، جڪو ايا ري ٿولي رو هتو. اوئي رو نون زڪريا هتو هان اوئي ري لگائي رو نون اليشع هتو. اليشع پي ايشور ري پوجاري هارون ري پيڙهي شون هتي. 6 زڪريا هان اوئي ري لگائي بيئي ايشور ري نظر ۾ نيڪ هتا هان او پرميشور رو هر هيڪ حڪم پلي نموني منتا. 7 اليشع بونجڪي هتي، ايئي ري ڪري اونون را اولاد ڪونهي هتا هان او بيئي بوي هتا. 8 هيڪ ڏن ايشور ري پوجاري زڪريا ري ٿولي ري باري آئي ڪه او سچائي ايشور ري گهر ۾ شيوا ڪري. 9 جون ايشور ري پوجاريون ري ريت هتي اونون پکا گهاتيا ڪه ڪن پرميشور ري گهر ۾ جائي ڏوب ڪرشي. تو اوئي ڏن او پڪو زڪريا ري نون رو نڪريو. 10 جڏي ايشور رو پوجاري زڪريا، ڏوب ڪرتو پريو، تو سچائي منڪ باهر پراٿنا ڪرتا پريا. 11 اوئي تيم پرميشور رو هيڪ فريشتو ڏيڪيجڻ ۾ آيو، جڪو ڏوب ڪرڻ ري جگها ري ساجي پاسي آيو هتو. 12 فريشتي ني ڏيڪي زڪريا تموم گهٽو گهرايو هان بيناجڻ لاگو. 13 پڻ فريشتي اوئي ني ڪهيو ڪه، ”زڪريا، تو ني بيناج، ڪيونڪ ايشور ٿاري پراٿنا شئي هي هان ٿاري لگائي اليشع ني ڏيڪرو هوشي، جڪي رو نون تو يوحنا راکي. 14 اوئي ري جنم تي تو آپ تموم گهٽو خوش هوئي هان تموم گهٽا منڪ خوشي ڪرشي. 15 ڪيونڪ او پرميشور ري نظر ۾ تموم گهٽو عزت آيو هوشي. او رگو شراب شون نام پڻ انگورون ري رس شون پي الگو ريشي هان او ما ري بيت شون پويتر آتما شون پريو هوشي. 16 او اسرائيلي قوم ري تموم گهٽي منڪون ني پرميشور اونون ري ايشور ڏيما پاچا لي آشي. 17 او ايلياھ آي ڪار پوري من هان طاقت شون پرچار ڪرشي هان پريو ري اوڻ ري شارو منڪ تيار ڪرشي. او ماتا پتا ري من ۾ اولاد ري شارو پريو پريم پرشي هان نافرمونون ني نيڪ منڪون ري شئي مارگ تي لي آشي. ايئي نموني او پريو ري شارو منڪ تيار ڪرشي.“

18 پچي زڪريا فريشتي ني ڪهيو ڪه، ”هون ٿاري ايئي بات رو ڪيڪ پروسو ڪرون ڪه اينون ضرور هوشي؟ ڪيونڪ هون تو بويو هون هان مهاري لگائي پي بوي هي.“ 19 ايئي بات تي فريشتي اوئي ني ڪهيو ڪه، ”هون جبرائيل هون جڪو ايشور ري دربار ۾ آيو رون هون. ايشور آپ مهني ميلي هي ڪه هون ٿي آي خوشي ري خبر شٽائون. 20 پڻ ٿي مهاري نيائي تي پروسو ڪونهي ڪيئو جڪو آپري تيم تي پورو هوشي. ايئي ري ڪري آي باتون پوري هوڻ توڻي تو گونگو رئي هان بولي ڪونهي شگهي.“

<sup>21</sup> ايشور ري گهر ري باهر منڪ زڪريا ري انتظار ۾ هئا هانَ حيرون هئا ڪه زڪريا ايشور ري گهر ۾ اترِي دير ڪيئون لڳائي هي. <sup>22</sup> پڻ جڏي زڪريا باهر آيو، تو او اُونئون شون بولي ڪونهي شگهيو، ڪيونڪه او گونگو هوئي گيو هتوم پڻ هائون را اِشارا ڪرتو رهيو. جڪي شون منڪون ني خبر پڙي ڪه اُوئي ايشور ري طرفون درشن ڏينو هي.

<sup>23</sup> جڏي زڪريا ري شيوا ڪرڻ ري باري پوري هوئي، تو او پاچو آپري گهري گيو. <sup>24</sup> ڪئينڪه ڏنن شون پيچي زڪريا ري لڳائي اليشبع اُميد شون هوئي هانَ او پونج مهيتون توڻي گهر شون باهر ڪونهي نڪري. <sup>25</sup> اُوئي ڪهيو ڪه، ”ايئون ڏنن ۾ پرميشور مهِي تي تموم گهڻي دايا ڪي هي. اُوئي منڪون ري مهيتون شون مهاري چند چوڙائي هي.“

### پريو يسوع ري جنم ري اگڪتي

<sup>26</sup> اليشبع ني اُميد هوڻ شون پيچي چوين مهيتي ۾ ايشور، جبرائيل فريشتي ني گليل صوبي ري ناصرت شهر ڏيشا ميليو <sup>27</sup> هانَ او هيڪي ڪناري چوڪري ڪيڏي آيو. او چوڪري يوسف نون ري منڪ شون مگاڙي هتي. يوسف، داؤد بادشاه ري پڙهي شون هتو. اُوئي چوڪري رو نون مريم هتو. <sup>28</sup> جبرائيل فريشتي مريم ڪيڏي آئي ڪهيو ڪه، ”نمسڪار، تُو ڏن هي ڪيونڪه پرميشور ٿي پيڙو هي.“

<sup>29</sup> مريم فريشتي ري ايئي نياپي تي تموم گهڻي پريشون هوئي هانَ شوچڻ لاڳي ڪه، ”ايئي بدائي رو مطلب ڪي هي؟“ <sup>30</sup> فريشتي اُوئي ني ڪهيو ڪه، ”مريم، تُو ني بيتاج ڪيونڪه ايشور ٿي تي ڪريا ڪي هي.“ <sup>31</sup> تُو اُميد شون هوئي هانَ ٿاري ڏيڪرو هوشي. تُو اُوئي رو نون يسوع راڪي. <sup>32</sup> او تموم گهڻو عزت آڻو هوشي هانَ او پرميشور رو ڏيڪرو ڪهيجشي هانَ پرميشور اُوئي ري ڏاڏي داؤد ري بادشاهي اُوئي ني ڏيشي. <sup>33</sup> او يعقوب ري پڙهي تي هميشا بادشاهي ڪرشي هانَ اُوئي ري بادشاهي ڪڏي پي ختم ڪونهي هووي.“

<sup>34</sup> مريم فريشتي ني ڪهيو ڪه، ”هُون تو ڪناري هون، تو پيچي ايئون ڪيڪر هوشي؟“ <sup>35</sup> فريشتي بلتي ڏيني ڪه، ”پويتر آتما ٿي مائي اترشي هانَ پرميشور ري قدرت ٿي پيڙي هوشي. ايئي ري ڪري او ٻائيو پويتر هوشي هانَ ايشور رو ڏيڪرو ڪهيجشي. <sup>36</sup> جو ٿاري گنڀي اليشبع رو ٻوڊايي ۾ ڏيڪرو هوڻ آڻو هي هانَ او جڪو بونجڪي شئيچتي، اُوئي ني چهُون مهيتو اُميدگاري هي. <sup>37</sup> ڪيونڪه ڪو پي اهڙي بات ڪونهي جڪو ايشور ري قدرت شون باهر هووي.“

<sup>38</sup> پيچي مريم ڪهيو ڪه، ”هُون پرميشور ري ٻونهي هون هانَ ايئوچ هووي جون ٿي ڪهيو هي.“ پيچي فريشتو اوڻ شون ٻوڻو گيو.

### مريم رو اليشبع ري گهري جاوڻ

<sup>39</sup> ڪئينڪه ڏنن شون پيچي مريم سنڀري هانَ چيڪي چيڪي يهودا مُلڪ ۾ جبل ري علائقي، اُوئي شهر گئي، <sup>40</sup> جيت ايشور رو پوجاري زڪريا ريتو. مريم اُوئي ري گهري گئي هانَ اُوئي ري لڳائي اليشبع ني نمسڪار ڪيو. <sup>41</sup> جڏي اليشبع مريم رو نمسڪار شيو، تو ايئون هيو ڪه اُوئي رو ٻائيو بيت ۾ چُٽڪڻ لاڳو. اليشبع پويتر آتما شون پريچي گئي <sup>42</sup> هانَ زور شون ڪيوڻ لاڳي ڪه، ”تُو لڳايون ۾ برڪت آئي هي هانَ ٿارو ٻائيو

پي برکت آلو هِي۔ 43 مَهِي تِي اترِي ڪَريَا ڪِي ڪه مَهاري پَريو رِي ما مَهاري گهري آئي هِي؟ 44 جَدِي مَهِي تارو نمسڪار سُٿيو، تو بائيو مَهاري بيت ۾ خوشي شون چُٽڪڻ لاگو۔ 45 تُو ڏن هِي تِي وشواس راکيو ڪه جڪو نياپو پرميشور تِي ڪيدي ميليو هِي، او پُورو هوشِي۔“

### مریم رو ايشور رِي ٻڌائي ڪرڻ

46 پچي مریم ڪهيو ڪه،

”مهاريو من پرميشور رِي ٻڌائي ڪري هِي

47 هان مهاري آتما مهاري مُگتي داتا شون خوش هِي۔

48 هون تو رگو اُوئي رِي ڪسيس بونهي هون،

پڻ تو پي اُوئي مهاريو خيال ڪيو هِي۔

آج شون لي هر زموني را منڪ،

مهني برکت آئي ڪشي۔

49 ڪيونڪه اُوئي قُدرت آئي ايشور،

مهاري شارو موتا موتا ڪوم ڪيئا هِي

هان اُوئي رو نون پويتر هِي۔

50 اُوئي رِي دايا بيڙهي شون لي بيڙهي توڙي اُونون تي هِي

جڪو اُوئي رِي عزت ڪري هِي۔

51 اُوئي آپري طاقت بتائي هِي

هان جڪو آپرو آپني موتا سمجهتا

اُونون ني اُوئي ڌار ڌار ڪيئا هِي۔

52 ايشور بادشاهون ني اُونون ري تخت شون نوڪيا هِي

هان اُوئي غريبون رو مون ٻڌايو هِي۔

53 اُوئي بُوڪون ني سُني شيون شون ڍنو ڪرايو هِي،

پڻ اميرون ني ڪالي هات پاچا ميليا هِي۔

54 ايشور آپري دايا رو وچن پورو ڪيو

هانَ آڀري شيوَا ڪرڻ آئي اسرائيلي قوم ري مدد ڪي هِي.

<sup>55</sup> ايشورَ آي وچن مهوري باپ ڏاڏون شون ڪيو هتو

ڪه او ابراهيم هانَ اُوئي ري پيڙهي تي هميشا دايا ڪرتو ريشي.“

<sup>56</sup> مريم البشبع پيڙي تين مهينا رئي هانَ پڇي آڀري گهري پاڇي آئي.

### سنت يوحنا رو جنم

<sup>57</sup> البشبع ري ٻال هوئن رو تيم آيو هانَ اُوئي ني هيڪ ڏيڪرو جايو. <sup>58</sup> ايئي تي گون آئون هانَ عزيزون جڏي آي خبر سُڻي ڪه پرميشورَ اُوئي تي دايا

ڪي هِي، تو او پي اُونون پيڙا هوئي خوشي ڪرڻ لاگا. <sup>59</sup> آتون ڏن منڪ چوڪري ري ڪنني ري ريت تي آيا هانَ او اُوئي چوڪري رو نون اُوئي ري

باپ زڪريا ري نون تي راڪڻ آلا هتام <sup>60</sup> پڻ ٻالهي ري ما ڪهيو ڪه، ”نام ايئي رو نون يوحنا راڪشون.“ <sup>61</sup> اُونون ڪهيو ڪه، ”تاري خاندان ۾ اهڙو

نون پيڇي رو تو ڪونهي.“

<sup>62</sup> پڇي اُونون ٻال ري باپ ني اِشاري شون پوڇو ڪه، ”تو چوڪري رو نون ڪي راڪي؟“ <sup>63</sup> زڪريا تڪتي آتائي هانَ اُوئي تي لڪيو ڪه، ”ايئي رو

نون يوحنا راڪو هِي.“ آي جوئي شجائي حيرون هويا. <sup>64</sup> ايت يڪدم زڪريا ري زبون ڪلي هانَ او ٻولڻ لاگو هانَ ايشورَ ري ٻڌائي ڪرڻ لاگو.

<sup>65</sup> شجائي منڪ جڪو اُونون ري آسي پاشي ريتام او شجائي تموم گهڻا حيرون هويا هانَ يهوديا ري اُوئي شجي جابلو علائقي ۾ آي بات مشهور

هوئي. <sup>66</sup> جڪون سُڻيو او شوچ ۾ پڙيا هانَ ڪيوڻ لاگا ڪه، ”آي ٻاليو ڪهڙو هوشي؟“ ڪيونڪه پرميشورَ رو هات اُوئي تي هتو.

### زڪريا ري ايشورَ ري ٻڌائي هانَ نياپو ڏيوڻ

<sup>67</sup> سنت يوحنا رو باپ زڪريا، پويتر آتما شون پريجي ايشورَ رو آي نياپو سُٿاوڻ لاگو ڪه،

<sup>68</sup> ”پرميشورَ ري بڪوڻ هوئي جڪو اسرائيلي قوم رو ايشورَ هِي،

ڪيونڪه اُوئي آڀري منڪون رو خيال ڪيو هِي

هانَ اُونون ني چوڙايا هِي.

<sup>69</sup> اُوئي آڀري بونهي داؤد ري پيڙهي شون

مهوني هيڪ طاقت آلو مگتي داتا ڏينو هِي.

<sup>70</sup> ايشورَ تموم گهڻا سال پيل

آڀري پويتر نبيون شون نياپو ڏرايو هتو ڪه،

<sup>71</sup> هون توني تونري دشمنون شون بچائين

هانَ جڪو تون شون نفرت ڪري هي،

اوتون ري هاتون شون هون توني چوڙائين-‘

72 ايشور رو مقصد اي هتو ڪم،

او آڻي باپ ڏاڏون تي دايا ڪري

هانَ آڻو پويتر وچن ياد راڳي-.

73 ايشور آڻي ڏاڏي ابراهيم شون شونش لي اي ڪهيو هتو ڪم،

74 هون توني تونري دشمنون شون چوڙائين،

ڪه همي ٿي بنا پي مهاري ڀڳتي ڪرتا رهيا،

75 هانَ آڻي پوري زندگي نڪ نيت هانَ ساڇي من شون

مهاري ڀڳتي ڪرتا رهيا-‘

76 اي ڏيڪرام تُو پرميشور رو نبي ڪهيجي،

ڪيونڪه تُو پريو ري آڻ شون پيل مارگ تيار ڪري-.

77 تُو اوتني ري منڪون ني شٽائي ڪم،

مگتي تو پاپون ري معافي مونگڻ شون ملي هي-.

78 آڻو ايشور دابالو هانَ ڪريا ڪرڻ آڻو هي-.

او ڏن ري اڃائي آڻي ڪار آڻون تي آڪاش شون مگتي رو اڃائو چمڪاشي-.

79 اي اڃائو اوتون شجون تي چمڪشي،

جڪو اندازي ۾ موت ري مونھ ۾ ري هي

هانَ ايشور شڪ آڻي مارگ ۾ آڻي اڳوڻي ڪرتو ري-“

80 او ٻاليوم، يوحنا، بدتو گيو هانَ اوتني ري شمجھ پي بدتي گئي- او اترې توڻي رڻ پت ۾ رهيو جتري توڻي اسرائيلي قوم ني ايشور رو نياپو ڏيوڻ رو

## پريو يسوع رو جنم

(متي 1: 18-25)

**2** <sup>1</sup> اُونون ڏنن ۾ ايتون هيوو ڪه زوم ملڪ ري مهاراجا قيصر اوگوسٽس آي حڪم ڏينو ڪه زومي راجائي ري سڄي ملڪون را منڪ آيرا آيرا نون لڪاوي. <sup>2</sup> آي پيلڪي آدم شماري هتي جڪو سوريا صوبي ري گورنر ڪورنيس ري ڏنن ۾ هوئي. <sup>3</sup> ايني ري ڪري هر هڪ آيرو نون لڪاڻ ري شارو آيري آيري باب ڏاڏي ري شهر گيو.

<sup>4</sup> يوسف، جڪو پروٽي زموني ري بادشاه ڏاڻوڊ ري پيڙهي شون هتو، او آيرو نون لڪاڻ ري شارو آيري گليل صوبي ري ناصرت شهر ني چوڙي يهوديا صوبي ري بيت لحم شهر ڏيما گيو، جيٺ بادشاه ڏاڻوڊ رو جنم هيوو هتو. <sup>5</sup> اوني پيڙي اوني ري مونگيتل مريم پي هتي، اوني تيم او اميد شون هتي. <sup>6</sup> جڏي او بيت لحم شهر ۾ هتام تو مريم ري ٻال هوڻ رو تيم هيوو. <sup>7</sup> مريم ني مويي ڏيڪرو جايو، اوني ٻالني ني ٻڌئي ۾ پيڙهي هان آهوري ۾ شوايوم ڪيونڪه مسافرخوني ۾ اُونون ري شارو ڪو پي جگها ڪونهي هتي.

## فريشتون رو ڌراڙون ني خوشي ري خبر سٿاڻ

<sup>8</sup> اوني علائقي ري هيڪي ميدون ۾ ڪئينڪه ڌراڙ رات رو آيري ريون ري رڪاڻي ڪرتا پڙيا. <sup>9</sup> اُونون ڪيڊي پرميشور رو هيڪ فريشتو آئي آيو. پرميشور رو اُجالو اُونون ري چوڌاري چمڪڻ لاگو هان او تموم گهڻا پيڄاڻ لاگا. <sup>10</sup> فريشتي ڪهيو ڪه، ”تي ني پيڄاڻو، ڪيونڪه هون توني خوشي ري خبر سٿاڻون هون، جڪي شون سڄائي منڪ تموم گهڻا خوش هوشي. <sup>11</sup> آج ڏاڻوڊ بادشاه ري شهر، بيت لحم ۾ تونري شارو هيڪ مگني داتا جايو هي، جڪو مسيح هان پريو هي. <sup>12</sup> ايني بات رو تونري شارو آي نشون هي ڪه تي هيڪي ٻال ني ٻڌئي ۾ باڏوڙو هان آهوري ۾ شوتوڙو ڏيڪشو.“

<sup>13</sup> ايني شون پيڄي اوچتو ڌراڙون ني اوني فريشتي پيڙا تموم گهڻا آڪاشي فريشتا ڏيڪيڄڻ ۾ آيا، جڪو ايشور ري ٻڌائي ڪرتا هان ايتون ڪيتا ڪه، <sup>14</sup> ”آڪاش ۾ ايشور ري ٻڌائي هووي هان ڌرتي تي اُونون منڪون ني شڪ ملي جڪي شون او خوش هي.“

<sup>15</sup> جڏي فريشتا اوٺ شون پاڇا آڪاش ڏيما گيا، تو ڌراڙ آيت ۾ ڪيوڻ لاگا ڪه، ”هالو تو بيت لحم شهر ڏيما هالون هان آي بات جڪي ري پرميشور آيون ني خبر ڏيني هي، اوني ني جوئون.“ <sup>16</sup> ايني ري ڪري ڌراڙ چيڪا گيا هان اُونون مريم هان يوسف ني ڏينا هان ٻال ني پي آهوري ۾ شوتوڙو ڏينو. <sup>17</sup> اُونون ني جوڻ شون پيڄي ڌراڙون ايني بات ني مشهور ڪي جڪو فريشتي اُونون ني ٻالني ري باري ۾ سٿائي هتي.

<sup>18</sup> جڏي منڪون ڌراڙون ري باتون سٿي، تو او تموم گهڻا حيرون هويا. <sup>19</sup> پڻ مريم ايتون باتون ني آيري من ۾ راڪي هان اُونون تي شوچ بيچار ڪرڻ لاڳي. <sup>20</sup> جون فريشتي ڌراڙون ني سٿايو هتو، ايتوڻ ڏينو هان سٿيو هان او ايشور ري ٻڌائي ڪرتا پاڇا ٻوڻا گيا.

ٻال رو نون يسوع راڪڻ

21 آئون ڏن ائون ٻائڻي رو کتنو ڪرايو هان اوني رو نون يسوع راڪيو. (يسوع رو مطلب هي ”پرميشور بجاوي هي.“) اي اوج نون هي جڪو فرشتي مريم ني اميد هوڻ شون پيل شٽايو هتو.

پريو يسوع ني ايشور ري گهر ۾ لي جاوڻ

22 جڏي موسي ري شريعت تي مريم را شوئي را ڏن پورا هويام، تو پڇي يوسف هان مريم آپري ڏيڪري ني آپ پيڙو يروشلم شهر ۾ لي گيا ڪه اوني ني ايشور ري گهر ۾ پرميشور ري نون رو ڪري، 23 ڪيونڪه پرميشور ري شريعت ۾ لڪيوڙو هي ڪه،

”هر هيڪ مويي ڏيڪرو پرميشور ري شارو پويتر هوشي.“

24 ايني ري ڪري او پي آيا ڪه او گيرون رو هيڪ جوڙو جون ڪوترون ري بيئون بچيون رو چڙهائو چاهي جون پرميشور ري شريعت ۾ لڪيوڙو هتو.

25 يروشلم شهر ۾ شمعون نون رو هيڪ منڪ هتو، جڪو نيك هان ڌرمي هتو هان ايشور رو پويتر آتما اوني پيڙو هتو. او انتظار ۾ هتو ڪه مسيح

آشي هان اسرائيلي قوم ني ڏڪون شون بچاشي. 26 پويتر آتما شمعون ني ڪهيو هتو ڪه، ”تو اتري توڻي ڪونهي مري، جتري توڻي تو پرميشور ري

مسيح ني ني ڏيڪي.“ 27 شمعون پويتر آتما ري ڪيوڻ تي ايشور ري گهر ۾ آيو. جڏي مريم هان يوسف، شريعت پوري ڪرڻ ري شارو آپري ڏيڪري

يسوع ني ايشور ري گهر ۾ لي آيا، 28 تو شمعون ٻائڻي ني آپري ڪوڙي ۾ ليئو هان ايشور رو شڪر ڪيو هان ڪهيو ڪه،

29 ”اي مهارا مالڪ، همي هون جڪو ٿارو شيواداري هون،

آپري ڪيوڻ تي دايا ڪري آپ ڪيڍي آڻا رو.

30 ڪيونڪه مهي آپري اونڪيون شون

ٿاري اي مگتي ڏيني ري،

31 جڪي ني ٿي شجون قومون ري شارو تيار ڪيو هي.

32 ڪه او بيجي قومون ري شارو

شچائي ني ظاهر ڪرڻ آڻو اڃائو هووي

هان ٿاري چونڊيوڙي اسرائيلي قوم ري شارو ٻڌائو هووي.“

33 يسوع را ماتا پتا آپري ٻائڻي ري باري ۾ شمعون ري ايئون باتون تي حيرون هتا. 34 پڇي شمعون ائون ني برڪت ڏيني هان ٻائڻي ري ما مريم ني

ڪهيو ڪه، ”اي ٻالو اسرائيلي قوم ري تموم گهڻي منڪون ري شارو هيڪ خاص نشون هوشي هان تموم گهڻا منڪ ايي ري خلاف هوشي. ايي

ري ڪري جڪو منڪ اڀي ري خلاف هوشي، او متي جاشي، پڻ جڪو منڪ اڀي شون خوش هوشي، او آباد هوشي. 35 اڀي نموني ني رگو منڪون ري من ري باتون پڌري هوشي، پڻ ٿئي اترو تو ڏڪ هوشي ڪه جهڙي تاري دل ڪاڍي چوڙي هوڙي.“

36 اوت حنا نون ري هيڪ لڳائي هتي جڪو نبيوڻي هتي. او فنوايل ري ڏيڪري هان آشر قبيلي شون هتي. او تموم گهڻي بوڊي هتي. اوني رو ڌڻي اوني ري بيان ري شاتون شالون شون پڇي مري گيو هتو. 37 همي حنا چوراشي شال ري رونڊبير هتي. او ڏن رات راکي پرائنا هان پگتي ڪري هان ڪڏي پي ايشور ري گهر شون باهر ڪونهي نڪري. 38 اوني تيم حنا پي اوت اڻي هان ايشور ري ٻڌائي ڪرڻ لاڳي هان اوني باڻي ري باري ۾ ائون شجون منڪون ني شٽاوڻ لاڳي جڪو يروشلم شهر هان آڀري قوم ري آزادي ري انتظار ۾ هتا.

### ناصرت شهر ڏيشا پاڇا اون

39 يسوع را ماتا پتا ۾ پرميشور ري شريعت پوري ڪري گليل صوبي ۾ آڀري شهر ناصرت ۾ پاڇا آيا. 40 يسوع ڏنو ڏن بدتو هان موتو هوتو گيو هان او سمجه شون پريور هوتو گيو، ڪيونڪ ايشور ري ڪريا اوني تي هتي.

### بارهي شالون رو پريو يسوع ايشور ري گهر ۾

41 يسوع را ماتا پتا هر شال يروشلم شهر ۾ فسح رو ڀڙ ڪرڻ جاوتا. 42 جڏي يسوع بارهون شالون رو هويوم، تو او آڀري ڌرمي ريت تي آڀري ماتا پتا پيڙو ڀڙ ڪرڻ ري شارو يروشلم گيو. 43 جڏي فسح ڀڙ را ڏن پورا هويام، تو او گهر ڏيشا پاڇا اون لاڳام، پڻ يسوع يروشلم شهر ۾ رني گيو هان اوني ري ماتا پتا ني خبر ڪونهي پڙي. 44 او آي شوچي شجو ڏن پينڌو ڪرتا رهيا ڪم، ”يسوع مهون پيڙو جڻي ۾ هي.“ جڏي ائون ڏينو ڪه يسوع تو مهون پيڙو هائي ڪونهي، تو پڇي او يسوع ني عزيزون هان سجي منڪون ۾ جوڻ لاڳا. 45 جڏي ائون ني يسوع ڪونهي لادوم، تو او اوني ني جوڻ ري شارو پاڇا يروشلم شهر گيا.

46 تيجي ڏن، يسوع ائون ني ايشور ري گهر ۾ مليو. او يهوديون ري ڌرمي گروئون پيڙو پينوڙو هتو هان ائون ري باتون سڻي ائون شون سوال جواب پڙيچتو پڙيو. 47 جڏي منڪون اوني ري باتون سڻي، تو او اوني ري سمجه هان بلتيون تي حيرون هويام. 48 يسوع ني اوت جوئي اوني را ماتا پتا حيرون هويام هان اوني ري ما ڪهيو ڪم، ”ڏيڪرام ٿي مهون شون ائون ڪيئون ڪيئون؟ هون هان تارو بابو پريشون هوني ٿئي جوتا پڙيا.“ 49 پڻ يسوع ائون ني ڪهيو ڪم، ”ٿي مهني ڪيئون جوتا پڙيا؟ ڪي ٿوني خبر ڪونهي هتي ڪه مهني آڀري پتا ري گهر ۾ هوڻ ڪي؟“ 50 پڻ يسوع ري آي بات ائون ري سمجه ۾ ڪونهي آي.

51 پڇي يسوع ائون پيڙو ناصرت شهر ڏيشا پاڇو گيو هان اوت ائون ري ڪيوڻ ۾ رهيو. اوني ري ما مريم سجي باتون آڀري من ۾ راکي. 52 يسوع موتو هوتو گيو هان اوني ري سمجه پي بدتي گئي. ڏنو ڏن ايشور هان منڪ اوني شون خوش هوتا گيا.

پويتر سنون ڏيوڻ آڻي يوحنا رو پرچار

(متي 12-1:3؛ مرقس 8-1:1؛ يوحنا 19:1-28)

3<sup>1</sup> جڏي روم ملڪ ري مهاراجا قيصر تبرس ري حڪومت رو پندرهنون سال هتوم تو اوئون ڏنون ۾ يهوديا صوبي رو گورنر بينطس پلاطس هتو هان گليل صوبي رو گورنر هيروديس انتپاس هتو هان اوئي رو پائي فلپس، اتوريا صوبي هان ترخونتس صوبي رو گورنر هتو هان ابليني صوبي رو گورنر لسانياس هتو.<sup>2</sup> حنا هان ڪائفا ايشور ري پوجاريون را سردار هتا. اوئون ڏنون ۾ جڏي ايشور ري پوجاري زڪريا رو ڏيڪرو سنت يوحنا رڻ پت ۾ ريتوم تو ايشور اوئي ني آيو نياپو ڏينو.<sup>3</sup> ايني ري ڪري سنت يوحنا ڀردن دريا ري علائقي ۾ جيڪو ڪيٽ گيو هان منڪون ۾ پرچار ڪرڻ لاگو ڪم، ”تي آڀري پاپون شون توبهون ڪرو هان پويتر سنون ليئوم تو ايشور تونرا پاپ معاف ڪرشي.“<sup>4</sup> آي ايئوج هتو جون يسعياھ نبي ري شاستر ۾ لکيوڙو هي ڪم.

”رڻ پت ۾ پرچار ڪرڻ آڻي رو هيلو شيجي پڙيو

ڪه پرميشور ري شارو مارگ تيار ڪرو

هان اوئي ري شارو مارگ سڌا ڪرو.

<sup>5</sup> هر هيڪ ڪڏ پريجي جاشي

هان هر هيڪ جبل هان دڙا هينا ڪيئا جاشي.

اونتا مارگ سڌا ڪيئا جاشي

هان اونچي نيچي جگهائون هيڪ شروڪي ڪيئي جاشي.

<sup>6</sup> هان شجائي منڪ اوئي مگتي ني ڏيڪشي،

جڪي ني ايشور ميلشي.“

<sup>7</sup> منڪون را تموم گهڻا تولا سنت يوحنا ڪڍي پويتر سنون ليون آوتا هان سنت يوحنا اوئون ني ڪيتو ڪم، ”تي ناگ آڻي ڪار زهريلا هو. توني ڪي

شٽايو ڪه تي اوئي سزا شون بچي جاشو جڪو ايشور ميلن آڻو هي؟<sup>8</sup> تي اهڙا ڪوم ڪرو جڪي شون خبر پڙي ڪه تون شاجي توبهون ڪي هي.

ايئون ني سمجهو ڪه تي ابراهيم را اولاد هوم تو بچي جاشو. هون توني ڪونه هون ڪه ايشور ايئون پٿرون شون پي ابراهيم ري شارو اولاد پيدا

ڪري شگهي هي.<sup>9</sup> ياد راکوم ايشور اهڙي سزا ڏيوڻ ري شارو تيار هي، جون منڪ بٽون ري پال تي ڪهاڙو راکي هي هان جڪو بٽ شونو ڦل

ڪونهي ڏيتوم، تو اوئي ني باڊي باشڏي ۾ نوڪي هي.“

10 اِيئي تي منكون سنت يوحنا شون پوچو ڪم، ”تو پڇي مهوني ڪي ڪرڻ ڪپي؟“ 11 تو سنت يوحنا بلتي ڏيني ڪم، ”جي ڪي ڪڍي بي

ڪميش هووي، تو او هيڪ اوني ني ڏي جيڪي ڪڍي ڪونهي هان جيڪي ڪڍي ٻاتي هي، او پي ائوج ڪري.“

12 ڪئنيڪ ناکو ليون آلا پي پويتر سنون ليون آيا. ائون سنت يوحنا شون پوچو ڪم، ”گرو جي، مهوني ڪي ڪرڻ ڪپي؟“ 13 سنت يوحنا ائون

ني ڪهيو ڪم، ”جترو ناکو ليون رو توني حڪم هي اوني شون وڌيڪ ني ليئو.“

14 فوجيون اوني شون پوچو ڪم، ”مهوني ڪي ڪرڻ ڪپي؟“ سنت يوحنا بلتي ڏيني ڪم، ”ڪي تي پي ظلم ڪري هان ڪوڙو الزوم هئي ناحق

رُپيا ني ليئو هان آيري پگهار ۾ خوش رو.“

15 منڪ مسيح ري انتظار ۾ هئا ڪه او ائون ني بچائي. ايني ري ڪري او آيري من ۾ شوچڻ لاگا ڪم، ”ڪي سنت يوحنا، مسيح تو ڪونهي؟“

16 پڻ سنت يوحنا ائون شجون ني ڪهيو ڪم، ”هون تو رگو پوڻي شون پويتر سنون ڏيون هون، پڻ هيڪ اهڙو منڪ اون آو هي جيڪو مهني شون

وڌيڪ قدرت آو هي هان هون تو ايني جهڙو پي ڪونهي ڪه اوني ري جتي را ڪشا ڪولون. او توني پويتر آتما ري باشدي شون پويتر سنون ڏيئي.

17 شرگ هان نرگ ۾ ميلڻ رو اختيار پي اوني ڪڍي هي. او آرو چاچڙو آيري هات ۾ ليشي هان ڏوئون ني آچا ڪرشي. او ڪٽڪ ني آيري گدوم ۾

راڪشي، پڻ بوھ ني اهڙي باشدي ۾ ٻالشي جيڪو ڪڍي پي بجهي ڪونهي.“ 18 سنت يوحنا اهڙي تموم گهڻي شمعهوڻي ڏي منڪون ني خوشي

ري خبر شتاتو رهيو. 19 اوني شون پڇي سنت يوحنا گورنر هيروديس انتپاس ني گهت وڌ ڪهيو، ڪيونڪه او آيري پائي ري لگائي هيرودياس شون

پڙيجو هتو هان بيجا پي خراب ڪوم ڪيئا هئا. 20 پڇي هيروديس انتپاس هيڪ بيجو خراب ڪوم آي پي ڪيئو ڪه اوني سنت يوحنا ني جيل ۾

بند ڪرايو.

### پريو يسوع رو پويتر سنون ليون

(متي 17:3-13؛ مرقس 9:1-11)

21 سنت يوحنا ري جيل جاوڻ شون پيل جڏي منڪ پويتر سنون ليئا پڙيا، تو پريو يسوع پي پويتر سنون ليئو. پويتر سنون ليون شون پڇي او پراڻا ڪرڻ

لاگو، تو اوئيچ تيم آڪاش ڪلي گيو 22 هان پويتر آتما ڪٿوتري روپ ۾ پريو يسوع مائي اُتريو هان آڪاش شون آواز آيو ڪم، ”تو مهارو پيارو ڏيڪرو

هي هان هون تي شون تموم گهڻو خوش هون.“

### پريو يسوع ري پيڙهي

(متي 17:1)

23 جڏي پريو يسوع پرچار ڪرڻ شروع ڪيئو، تو او اندازن تيه شال رو هتو. منڪون ري شمعجه ۾ او يوسف رو ڏيڪرو هتو. يوسف عيلي رو ڏيڪرو

هتو، 24 عيلي متات رو، متات لاوي رو، لاوي ملڪي رو، ملڪي ينا رو، ينا يوسف رو، 25 يوسف متتياھ رو، متتياھ عاموس رو، عاموس ناخوم رو،

ناخوم اسليا روم اسليا نوگا روم<sup>26</sup> نوگا ماعت روم ماعت متتياھ روم متتياھ شمعي روم شمعي يوسينخ روم يوسينخ يودا روم<sup>27</sup> يودا يوحنا روم يوحنا ريسا روم ريسا زربابل روم زربابل سيالتي ايل روم سيالتي ايل نيري روم<sup>28</sup> نيري ملكي روم ملكي ادي روم ادي قوسام روم قوسام المودام روم المودام غير روم<sup>29</sup> غير يشوع روم يشوع اليعزر روم اليعزر يوريم روم يوريم متات روم هان متات لاوي روم<sup>30</sup> لاوي شمعون روم شمعون يهودا روم يهودا يوسف روم يوسف يونان روم يونان الياقيم روم<sup>31</sup> الياقيم مليا روم مليا مناه روم مناه متتاه روم متتاه ناتن روم ناتن دائود روم<sup>32</sup> دائود يسي روم يسي عوبيد روم عوبيد بوعز روم بوعز سلمون روم سلمون نحسون روم<sup>33</sup> نحسون عمينداب روم عمينداب ادمين روم ادمين ارنى روم ارنى حصرون روم حصرون فارص روم فارص يهودا روم<sup>34</sup> يهودا يعقوب روم يعقوب اضرحاق روم اضرحاق ايراهيم روم ايراهيم تارح روم تارح نخور روم<sup>35</sup> نخور سروج روم سروج رعو روم رعو فلج روم فلج عبر روم عبر سلح روم<sup>36</sup> سلح قينان روم قينان ارفكسد روم ارفكسد سيم روم سيم نوح روم نوح لمك روم<sup>37</sup> لمك متوسلح روم متوسلح حنوك روم حنوك يارد روم يارد مهلل ايل روم مهلل ايل قينان روم<sup>38</sup> قينان انوس روم انوس سبت روم سبت آدم روم هان آدم ني ايشور ناهيو.

### پريو يسوع رو آزموتو

(متي 11:1-4؛ مرقس 12:1-13)

**4** <sup>1</sup> پريو يسوع پويتر آتما شون پريجي يردن دريا شون پاچو آيو هان پويتر آتما ري كيوڻ تي رڻ پت م ريوڻ لاگو. <sup>2</sup> اوت چاليھ ڏنن توڻي شيطون اوڻي رو آزموتو ڪرتو رهيو. ايتون ڏنن م پريو يسوع ڪئين ڪونهي ڪاڌو هان پچي جڏي آي ڏن پورا هويام، تو اوڻي ني تموم گهڻي بؤڪ لاڳي. <sup>3</sup> شيطون پريو يسوع ني ڪهيو ڪم، ”جي تُو ايشور رو ڏيڪرو هي، تو ايتي پتر ني حڪم ڏي، تو ٻائي هوڻي جاوي.“ <sup>4</sup> پريو يسوع شيطون ني بلتي ڏيني ڪم، ”شاستر م لڪيوڙو هي ڪم، انسون رگو ٻائي شون جيتو ڪونهي ريتو.“

<sup>5</sup> پچي شيطون اوڻي ني هيڪ اُنچي جگها تي لي گيو هان هيڪي جهت م دنيا را شجائي مُلك بتايا. <sup>6</sup> اوڻي پريو يسوع ني ڪهيو ڪم، ”هُون تئي ايتي شجي مُلكون ري حڪومت هان مون مرتبو ڏئين، ڪيونڪه آي شجو ڪئين مهاري هات م هي. جڪي تي مهاري مرضي هووي هي اوڻي ني آي شجائي ڏي شگهون هون. <sup>7</sup> جي تُو مهڻي آگهي شيش نماوي، تو آي شجو ڪئين تارو هوڻي جاشي.“ <sup>8</sup> ايتي تي پريو يسوع بلتي ڏيني ڪم، ”شاستر م لڪيوڙو هي ڪم، تُو رگو پرميشور آپري ايشور آگهي شيش نما هان رگو اوڻي ري پگتي ڪر.“

<sup>9</sup> ايتي شون پچي شيطون، پريو يسوع ني يروشلم شهر م ايشور ري گهر ري شجون شون ماڻلي جگها تي لي گيو هان اوڻي ني ڪهيو ڪم، ”جي تُو ايشور رو ڏيڪرو هي، تو ايت شون هينو ٿيو ڪام. <sup>10</sup> ڪيونڪه شاستر م لڪيوڙو هي ڪم، ايشور آپري فريشتون ني حڪم ڏينسي ڪه او تاري شپال ڪري. <sup>11</sup> او تئي آپري هاتون تي ڪڍي جهالشي ڪه تاري پگون ني پتر ني لاڳي.“ <sup>12</sup> پڻ پريو يسوع بلتي ڏيني ڪم، ”آي پي لڪيوڙو هي ڪم، تُو پرميشور آپري ايشور رو آزموتو ني ڪر.“ <sup>13</sup> جڏي شيطون هر نموني شون پريو يسوع ني آزمايو، تو پچي او اوت شون بؤنو گيو هان او پڙي پريو يسوع ني آزمائي ڪونهي شگهيو.

پريُو يسوع رو گليل صوبي ۾ پرچار

(متي 17-12:4؛ مرقس 17-14:1)

14 پريُو يسوع پويتر آتما ري طاقت شون پريجي گليل صوبي ڏيڻا پاڇو آيو هان او اُوئي سڄي علائقي ۾ مشهور هيو. 15 پريُو يسوع يهوديون ري پگتي گهرون ۾ شيڪاوتو رهيو هان سڄائي منڪ اُوئي ري بدائي ڪرنا رهيا.

پريُو يسوع رو ناصرت ۾ آپري باري ۾ سٿائون

(متي 58-53:13؛ مرقس 6-1:6)

16 پچي پريُو يسوع ناصرت شهر ۾ گيوم جيٽ او نيو موٽو هيو هتو. اوٽ او چنچر يعني پويتر ڏن رو پگتي گهر ۾ گيوم جهڙي نموني او هر هفتي آپري عادت تي جاوتو. جڏي او شاستر پڙهڻ ري شارو اُنوم. 17 تو اُوئي ني يسعياھ ني رو شاستر ڏينو گيو. پريُو يسوع شاستر ڪوليو هان اوٽ شون پڙهيو، جيٽ مسيح ري باري ۾ اي لڪيوڙو هتو ڪم،

18 ”پرميشور رو ڏينوڙو پويتر آتما مهني پيڙو هي،

ڪيونڪ اُوئي مهني چونديو هي ڪم،

هُون غريبن ني خوشي ري خبر سٿائون.

ايشور مهني ميليو هي ڪم،

هُون جائي اي پرچار ڪرون ڪم،

قيدي آزاد هوشي هان اوندا ڏيڪشي،

هان جڪون شون ظلم هيو هي،

هُون اُوٽون ني اُوئي ظلم شون چوڙائون

19 هان سجون ني سٿائون ڪم،

او تيم آيو رو جڏي پرميشور منڪون تي دايا ڪرشي.“

20 پچي پريُو يسوع شاستر بند ڪري شيواداري ني ڏينو هان آپ بيشي رهيو هان سڄائي منڪ پريُو يسوع ني چٽائي جوٽن لاگا. 21 پريُو يسوع اُوٽون

ني ڪهيو ڪم، ”آج مسيح ري باري ۾ شاستر ري لڪيوڙي اي بات مهني تي پوري هوي ري.“ 22 ايئي بات تي سڄي منڪون پريُو يسوع ري بڪوڻ

ڪي هان حيرون هويا ڪه اُوئي ڪتري سٿي باتون ڪيئي هي. پڻ پچي او ڪيوڻ لاگا ڪم، ”ڪي اي يوسف رو ڏيڪرو ڪونهي؟“ 23 پچي

پريُو يسوع ڪهيو ڪم، ”مهني پڪ هي ڪه ٿي مهني اي ڪيتوڻو ڪشو ڪم، اي ڊاڪٽر آيو آڀني تو شاجو ڪر، هان ٿي اي پي ڪشو ڪم،

‘مهونې ڪو ٿاڻوتې بتا هانَ موتا موتا ڪوم ايت آڀري وطن ۾ پي ڪري بتا، جڪو مهون سُٿيا هِي ڪه ٿي او ڪوم ڪفرنحوم ۾ پي ڪيئا هِي.’“

<sup>24</sup> پرڻو يسوع اُونون نِي آي پي ڪهيو ڪم، ”آي شاجي بات هِي ڪه نبي رو قدر آڀري وطن ۾ ڪونهي هتو. <sup>25</sup> هُون ٿونِي شاجي ڪونه هون ڪه

ايليا هانَ نبي ري ڏنون ۾ جڏي شادي تين سال مي ڪونهي برشو هانَ شجي مُلڪ ۾ تموم گهڻو ڏڪال پڙيو، تو مهوري اسرائيلي قوم ۾ تموم گهڻي

رونڊيرون هتي، <sup>26</sup> پڻ ايشور ايليا هانَ نِي اُونون ۾ ڪي ڏيشا پي ڪونهي ميليو. او رگو هيڪ ڌاري اسرائيلي قوم ري هيڪي رونڊبير لڳائي ڏيشا ميليو

گيو، جڪو صيدا علائقي ري صاريت شهر ۾ ريتي. <sup>27</sup> ايئي نموني اليشع نبي ري ڏنون ۾ اسرائيلي قوم ۾ تموم گهڻا ڪوڙهيا هتا، پڻ اُونون ۾

ڪيئي پي شاجا ڪونهي ڪيئا. اُوئي رگو سورييا مُلڪ ري هيڪي ڪوڙهني نِي شاجو ڪيئو، جڪي رو نون نعمان هتو.“

<sup>28</sup> پرڻو يسوع ري باتون سُٿي پگتي گهر ۾ پينوڙي شجي منڪون نِي ڏاڍي ريش آي. <sup>29</sup> پيچي او اُنيا هانَ پرڻو يسوع نِي شهر شون باهر ڪاڍي لي آيا.

او شهر هيڪي جبل تي هتو، منڪ پرڻو يسوع نِي چوڻي تي لي گيا ڪه او اُوئي نِي جبل شون هيئو ڏڪو ڏي. <sup>30</sup> پڻ پرڻو يسوع اُونون ري بچ شون

نڪري ٻوڻو گيو.

### پرڻو يسوع رو منڪ شون پوت ڪاڍڻ

(مرقس 1: 21-28)

<sup>31</sup> پيچي پرڻو يسوع گليل صوبي ري ڪفرنحوم شهر ۾ گيو، جيٽ او پويتر ڏن رو پگتي گهر ۾ شيڪاوڻ لاگو. <sup>32</sup> اُوئي ري باتون سُٿي شجائي منڪ

حيرون هتا، ڪيونڪه او اختياري شون شيڪاوتو.

<sup>33</sup> پگتي گهر ۾ هيڪ اهڙو منڪ هتو جڪي نِي پوت لاگوڙو هتو. اُوئي زور شون رڙ ڪري ڪهيو ڪم، <sup>34</sup> ”اي يسوع ناصرِي، ٿارو مهون شون

ڪهڙو واسطو؟ ڪي ٿو مهوني متاوڻ آيو هِي؟ مهوني خبر هِي ڪه ٿو ڪڻ هِي. ٿو اوج ايشور رو ميليوڙو پويتر هستي هِي.“ <sup>35</sup> ايئي تي پرڻو يسوع

پوت نِي ڌڙڪو ڏي ڪهيو ڪم، ”مان ڪم ايئي شون نڪري جا.“ ايئي تي پوت اُوئي نِي منڪون آگهي زمين تي نوڪيو هانَ اُوئي شون نڪري

گيو. پڻ اُوئي منڪ نِي ڪئين ڪونهي هويو. <sup>36</sup> آي جوئي شجائي منڪ تموم گهڻا حيرون هويا هانَ آيت ۾ ڪيوڻ لاگا ڪم، ”آي تو موتي بات

هِي، او پوتون نِي اختياري هانَ طاقت شون حڪم ڏي هِي هانَ او نڪري جاوي هِي.“ <sup>37</sup> ايئي نموني پرڻو يسوع اُوئي شجي علائقي ۾ هر جگها

مشهور هتو گيو.

پريو يسوع رو تموم گهڻا منڪ شاجا ڪرڻ

(متي 17-14:8؛ مرقس 1:29-34)

38 پگتي گهر شون نڪري پريو يسوع شمعون ري گهري آيو۔ اوني تيم شمعون ري شاشو ني تموم گهڻو تا هتم، ايئي ري ڪري اوتون پريو يسوع ني منت ڪي ڪم، ”ايئي ني شاجي ڪرو۔“ 39 پريو يسوع اوني لگائي ري پاشي ۾ آئي ايو هان تا ني دڙڪو ڏينوم، تو اوني رو تا اتر ري گيو۔ پچي او لگائي يڪدم ائي هان اوتون ري شارو شيڏو ڪرڻ لاهي۔

40 ڏن اوتون ري تيم منڪ اپرا بيمار پريو يسوع ڪيڏي لي آيا، جڪون ۾ نموني نموني ري بيماري هتي۔ پريو يسوع هر هيڪ تي آيو هات راکيو هان اوتون ني شاجا ڪيا۔ 41 اوني تموم گهڻي منڪون شون پوت ڪاڍيا جڪو رڙي ڪري ڪيتا ڪم، ”تو ايشور رو ڏيڪرو هي۔“ پڻ پريو يسوع اوتون ني پاليا هان اوتون ني ڪو پي بات ڪرڻ ڪونهي ڏيئي، ڪيونڪ پوتون ني خبر هتي ڪه او مسيح هي۔

پريو يسوع رو پرچار ڪرڻ

(مرقس 1:35-39)

42 جڏي ڏن اگو، تو پريو يسوع هيڪلپائي جگها ڏيشا گيو۔ تموم گهڻا منڪ اوني لاري هتا هان جڏي اوتون ني پريو يسوع مليوم، تو او اوني ني منت ڪري ڪيوڻ لاگا ڪم، ”تي ايت شون ني جائو۔“ 43 پڻ پريو يسوع اوتون ني ڪهيو ڪم، ”آي ضرور هي ڪه هون بيجي جگهائون تي پي، ايشور ري بادشاهي ري خوشي ري خبر سٿائون، ڪيونڪ ايشور مهني ايئي ري ڪري مليو هي۔“ 44 ايئي نموني پريو يسوع يهوديون ري سجي علائقي ري پگتي گهرون ۾ پرچار ڪرتو رهيو۔

شمعون، يعقوب، يوحنا رو پريو يسوع را چيلا هوڻ

(متي 22-18:4؛ مرقس 1:16-20)

5 1 هيڪي گهمري پريو يسوع گليل ڍنڍ ري ڪپ تي آيو هتم، تو اوت تموم گهڻا منڪ ايشور ري باتون سٿڻ ري شارو پيڙا هويا۔ منڪ تو اتر ا هتا ڪه او پريو يسوع تي ڪرڻ لاگا۔ 2 پريو يسوع ڍنڍ ري ڪپ تي بي پيڙي ايوڙي ڏيئي، جڪون شون مهاڻا اتر آيو جال ڌوتا پڙيا۔ 3 پريو يسوع هيڪي پيڙي ۾ چڙهيو جڪو شمعون ري هتي هان شمعون ني ڪهيو ڪم، ”پيڙي ني ڪپ شون توڙڪي آگهي پوڻي ۾ لي هال۔“ پچي پريو يسوع پيڙي ۾ پيشي منڪون ني شيڪاوڻ لاگو۔

4 جڏي پريو يسوع پرچار ڪري هتو ڪيو، تو اوني شمعون ني ڪهيو ڪم، ”پيڙي، اوندڙي پوڻي ۾ لي هال هان تو هان تارا ساڻي مچي جهالڻ ري شارو آيو جال هتو۔“ 5 شمعون بلتي ڏيئي ڪم، ”گرو جي، مهون تو سجي رات محنت ڪي هي، مهوني ڪنن ڪونهي هائي آيو۔ پڻ جي تي ڪو هو، تو هون پيڙي جال هتون هون۔“ 6 جڏي شمعون هان اوني ري ساڻيون جال هئا، تو اتر ري تو مچي ڦاڻي ڪه جال توتڻ لاگا۔ 7 ايئي تي اوتون

آپري سائون ني جڪو پيچي پيڙي ۾ هئا اشارو ڪري مدد ري شارو هبلو ڪيئو. پيچي او آيا هان شجون مچيون شون بيئي پيڙي اترې تو پريئي ڪه پيڙي ٻوڏڻ لاڳي.

8 جڏي شمعون جڪي ني پطرس پي ڪيتا آي پرچو ڏينم، تو او پريو يسوع ري پگون ۾ ڪريو هان ڪيوڻ لاڳو ڪم، ”اي پريو، مهني شون الڳا هونم، ڪيونڪه هون تو بابي منڪ هون.“<sup>9</sup> اوئي آي ايئي ري ڪري ڪهيو، ڪيونڪه او هان اوئي را ساڻي اترې مچي ڏيڪي تموم گهڻا حيرون هئا. <sup>10</sup> شمعون را پائوار يعني زبدي را ڏيڪرا يعقوب هان يوحنا پي آي جوئي حيرون هوبا. پيچي پريو يسوع شمعون ني ڪهيو ڪم، ”تو ني پيئاج، آج شون پيچي تو مچي نام پڻ مهاري شارو منڪ پيڙا ڪري.“<sup>11</sup> پيچي او پيڙيون ني ڪپ تي لي آيا هان آيو شجو ڪئين اوت چوڙي پريو يسوع را چيلا هوني اوئي لاري بيون لاڳا.

### پريو يسوع رو ڪوڙهي ني شاجو ڪرڻ

(متي 8:1-4؛ مرقس 1:40-45)

12 جڏي پريو يسوع گليل صوبي ري هيڪي شهر ۾ هتم، تو اوت اوئي ڪيڊي هيڪ اهڙو منڪ آيو جڪي ري شجي شير تي ڪوڙه هتو. جڏي اوئي پريو يسوع ني ڏينم، تو اوئي ري پگون ۾ ڪري منڪ ڪرڻ لاڳو ڪم، ”اي پريو، جي تاري مرضي هووي، تو مهني شاجو ڪري آچو اوجلو ڪرو.“<sup>13</sup> پيچي پريو يسوع اوئي ڪوڙهي ني آيو هات لڳايو هان ڪهيو ڪم، ”هاوي، مهاري مرضي هي ڪه تو شاجو هو.“ ايئي تي يڪدم اوئي ري ڪوڙه ري بيماري ختم هوني گئي. <sup>14</sup> پريو يسوع اوئي ني حڪم ڏينو ڪم، ”اي بات ڪيني پي ني شٽائي، پڻ شڌو يروشلم شهر ۾ ايشور ري گهر ۾ جا هان آني پوجاري ني بتا هان او چڙهائو چاڙه جڪي ري باري ۾ موسي ري شاستر ۾ حڪم هي، ايئي شون شجون ني خبر پيڙي ڪه تو شاجو هويو هي.“<sup>15</sup> تو پي پريو يسوع ري باتون هان پرچا هر جگها مشهور هوتا گيا هان منڪون را موتا موتا تولا پريو يسوع ڪيڊي اوڻ لاڳا ڪه اوئي ري باتون شئي هان آپري بيماريون شون شاجا هووي. <sup>16</sup> پڻ ايئي پيڙو پريو يسوع هيڪلو رڻ پت ۾ جائي پراتنا ڪرتو.

### پريو يسوع رو آڏرنڱي ني شاجو ڪرڻ

(متي 9:1-8؛ مرقس 1:2-12)

17 هيڪ ڏن جڏي پريو يسوع پرچار ڪرتو پريو، تو اوت ڪئينڪه فريسي پنت آلا هان ڌرمي گرو پي بينوڙا هتا، جڪو گليل صوبي هان يهوديا صوبي ري هر هيڪ گون هان يروشلم شهر شون آيوڙا هتا. ايشور ري قدرت پريو يسوع ڪيڊي هتي هان او بيمارون ني شاجا ڪرتو. <sup>18</sup> اوئي تيم ڪئينڪه منڪ هيڪي آدمي ني مچي تي ڪئي آيا جڪي ني آڏرنگو هتو هان او بي ڪونهي شگهتو. اوئون اوئي ني پريو يسوع ڪيڊي گهر ۾ لي جاوڻ ري ڪوشش ڪي. <sup>19</sup> پڻ گهڻي رش ري ڪري او پريو يسوع ڪيڊي پڳي ڪونهي شگهيا. پيچي او بيمار ني ڪئي اونچا گهر ماڻي گيا هان اوئون گهر ري چت ڪولي بيمار ني جهوڻي شوڌو منڪون ري بچ ۾ پريو يسوع آگهي اٿاريو. <sup>20</sup> جڏي پريو يسوع ڏينو ڪه اوئون رو اتر و شواس هي، تو اوئي

بیمار نِي کھيو ڪم ”ادام ٿارا پاپ معاف هويا را.“<sup>21</sup> اِئين تي ڌرمي گُرو هانَ فریسی آڀري من ۾ شوچڻ لاگا ڪم ”ايشور شون نال بيجو ڪو پي پاپ معاف ڪري ڪونهي شگهنوم تو پڇي آي ڪڻ هي جڪو آڀني ايشور شمجهي هي؟“<sup>22</sup> پريو يسوع اوتون را خيال شمجهي گيو هانَ اوتون نِي کھيو ڪم ”تي اهڙي باتون ڪيون شوچو هو؟“<sup>23</sup> ڪي آي ڪيوڻ شولو هي ڪم ”ٿارا پاپ معاف هويا را“ جون آي ڪيوڻ ڪم ”اِني گهم ڦر.“<sup>24</sup> پڻ هون توني آي ڪري بتائين ڪه هون منش پتر هون هانَ مهني جگت ۾ پاپ معاف ڪرڻ ري اختياري هي.“ پڇي پريو يسوع بیمار نِي کھيو ڪم ”هون تني ڪونه هون ڪه اِني هانَ آڀري جهوڻي ڪڻ هانَ آڀري گهري بوڻو جا.“<sup>25</sup> پڇي او منڪم اوتون ري آگهي يڪدم اُنيو هانَ جڪي جهوڻي ۾ او پريو هتو اوتني نِي ڪي ايشور ري ٻڌائي ڪرتو آڀري گهري بوڻو گيو.<sup>26</sup> آي جوئي شجائي منڪ تموم گهڻا حيرون هويا هانَ ايشور ري ٻڌائي ڪرڻ لاگا. او تموم گهڻا بيناجا هانَ ايتون ڪيوڻ لاگا ڪم ”آج آيون ڪهڙي عجيب بات ڏيني هي.“

### لاوي رو پريو يسوع رو چيلو هوڻ

(متي 9:9-13؛ مرقس 2:13-17)

<sup>27</sup> اِئين شون پڇي جڏي پريو يسوع اوتني گهر شون باهر نڪريو، تو اوتني هيڪي ناڪو ليوڻ آئي نِي ڏينو جڪي رو نون لاوي هتو. اوتني تيم او ناڪو ليوڻ آئي جگها تي پينو هتو. پريو يسوع اوتني نِي کھيو ڪم ”مهرو چيلو هو هانَ مهاري لاري ني.“<sup>28</sup> لاوي اُنيو هانَ آڀرو شجو ڪئين چوڙي پريو يسوع لاري بيوڻ لاگو.

<sup>29</sup> پڇي لاوي پريو يسوع ري آڀري گهري موتي دعوت ڪي. تموم گهڻا ناڪو ليوڻ آلا هانَ بيجا منڪ پي اوتني دعوت ۾ ٻائي کاوتا پريا.<sup>30</sup> تو آي جوئي فریسی هانَ اوتون را ڌرمي گرو، پريو يسوع ري چيلون تي الزوم هڻي ڪيوڻ لاگا ڪم ”تي ڪيون ناڪو ليوڻ آتون هانَ پاپيون پيا کائو پينو هو؟“<sup>31</sup> پريو يسوع اوتون نِي آي مثال شٽائي ڪم ”شاجون شورون ني ڊاڪتر ري ضرورت ڪونهي، پڻ بيمارون ني.“<sup>32</sup> هون اوتون منڪون ري شارو ڪونهي آيو جڪو آڀني نيڪ شمجهي هي، پڻ اوتون ري شارو جڪو آڀرو آڀني پاپي شمجهي هي ڪه او آڀري پاپون شون توبهون ڪري هانَ ايشور ري باتون تي ني.“

### روزي ري باري ۾ سوال

(متي 9:14-17؛ مرقس 2:18-22)

<sup>33</sup> پڇي اوتون پريو يسوع نِي کھيو ڪم ”يوحنا پويتر سنون ڏيوڻ آئي را چيلا تو گهڻو ڪري روزا راڪي هانَ پراتنا ڪري هي هانَ فریسی پنت را چيلا پي ايتوج ڪري هي. پڻ ٿارا چيلا تو کاوتا پينا ري هي.“<sup>34</sup> پريو يسوع اوتون نِي بلتي ڏيني ڪم ”جترې توڻي لاڏو جون پيڙو هي اترې توڻي تي جونبون شون روزا رکائي ڪونهي شگهتا.“<sup>35</sup> پڻ اهڙو تيم آشي جڏي مهني آڀري چيلون شون ڌار ڪيو جاشي، تو پڇي اوتني تيم او ضرور روزا راڪشي.“

## رُگو پريو يسوع لاري بيوڻ

<sup>36</sup> پريو يسوع اوتون ني اي مثال پي شُئائي ڪم، ”ڪو پي منڪ نُوئي ڳايون ني ڦاڙي پروئي ڳايون تي ڪاري ڪونهي ڏيتو. جي او ايئون ڪرشي، تو نونا ڳايا ڦاتشي را هان پروئي ڳايون تي نُوئي ڪاري ڦوتري پي ڪونهي لاڳي.“<sup>37</sup> جون ڪو پي منڪ تازو انگورون رو رس پروئي ڏييون ۾ ڪونهي ڀرتو. جي ايئون ڪرشي، تو پروئي ڏيئي تازي رس ري پڪڙ ري ڪري ڦاتي جاشي. ايئي نموني ڏيئي هان انگورون رو رس بيئون رو زيئون هوئي جاشي. <sup>38</sup> ايئي ري ڪري تازو انگورون رو رس تو نُوئي ڏييون ۾ ڀرڻ ڪبي. <sup>39</sup> پڻ ڏک ري بات اي هي ڪه جڪو منڪ پروئي انگورون رو رس پيڻ رو عادي هي، او ڪڏي پي تازو انگورون رو رس ڪونهي پيئي، ڪيونڪه او ڪشي ڪم، ’پروئي انگورون رو رس تو تموم گهڻو سُنو هووي هي.‘“

## پريو يسوع پويتر ڏن رو مالڪ

(متي 12:1-8؛ مرقس 2:23-28)

**6** <sup>1</sup> هيڪي پويتر ڏن رو پريو يسوع آڀري چيلون پيڙو ڪڻڪ ري پوک شون لنگهيو، تو اُوئي نيم اُوئي را چيلا ڪڻڪ را شتا توڙي مَسوتا ڏي ڪاوڻ لاڳا. <sup>2</sup> اي جوئي ڪئينڪه فريسي منڪون آڀري بات نائي پريو يسوع ري چيلون ني ڪهيو ڪم، ”تي اي ڪوم ڪيئون ڪرو هو؟ ڪي توني اي خبر ڪونهي ڪه پويتر ڏن رو لبارو ڪڻ هان شيڏي ڪڻ رو ڪو پي ڪوم ني ڪڻ ڪبي؟“<sup>3</sup> پريو يسوع اوتون ني بلتي ڏيني ڪم، ”تون دائود ري باري ۾ ضرور پڙهيو هو شي ڪه جڏي اُوئي ني هان اُوئي ري منڪون ني بُوڪ لاڳي، تو اُوئي ڪي ڪيو؟<sup>4</sup> اُوئي ايشور ري گهر ۾ جائي پوجاري شون بائي مونگئي. همي مهوني خبر هي ڪه جڪو بائي ايشور ري نون ري ڪيئوڙي هتي اوتون تي رُگو پوجاريون رو حق هتو ڪه او ڪاوي. تو پي دائود بُوڪ ري ڪري او بائي پوجاري شون لي آپ ڪاڏي هان آڀري منڪون ني پي ڏيني.“<sup>5</sup> پيچي پريو يسوع اي پي ڪهيو ڪم، ”هُن مُنش پتر، پويتر ڏن رو پي مالڪ هون.“

## شُوڪوڙي هات آئي منڪ ني شاجو ڪڻ

(متي 12:9-14؛ مرقس 3:1-6)

<sup>6</sup> ڪي پيچي پويتر ڏن رو پريو يسوع پگتي گهر ۾ گيو هان اوڻ شيڪاوڻ لاڳو. اوڻ هيڪ اهڙو منڪ هتو، جڪي رو شاجو هات شُوڪوڙو هتو. <sup>7</sup> ڪئينڪه ڌرمي گرو هان فريسي منڪ پريو يسوع تي الزوم هڻڻ ري تال ۾ هتا هان او ايئي انتظار ۾ هتا ڪه پريو يسوع پويتر ڏن رو ڪيني شاجو ڪرشي جون نا. <sup>8</sup> پڻ پريو يسوع ني خبر هتي ڪه او ڪي شوچي پڙيا، اُوئي شُوڪوڙي هات آئي منڪ ني ڪهيو ڪم، ”اُني مهوري بچ ۾ آ.“ پيچي او اُني ايو. <sup>9</sup> پريو يسوع اوتون شون پوچو ڪم، ”مهني شُئائوم برميشور ري حُڪمون تي پويتر ڏن رو پلائي ڪڻ صحيح هي جون بچڙائي؟ ڪيري حياتي بچاوڻ پلو هي جون اُوئي ني مارڻ؟“<sup>10</sup> پيچي پريو يسوع چارئي پاشي اوتون شجون ني جويو هان شُوڪوڙي هات آئي منڪ ني ڪهيو

ڪم، ”آپرو هات ڏيگهو ڪر.“ اُوئي اينوج ڪيئو هانَ يڪدم اُوئي رو هات شاجو هوئي گيو. <sup>11</sup> اِئيني تي ڌرمي گُرو هانَ فريسي تموم گهڻا ريشي ٻليا هانَ آيت ۾ ڪيوڻ لاگا ڪم، ”آپون ني يسوع زي باري ۾ ڪي ڪرڻ ڪڍي.“

### پريو يسوع رو ٻارهي سنت چُونڊڻ

(متي 10:1-4؛ مرقس 3:13-19)

<sup>12</sup> اُوئون ڏنن ۾ پريو يسوع هيڪي جبل تي پرائنا ڪرڻ گيو هانَ اوت شجي رات ايشور شون پرائنا ڪرتو رهيو. <sup>13</sup> جڏي ڏن اُگوم، تو اُوئي آپري چيلون ني آپ ڪيڏي هيلو ڪيئو هانَ اُوئون ۾ ٻارهي منڪ چُونڊيا جڪون ني اُوئي سنت ڪهيو. <sup>14</sup> اُوئون را نون آي هي، شمعون جڪي رو نون پريو يسوع بطرس پي راڪيو، اندرياس جڪو شمعون رو ڀائي هتوم، يعقوب، يوحنا، فلپس، برتلمائي، <sup>15</sup> متي، توما، حلفي رو ڏيڪرو يعقوب، شمعون جڪي ني وطن دوست پي ڪي هي، <sup>16</sup> يعقوب رو ڏيڪرو يهودا هانَ يهودا اسڪرٽوتي جڪي پڇي پريو يسوع ني جهلايو.

### پريو يسوع رو منڪون ني شاجا ڪرڻ

(متي 4:23-25)

<sup>17</sup> پڇي پريو يسوع آپري چيلون پيو جبل شون هينو اُتريو هانَ اُئي پوني ۾ آيو. اوت پريو يسوع زي چيلون رو هيڪ موتو تولو هتو. اُوئي شون نال ٻيجا تموم گهڻا منڪ پي هتا. او منڪ يروشلم شهر هانَ شموندر زي ڪپ زي شهرن صُور هانَ صيدام پڻ شجي يهوديا علائقي شون آيوڙا هتا. <sup>18</sup> او شجائي پريو يسوع زي باتون شُڻڻ هانَ آپري بيماريون شون شاجا هوئڻ زي شارو آيا هتا. جڪون منڪون ۾ پوت هتا، پريو يسوع اُوئون شجون را پوت ڪاڍيا. <sup>19</sup> شجائي منڪ پريو يسوع ني هات لگاڻ ري ڪوشش ڪرڻ لاڳام ڪيونڪه پريو يسوع ۾ اهڙي قُدرت هتي جڪي شون شجائي منڪ شاجا هوئي جاوتا.

### برڪت هانَ لعنت

(متي 5:1-12)

<sup>20</sup> پريو يسوع آپري چيلون ني جوئي ڪهيو ڪم،

”ڏن هو ٿي جڪو غريب هو،

ڪيونڪه ايشور ري بادشاهي ٿونري شارو هي.

<sup>21</sup> ڏن هو ٿي جڪو هڻون بُوڪيا هو،

ڪيونڪه ٿوني ڏنو ڪرايو جاشي.

ڏن هو ٿي جڪو هڻون روئو هو،

ڪيونڪه ٿي هاششيو.

22 ڏن هو ٿي، جڏي منڪ مُنش پُتر ري ڪري ٿون شون نفرت ڪرشي،

ٿونري بي عزتي ڪرشي،

ٿوني آپري منڪون شون ڪاڍي چوڙشي

هان ٿوني خوار ڪرشي.

23 جڏي پي ٿون شون ايئون هووي، تو ٿي خوش هويا هان خوشي ۾ ناچا، ڪيونڪه آڪاش ۾ ٿوني ايئي رو موتو اجر ملشي. اُونون ري باپ ڏاڏون

پي نبيون شون اهڙو سلوڪ ڪيئو هتو.

24 پڻ ڏڪ هي ٿون تي جڪو مالدار هو،

ڪيونڪه جگت ۾ ٿون آروم ڪيئو رو.

25 ڏڪ هي ٿون تي جڪو هٿون ڏاپوڙا هو،

ڪيونڪه پڇي ٿي بُوڪي مرشو.

ڏڪ هي ٿون تي جڪو هٿون هَسو هو،

ڪيونڪه پڇي ٿي ماتم ڪرشو هان روشو.

26 ڏڪ هي ٿون تي جڏي شجائي منڪ ٿونري نيڪي ڪري،

ڪيونڪه اُونون را باپ ڏاڏا پي ڪُوڙي نبيون ري ايئوج نيڪي ڪرتا.“

### آپري دُشمنون شون پريم ڪرو

(متي 5:38-48؛ متي 7:12)

27 پريو يسوع ڪهيو ڪه، ”تي جڪو مهاري باتون سُڻو هو، هون ٿوني ڪونه هون ڪه آپري دُشمنون شون پريم ڪرو هان جڪو ٿون شون نفرت

ڪري هي، اُونون شون پلائي ڪرو. 28 جڪو ٿوني پئي هي، اُونون ري شارو برڪت مونگو هان جڪو ٿونري بي عزتي ڪري، اُونون ري شارو پراٽنا

ڪرو. 29 جي ڪن ٿونري هيڪي گال تي ٿاپ هئي، تو اُوئي ني بيجو گال پي ڦيرائي ڏيئو. جي ڪن ٿونرو توال لي، تو اُوئي ني آبرو ڪميش پي لي

جاوڙ ڏيئو. 30 جڪو پي ٿون شون ڪئين مونگي، تو اُوئي ني ڏيئو هان جي ڪن ٿونرو ڪئين لي جاوي، تو اُوئي شون پاچو ني مونگو. 31 جهڙي

نموني منڪ ٿون شون ڪنو سلوڪ ڪري هي، تي اُونون شون اهڙو سلوڪ ني ڪرو، پڻ جي تي شوچو ڪه منڪ ٿون شون پلائي ڪري، تو ٿي

اُونون شون سُنو سلوڪ ڪرو. 32 پڻ جي ٿي رگو اُونون شون پريم ڪرو هو جڪو ٿون شون پريم ڪري هي، تو ايئي رو ڪهڙو فائدو؟ ڪيونڪه پاپي

منڪ پي ايتوج ڪري هي. <sup>33</sup> جي ٿي رڳو اوتون شون پلائي ڪرو هو جڪو تون شون پلائي ڪري هي، تو آي ڪو موتي بات ڪونهي؟ ڪيونڪه پايي منڪ پي ايتوج ڪري هي. <sup>34</sup> جي ٿي اوتون ني اوزار ڏيئو، جڪي شون پاچو ليوڻ ري اُميد هي، تو تون ڪهڙي پلائي ڪي؟ ڪيونڪه پايي منڪ پي بيجون ني اوزار ڏي هي هان پاچو لي هي. <sup>35</sup> پڻ ٿي آبري دُشمنون شون پريم ڪرو، اوتون شون پلائي ڪرو هان اوتون ني اوزار ڏيئو، پڻ اوزار پاچي ليوڻ ري اُميد ني راکوم، تو توني ايني رو موتو اجر ملشي هان ٿي پرميشور را ٻال هوشوم، ڪيونڪه او ناشڪرون هان بچتون تي مهربون هي. <sup>36</sup> جون تونرو ايشور پتا دايالو هي، ٿي پي دايا ڪرو.

### بيجون را فيصلا ڪرڻ آلا

(متي 5:1-7)

<sup>37</sup> پريو يسوع ڪهيو ڪم، ”تي بيجون را فيصلا ڪرڻ آلا ني هوئو، تو تونرو فيصلو پي ڪونهي هوئي. بيجون ني ڏوهي ني ڪرو، تو توني پي ڏوهي ڪونهي ڪيئا جاوي. بيجون ني معاف ڪرو، تو ايشور پي توني معاف ڪشي. <sup>38</sup> جي ٿي بيجون ني ڏيشوم، تو ايشور پي توني ڏيشي. نون ۾ دٻائي دٻائي هان چوتي توڻي پري تونري جهوڻي ۾ گهاتيو جاشي. ڪيونڪه جڪي ماڻي شون ٿي ڏينو هو، اونيچ ماڻي شون ايشور توني ڏيشي.“

<sup>39</sup> پريو يسوع اوتون ني آي مثال پي ڏيني ڪم، ”هڪ اونڌو بيجي اونڌي ني مارگ بتائي ڪونهي شگهتو. جي ايتون ڪشي، تو او پئي ڪڏي ۾ ڪشي. <sup>40</sup> ڪو پي چيلو آبري گرو شون موتو ڪونهي، پڻ جڏي چيلو سجي باتون شيڪي هي، تو او آبري گرو جهڙو هوئي هي. <sup>41</sup> ٿو آبري پائي ري اونڪ ۾ گند تو ڏيڪي هي، پڻ ٿاري آبري اونڪ ۾ جڪو لڪڙ پڙيو هي، ڪي ٿو او ڪونهي ڏيڪتو؟ <sup>42</sup> جڏي ٿو آبري اونڪ رو لڪڙ پي ڪونهي ڏيڪتو، تو ٿو ڪيڪر آبري پائي ني ڪئي ڪم، آم، تو هون ٿاري اونڪ شون گند ڪاڍون؟“ اي نگم، پيل ٿو آبري اونڪ رو لڪڙ تو ڪاڍم، پچي ٿو سني نموني جوئي آبري پائي ري اونڪ رو گند ڪاڍي شگهي.“

### جهڙو بن تهڙو قل

(متي 20-16:7؛ متي 35-33:12)

<sup>43</sup> پريو يسوع آي پي ڪهيو ڪم، ”ڪو پي سُنو بن خراب قل ڪونهي ڏيتو هان نڪو خراب بن ڪو سُنو قل ڏيتو. <sup>44</sup> شجائي بن آبري قل شون اولڪيا جاوي هي، ڪيونڪه ڪو پي ٻڙ شون انجير ڪونهي توڙتو هان نڪو ڪانڊيون شون انگور. <sup>45</sup> نيڪ منڪ رو من سني خزوني آلي ڪار هي، جڪي شون سني باتون نڪري هي. بچڙي منڪ ري من شون بچڙي باتون نڪري هي، ڪيونڪه جڪو باتون من ۾ پريوڙي هي، اوج موڏي شون نڪري هي.“

## بيٽون گهرون رو مثال

(متي 7:24-27)

46 پريو يسوع كهيو ڪهه ”جڏي ٿي مهارو ڪهيو ڪونهي منٿا، تو پڇي مهني پريو، پريو ڪيئون ڪو هو؟“ 47 هون ٿوني ڪونه هون ڪه جو منڪ مهني ڪڍي آوي، مهاري باتون سُڻي اوتون تي بي هي، تو او منڪ ڪهڙو هي؟ 48 او اوتني منڪ آلي ڪار هي، جڪي آيو گهر ناوتي بلا اوتني چر ڪوتري اوتني رو بُنياد پڪي بني تي راکيو. جڏي ٻوڏ آئي، تو ٻوڏي اوتني گهر ني سٿون ڏيئي، پڻ اوتني گهر ني لوڏو پي ڪونهي آيو، ڪيونڪه او گهر پڪو ٺاهيو هتو. 49 پڻ او منڪ جو مهاري باتون سُڻي هي هان اوتون تي بيتو ڪونهي، تو او اوتني منڪ آلي ڪار هي جڪي بُنياد شون ٿال آيو گهر ٺاهيو، جڏي ٻوڏ آئي هان اوتني گهر ني سٿون ڏيئي، تو اوتني رو گهر يڪدم ڪري متي گيو.“

## رُومي صوبيدار رو وشواس

(متي 8:5-13)

7<sup>1</sup> جڏي پريو يسوع منڪون ني سڄي باتون سُڻائي، تو پڇي او ڪفرنحوم شهر ۾ گيو. 2 اوت رُومي فوج رو هيڪ صوبيدار هتو، جڪي رو هيڪ غلوم تموم گهڻو بيمار هتو هان او مرڻ آتو هتو. او غلوم صوبيدار رو خاص غلوم هتو. 3 جڏي صوبيدار پريو يسوع ري باري ۾ سُڻيو، تو اوتني ڪئينڪه يهودي اگوڻ، پريو يسوع ڪڍي ميليا هان اوتون ني ڪهيو ڪه، ”جائو هان اوتني ني منت ڪرو ڪه او آوي هان مهاري غلوم ني مرڻ شون بچاوي.“ 4 او اگوڻ پريو يسوع ڪڍي آيا هان اوتني ني تموم گهڻي منتون ڪري ڪيوڻ لاگا ڪه، ”مهروني ڪري صوبيدار ري مدد ڪرو، ڪيونڪه او پلو منڪ هي.“ 5 او مهوري قوم شون پريم ڪري هي هان اوتني مهوني پگتي گهر پي نٿائي ڏينو هي.“

6 ايتني تي پريو يسوع اوتون اگوڻون پيڙو گيو. جڏي او صوبيدار ري گهر ري نيڙا پگڻ آلا هتا، تو صوبيدار آيري ڪئينڪه دوستون ني ڪئي ميليو ڪه، ”پريو، ٿي تڪليف ني ڪرو. هون ايتني ري لائق ڪونهي ڪه ٿي مهاري گهري آتو. 7 ايتني ري ڪري نڪو هون اپني ايتني لائق سمجهتو ڪه ٿون ڏيما اٿون. ٿي رگو اوت شون حڪم ڪرو، تو مهارو غلوم شاجو هوئي جاشي. 8 مهني خبر هي ڪه اختياري ڪي هي، ڪيونڪه هون آپ حڪومت هينا هون هان فوجي مهاري هينا هي. جڏي هون ڪيني ڪونه ڪه جا، تو او جاوي هي هان جڏي هون ڪيني ڪونه ڪه، آه تو او آوي هي. ايتني آلي ڪار جڏي هون آيري غلوم ني ڪونه ڪه آي ڪوم ڪم، تو او ڪري هي.“

9 آي بات سُڻي پريو يسوع تموم گهڻو حيرون هويو هان پاچل قوري لاري اول آلي منڪون ني ڪهيو ڪه، ”هون ٿوني ڪونه هون ڪه مهني اتري موٽي وشواس آتو منڪ آيري اسرائيلي قوم ۾ ڪڏي پي ڪونهي ڏينو.“ 10 جڏي صوبيدار را ميليوڙا منڪ اوتني ري گهري پاچا گيا، تو اوتون صوبيدار ري غلوم ني شاجو سُورو ڏينو.

## رونڊپير ري ڏيڪري ني جيتو ڪرڻ

11 ڪئينڪ ڏنن شون پڇي پريو يسوع بيڃي شهر ۾ گيو جڪي رو نون نائين هتو. پريو يسوع پيڙا اوئي را چيلا هان بيجا تموم گهڻا منڪ پي هتا.

12 جڏي پريو يسوع شهر ري در تي ڳوم، تو اوئي ڏينو ڪه منڪ هيڪي لاش ني شهر شون باهر ٻورڻ ري شارو لي جاوي پڙيا. او آڀري رونڊپير ما رو هيڪج ڏيڪرو هتو. اوئي رونڊپير پيڙا شهر را بيجا تموم گهڻا منڪ آيوڙا هتا. 13 پريو يسوع ني اوئي رونڊپير تي ڪياس آيو هان اوئي ني ڪهيو ڪه، ”ٻائي، تو ني رو.“ 14 پڇي پريو يسوع لاش ري نيڙو آيو هان اوئي ني هات لگايو، تو ڪونڊي اُپي رهيا. پڇي پريو يسوع ڪهيو ڪه، ”اي جوان، هون تني ڪونه هون ڪه اُن.“ 15 ايئي تي او مڙدو جيتو هويو هان باتون ڪرڻ لاگو. پڇي پريو يسوع اوئي ني اوئي ري ما ري حوالي ڪيو.

16 ايئي بات تي شجائي منڪ تموم گهڻا حيرون هويو هان او ايشور ري ٻڌائي ڪرتا ايئون ڪيوڻ لاگا ڪه، ”ايشور آڀري منڪون تي دايا ڪي هي هان آڀي شارو هيڪ موتو نبي ميلي هتي.“ 17 پريو يسوع ري باري ۾ اي بات شجي يهوديا صوبي هان آشي پاشي ري علائقي ۾ مشهور هوئي گئي.

## سنت يوحنا رو آڀرا چيلا پريو يسوع ڪيڍي ميلن

(متي 11:2-19)

18 پويتر سنون ڏيوڻ آئي سنت يوحنا ري چيلون جيل ۾ جائي اوئي ني پريو يسوع ري باري ۾ شجي باتون سڻائي. 19 پڇي سنت يوحنا آڀري پيئون چيلون ني هيلو ڪري اوئون ني پريو يسوع ڪيڍي ميليا ڪه جائو هان اوئي شون پوڄو ڪه، ”ڪي تو اوج مسيح هي، جڪي ري اوڻ ري باري ۾ شاسترون ۾ لڪيوڙو هي، جون مهني ڪي بيڃي رو مارگ جوئون؟“ 20 جڏي او پيئي پريو يسوع ڪيڍي آيا، تو اوئون ڪهيو ڪه، ”يوحنا پويتر سنون ڏيوڻ آئي مهوني تون ڪيڍي ايئي ري ڪري ميليا هي ڪه مهني تون شون پوڄون ڪه ڪي تي مسيح هو، جڪي ري اوڻ ري باري ۾ شاسترون ۾ لڪيوڙو هي، جون مهني ڪي بيڃي رو مارگ جوئون؟“ 21 اويج تيم پريو يسوع تموم گهڻي منڪون ري بيماري هان ڏڪ مڻايا هان اوئون شون پوت ڪاڍيا هتا. اوئي تموم گهڻي اونڌون ني شاجا ڪينا هتا. 22 پڇي پريو يسوع سنت يوحنا ري چيلون ني ڪهيو ڪه، ”جڪو ڪئين تون ڏينو هان سڻيو هي، او جائي يوحنا ني سڻائو ڪه اوتدا ڏيڪي هي، مندا بي هي، ڪوڙهيا شاجا هووي هي هان ٻوڙا سڻي هي، مونوڙا جيتا ڪينا جاوي هي هان غريبنون ني خوشي ري خبر سڻائي جاوي هي. 23 ڏن هي او جڪو مهاري باري ۾ اي شڪ ڪونهي ڪرتو ڪه هون مسيح هون.“

24 جڏي سنت يوحنا را ميليوڙا منڪ ٻوڙا گيا، تو پريو يسوع منڪون ني سنت يوحنا ري باري ۾ ڪيوڻ لاگو ڪه، ”جڏي تي رڻ ٻت ۾ يوحنا ڪيڍي گيا هتا، تو تي ڪي جوئڻ گيا هتا؟ ڪي تي اهڙي منڪ ني جوئڻ گيا هتا، جڪي رو وشواس بائيري ۾ لڏتي شرون آئي ڪار هووي هي؟ 25 پڇي تي ڪي جوئڻ گيا هتا؟ ڪي تي اهڙي منڪ ني جوئڻ گيا هتا، جڪي را ڦوڙا گيا پريوڙا هووي هي؟ سڻو، ڦوڙا گيا پيرڻ آلا هان موج هان مزي شون ريوڻ آلام تو بادشاهي محلاتون ۾ ري هي. 26 پڇي تي ڪيني جوئڻ گيا هتا؟ ڪي تي نبي ني جوئڻ گيا هتا؟ هاوي، پڻ هون توني شاجي ڪونه هون ڪه يوحنا تو نبي شون پي موتو هي. 27 يوحنا او منڪ هي جڪي ري باري ۾ شاسترون ۾ ايئون لڪيوڙو هي ڪه،

‘هُون آڀرو نڀاڀو ڏيڻ آڻو ٿي شون پيل ميلين-

او تاري آڻڻ شون پيل ٿارو مارگ تيار ڪرڻي-

28 هُون ٿوئي شاڄي ڪونه هون ڪه آڄ ڏن توڻي ڪو پي اهڙو منڪ ڪونهي جايو جڪو يوحنا شون موتو هوڙي- تو پي ايشور ري بادشاهي ۾ نئي

شون نڀو منڪ يوحنا شون موتو هي-“ 29 جڏي شڄي منڪون هان خاص ڪري ناڪو ليون آڻون پريو يسوع ري آي باتون شئي، تو آڻون ايشور ري

باتون ني شاڄي مني، ڪيونڪه آڻون سنت يوحنا شون پوٽر سڻون ليئو هتو- 30 پڻ فريسيون هان ڌرمي گروئون، سنت يوحنا شون پوٽر سڻون ڪونهي

ليئو هتو، ايئي نموني آڻون آڀري شارو ايشور ري مرضي ني پوري هوڻ ڪونهي ڏيني-

31 پڇي پريو يسوع ڪهيو ڪه، ”هُون ايئي زموني ري منڪون ني ڪي شون پيتائون ڪه او ڪهڙا هي؟“ 32 او آڻون ٻائون جهڙا هي، جڪو ٻاهر چوڪ

تي بيشي رمتي بلا هيڪي بڄي ني زور شون ڪي هي ڪه،

‘مهون ٿونري شارو بونشلي بجائي،

پڻ ٿي ناڄا ڪونهي-

مهون پار ڪاڍيا، پڻ ٿي رونا ڪونهي-

33 ايئي نموني جڏي يوحنا پوٽر سڻون ڏيڻ آڻو آيو، تو او نڪو ٻاتي ڪاوتو هان نڪو انگورون رو رس پيتو، پڻ ٿي ڪو هو ڪه، ’اُئي ۾ پوت هي-‘

34 پڻ هُون مُنش پتر، ڪاڻون هان پيئون هون، پڻ ٿي ڪو هو ڪه، ’جوئو، آي ڪاڻو هان شرابي هي هان ناڪو ليون آڻون هان پايون رو يار هي-‘

35 پڻ جڪو ايشور ري باتون مني هي، اُئي ري ڪومون شون خبر پڙي هي ڪه ايشور شاڄو هي-“

### پريو يسوع رو پاپڻ لڳائي ني معاف ڪرڻ

36 شمعون نون ري هيڪي فريسي منڪ، پريو يسوع ري دعوت ڪي- تو پريو يسوع اُئي ري گهري گيو هان ٻاتي ڪاڻ پينو- 37 اُئي شهر ۾ هيڪ

خراب لڳائي هتي- جڏي اُئي ني خبر پڙي ڪه پريو يسوع فريسي ري گهري ٻاتي ڪاوي پڙيو، تو او سنگ مرمر ري شيشي ۾ عطر لي اوڻ گئي-

38 او پريو يسوع ري لاري شون آي هان اُئي ري پگون توڻي اُئي روڻ لاڳي هان پريو يسوع را پگ اُئي ري آڻون شون پينڻ لاڳا- پڇي اُئي لڳائي

آڀري ٻائون شون پريو يسوع را پگ آڇا ڪيئا هان پگون ني مينڪي ڏي عطر لڳاڻ لاڳي- 39 شمعون جڪي پريو يسوع ري دعوت ڪي هتي، جڏي

اُئي ڏينو، تو آڀري من ۾ شوچڻ لاڳو ڪه، ”جي آي منڪ شاچيلي نڀي هيو هوونت، تو ايئي ني خبر پڙون تو، آي لڳائي جڪي ايئي ني هات

لڳايو هي، آي تو پاپڻ هي-“ 40 پريو يسوع اُئي ري من رو خيال اوڻڪي اُئي ني ڪهيو ڪه، ”شمعون، هُون ٿي ڪئين شٽائون هون-“ اُئي ٻئي

ڏيني ڪه، ”جي گرو جي، شٽائو-“

41 پڄي پريو يسوع كهيو ڪم، ”هيڪي امير منڪ را بي فرضي هتا. هيڪ پونج سئو چوندي ري شڪون رو فرضي هتو هان بيجو پنجاه چوندي ري شڪون رو. 42 او پئي قرض پاچو ديون جهڙا ڪونهي هتا. ايئي ري ڪري امير منڪ اوئون بيئون رو قرض معاف ڪري چوڙيو. همي تونرو ڪي خيال هي ڪه اوئون بيئون ۾ ڪن امير منڪ رو وديڪ ٿورائتو هوشي؟“ 43 شمعون بلتي ديني ڪم، ”مهاري خيال ۾ او جڪي رو وديڪ قرض معاف هويو.“ پريو يسوع اوئي ني كهيو ڪم، ”تي صحيح بلتي ديني هي.“ 44 پڄي پريو يسوع اوئي لگائي ديشا جوئي شمعون ني كهيو ڪم، ”ڪي تو اي لگائي ديڪي هي؟ جدي هون تاري گهري آيو، تو تي مهني پگ ڌوڻ ري شارو پوئي پي ڪونهي دينو، پڻ ايئي لگائي مهاري پگون ني آيري اشوون شون پنويا هان آيري بائون شون لوي آچا ڪينا. 45 تي مهني مينڪي پي ڪونهي ديني، پڻ جدي شون هون آيو هون ايئي لگائي مهارا پگ، مينڪي ديون بنا ڪونهي چوڙيا. 46 تي مهاري ماتي تي تيل ڪونهي لگايو، پڻ ايئي لگائي مهاري پگون تي عطر لگايو هي. 47 ايئي ري ڪري هون توي شاجي ڪونه هون ڪه ايئي لگائي اترو گهڻو پريم بتايو هي، ايئي ري ڪري ايئي را شجائي پاپ معاف هويا را. پڻ جڪي را توڙا پاپ معاف ڪيا جاوي هي، تو او توڙو پريم بتاوي هي.“ 48 پڄي پريو يسوع اوئي لگائي ني كهيو ڪم، ”بايي، تارا پاپ معاف هويا را.“ 49 اوڻ پينوڙا ميمون جڪو پريو يسوع پيڙا باتي کاوتا پڙيا من ۾ شوچڻ لاگا ڪم، ”اي ڪڻ هي جڪو پاپ معاف ڪري هي؟“ 50 پڻ پريو يسوع لگائي ني كهيو ڪم، ”تاري وشواس تني بجائي هي. ايشور تني شڪي راڪي.“

### شيوادار پينون

8<sup>1</sup> ڪئينڪه دنون شون پڄي پريو يسوع شهر شهر هان گون گون ۾ پرچار ڪرتو هان ايشور ري بادشاهي ري خوشي ري خبر سٿاوتو رهيو. اوئي را بارهي چيلا پي اوئي پيڙا هتا. 2 پريو يسوع پيڙي ڪئين وشواسي لگائي پي هتي، جڪون شون اوئي پوت ڪاڍيا هتا هان بيماريون شون شاجي ڪئي هتي. اوئون لگايون ۾ هيڪي رو نون مريم هتو، جڪي ني مريم مگدلين پي ڪيتا. پريو يسوع اوئي شون سات پوت ڪاڍيا هتا. 3 تموم گهڻي لگائي هتي جڪو آيري آيري دن مال شون پريو يسوع هان اوئي ري چيلون ري مدد ڪرتي. اوئون ۾ هيروديس ري منچي خورا ري لگائي يونانام سوسنا هان پيڄي تموم گهڻي لگائي پي هتي.

### بيچ چٽڻ آئي رو مثال

(متي 9:1-13؛ مرقس 9:1-4)

4 هيڪ دن پريو يسوع ڪيدي شهر شهر را تموم گهڻا منڪ آئي پيڙا هويا. تو پريو يسوع اوئون ني هيڪ مثال دي كهيو ڪم. 5 ”هيڪ هاڻي بيچ چٽڻ گيو. بيچ چٽي بلا ڪئين ڏوڻا مارگ تي ڪريا هان او لتاڙيجا هان پڪيون اوئون ني چڱي ليئا. 6 ڪئين ڏوڻا پترون آئي بني ۾ ڪريا جڪو اگتي ئي شوڪي گيا، ڪيونڪه اوئون ني پوئي ڪونهي مليو. 7 ڪئين ڏوڻا ڪانديرون ۾ ڪريا هان ڪانديرا پي اوئون پيڙا بدن لاگا، پڻ ڪانديرون اوئون

نِي بَدَنُ كُونَهِي دَينام 8 كَين دَوَنا پَلي بَني مَر كَريا هانَ او اَگام هَر هِيك بِيح مَر سَئو سَئو دَوَنا لاَگا. “آي مِثال سَئائِي بَرِيو يَسوع زور سون كَهيو كَم ”سَئو آلا سَمجَهِي را.“

### مِثالون مَر سَئاوَن رَو مَقصد

(مَتِي 17:13-10:4 مَرقس 12-10:4)

9 بَرِيو يَسوع رِي چيلون اَوَني سون پُوچو كَم ”اِيني مِثال رَو مَطلب كِي هِي؟“ 10 بَرِيو يَسوع كَهيو كَم ”ايشورَ تو تَوَني آپَري بادشاهي رِي پيدون رِي سَمجَه دَينِي هِي، پَن بِيحون نِي هُون مِثالون دَني اِيني رِي كَري سَئائون هون كَم او دَيكَتي پِي نِي دَيكِي هانَ سَئنا پِي نِي سَمجَهِي.“

### بِيح چَتن آئي مِثال رَو مَطلب

(مَتِي 23:13-18:13 مَرقس 20-13:4)

11 پَچي بَرِيو يَسوع كَهيو كَم ”اِيني مِثال مَر بِيح رَو مَطلب هِي، ايشورَ رِي باتون. 12 جَكو دَوَنا مارگ تِي كَريام او مارگ اهَڙي مَنكون آئي كار هِي جَكو ايشورَ رِي باتون سَئِي هِي، پَن شيطون آئي ايشورَ رِي باتون اَوَون رِي مَن سون كاڊِي لِي هِي، كِيَت اِئون نِي هوَوي كَم او ايشورَ تِي وشواس راكِي هانَ ايشورَ اَوَون نِي مُگَتي دَني. 13 او پَرون آئي بَني جِيَت دَوَنا كَريام، پَن اَوَون رِي پال كُونَهِي لاَگِي، او اهَڙا مَنك هِي جَكو ايشورَ رِي باتون خُوشي سون سَئِي هانَ مَني تو هِي، پَن تَوَڙي تَوَڙي وشواس راكِي هِي، پَن جَدِي كَو دُكيو تيم اَوِي هِي، تو او قَري جاوِي هِي. 14 جَكو دَوَنا كانديرون آئي بَني مَر كَريام او بَني اهَڙي مَنكون آئي كار هِي جَكو ايشورَ رِي باتون سَئِي تو هِي، پَن هَئِي هَئِي زندگِي رِي گِئِي، دَن هانَ عيش اَروم مَر قاشي جاوِي هِي. او اَوَون بَتون جَهَڙا هِي جَكون رَو قَل كَدِي پِي كُونَهِي پَكتو. 15 پَن جَكو دَوَنا پَلي بَني مَر كَريام، او پَلي بَني اهَڙي مَنكون آئي كار هِي، جَكو ايشورَ رِي باتون سَئِي هانَ پَچي اَوَون اَوَون رِي پَلي نَمُونِي هانَ سَچِي مَن سون سَنپالي راكِي هِي. او اَوَون بَتون جَهَڙا هِي جَكو آپَري تيم تِي قَل دَني هِي.“

### دَينِي رَو مِثال

(مَرقس 25-21:4)

16 پَچي بَرِيو يَسوع اَوَون نِي هِيك بِيجو مِثال سَئايو كَم ”كو پِي اهَڙو مَنك كُونَهِي جَكو دَينو بائي دِك هينا راكِي، جون اَوَني نِي مَوَچي هينا راكِي، پَن اَوَني نِي اهَڙي جَگها تِي راكِي هِي، جِيَت سون هَر هِيك رِي سارو اُجالو هوَوي. 17 كيونكَه كو پِي لِكِيوَڙي سَئِي اهَڙي كُونَهِي جَكو ظاهر نِي كِي جاوِي هانَ كو پِي اهَڙو پيد كُونَهِي، جَكي رِي خَبر نِي پَڙي هانَ او پَدَرو نِي كِئو جاوِي. 18 اِيني رِي كَري تِي مَهاري باتون دَهيون دَني سَئو، كيونكَه جَكي كَدي ايشورَ رِي باتون رِي سَمجَه هِي اَوَني نِي وَدِيك سَمجَه دَينِي جاشِي، پَن جَكي كَدي ايشورَ رِي باتون رِي سَمجَه كُونَهِي اَوَني سون او پِي كوشي جاشِي جَكي نِي او آپَري سَمجَهِي هِي.“

## پريو يسوع ري ما هان پائي

(متي 12:46-50؛ مرقس 3:31-35)

19 جڏي پريو يسوع منڪون شون باتون ڪرتو پڙيو، تو اوت اُوئي ري ما هان پائي اُوئي ڪڍي آيا، پڻ گهڻا منڪ هونڙ ري ڪري اُوئي توڻي پڻي ڪونهي شگهيا. 20 ڪي آئي پريو يسوع ني ڪهيو ڪم، ”تاري ما هان تارا پائي تون شون ملڻ آيا هي هان او باهر آيا هي.“ 21 پريو يسوع اوتون ني ڪهيو ڪم، ”مهاري ما هان مهارا پائي او هي، جڪو ايشور ري باتون سُڻي هان اوتون تي بي هي.“

## پريو يسوع رو طوفون ني بند ڪرڻ

(متي 8:23-27؛ مرقس 4:35-41)

22 هيڪ ڏن پريو يسوع آڀري چيلون ني ڪهيو ڪم، ”هالو تو آبي ڏنڊ ري پيلوڙي پاشي هالون.“ ايني تي پريو يسوع هان اُوئي را چيلا پيڙي ۾ چڙهي بئير هويا. 23 جڏي او پيڙي ۾ جاوتا پڙيا، تو پريو يسوع سُڻي رهيو. تو اُوئي نيم ڏنڊ ۾ اوچتو موتو طوفون آيو. پيڙي پوڻي شون پريجنڻ لاڳي هان او ٻوڏڻ آلا هتا. 24 پيڇي او پريو يسوع ڪڍي آيا هان اُوئي ني جگائي ڪهيو ڪم، ”گرو جي، مهني شجائي ٻوڏڻ آلا هون.“ ايني تي پريو يسوع اٺيو، طوفون هان پوڻي ني ڌڙڪو ڏينوم، تو او يڪدم اُپي رهيا هان ناپر هونئي گئي. 25 پيڇي پريو يسوع چيلون ني ڪهيو ڪم، ”تونرو وشواس ڪيٽ هي؟“ چيلا بيناجا هان حيرون هونئي آيت ۾ ڪيوڻ لاڳا ڪم، ”آي ڪن هي؟ جڪو طوفون هان پوڻي ني حڪم ڏي هي هان او پي ايني ري مٽي هي.“

## پريو يسوع رو منڪ شون پوت ڪاڍڻ

(متي 8:28-34؛ مرقس 5:1-20)

26 پيڇي پريو يسوع هان اُوئي را چيلا پيڙي شون گراسينيون ري علائقي ۾ پڳام، جڪو گليل ڏنڊ ري پيلوڙي پاشي هي. 27 جڏي پريو يسوع ڪپ تي اُتريو، تو اوت شهر رو هيڪ اهڙو منڪ آيو جڪي ني پوت لاڳوڙا هتا. او منڪ تموم گهڻي ڏنون شون نڪو گاپا پيرتو نڪو گهري ريتو، پڻ مُڪومون ۾ ريتو. 28 جڏي اُوئي پريو يسوع ني ڏينوم، تو رڙ ڪري اُوئي ري بگون ۾ ڪريو هان زور شون ڪهيو ڪم، ”اي يسوع، پريميشور را ڏيڪرام تارو مهني شون ڪهڙو واسطو؟ هون ٿني منت ڪرون هون ڪم مهني ايندا ني ڏي.“ 29 اُوئي ايني ري ڪري پريو يسوع ني ڪهيو ڪيونڪ پريو يسوع اُوئي پوت ني نڪري جاوڻ رو حڪم ڏينو هتو. پوت اُوئي منڪ ني گهڙي گهڙي جهالتو. ايني ري ڪري منڪ اُوئي ني شونڪڙون هان ڏنبا پيڙيون شون ٻونڌي ڪاڻو ڪرنام، پڻ او شونڪڙون توڙي چوڙتو هان پوت اُوئي ني رڻ پت ۾ گيشلي جاوتو.

30 پريو يسوع اُوئي شون پوڇو ڪم، ”تارو نون ڪي هي؟“ اُوئي بلتي ڏيني ڪم، ”لشڪر.“ ڪيونڪ اُوئي ني تموم گهڻا پوت لاڳوڙا هتا. 31 پوت پريو يسوع ني منت ڪري ڪهيو ڪم، ”مهوني سزا ري ڪڏي ۾ جاوڻ رو حڪم ني ڏي، 32 پڻ مهوني اوتون شوڙون ري ڏڻ ۾ جاوڻ ڏي.“ اوت

جبل تي شوٿرون رو موتو ڏٺڻ چرتو پڙيوم، پرڻو يسوع اينوج ڪيئو. <sup>33</sup> پڇي پوت اوتئي منڪ شون نڪري شوٿرون ري ڏٺڻ ۾ گيا. او شجائي شوٿر جبل شون ناشتا هيٺا جائي ڏنڊ ۾ ڪريا هان ٻوڏي مونا.

<sup>34</sup> آي واقعيو جوئي ڌراڙ شهر ڏينسا نانا هان آشي پاشي ري منڪون ني جائي آي بات سٺائي. <sup>35</sup> پڇي جڪون سٺيو او پرڻو يسوع ڪيڏي آيا. جڏي اوئون ڏينو ڪه جڪي ۾ پوت هتا، اوئي را گاپا پيريوڙا هان شاجو شورو پرڻو يسوع ري پگون ۾ پينو هي، تو او پيٺاڃا. <sup>36</sup> جڪون آي ڏينو اوئون پيجون ني پي سٺايو ڪه ڪيڪر پوت لاگوڙو منڪ شاجو هيو هي. <sup>37</sup> گراسينيون علائقي را آشي پاشي آلا شجائي منڪ تموم گهٺا پيٺاڃا. ايئي ري ڪري او پرڻو يسوع ني منٽ ڪري ڪيئون لاگا ڪه، ”تو مهوري علائقي شون ٻوڙو جا.“ پڇي پرڻو يسوع پيڙي ۾ چڙهي پاڇو جاوڻ لاگو. <sup>38</sup> پڻ جڪي شون پوت نڪريا هتا، اوئي پرڻو يسوع ني منٽ ڪي ڪه، ”گرو جي، مهني پي آب پيڙو لي هالو.“ پڻ پرڻو يسوع اوئي ني ڪهيو ڪه، <sup>39</sup> ”تو پاڇو آڀري گهري جا هان منڪون ني سٺا ڪه، ايشور تي شون ڪهڙي پلائي ڪي هي.“ پڇي او منڪ پاڇو گيو هان جائي شجي شهر ۾ آي بات مشهور ڪي ڪه، ”پرڻو يسوع مهني شون ڪهڙي پلائي ڪي هي.“

### يائير ري ڏيڪري هان بيمار لڳائي

(متي 9:18-26؛ مرقس 5:21-43)

<sup>40</sup> جڏي پرڻو يسوع پاڇو آيو، تو منڪ اوئي ني جوئي تموم گهٺا خوش هويام، ڪيونڪه شجائي منڪ پرڻو يسوع رو مارگ جوتا پڙيا. <sup>41</sup> پڇي يائير نون رو هيڪ منڪ آيو جڪو پگتي گهر رو سردار هتو. او پرڻو يسوع ري پگون ۾ ڪريو هان آڀري گهري هالڻ ري منٽ ڪي. <sup>42</sup> ڪيونڪه اوئي ري هيڪج ڏيڪري هتي جڪي ري عمر ٻارهي شال هتي هان او مرڻ تي هتي.

جڏي پرڻو يسوع يائير ري گهري جاوڻ لاگو، تو اوئي ري چوڌاري منڪون رو تموم گهٺو رش هتو. <sup>43</sup> اوٺ رش ۾ هيڪ بيمار لڳائي هتي، جڪي ني ٻارهون شالون شون زناني بيماري هتي هان او شاجي ڪونهي هوتي. اوئي آڀرا شجائي رپيا ڊاڪٽرون شون علاج ڪراوڻ ۾ خرچ ڪينام، پڻ ڪي پي اوئي ني شاجي ڪونهي ڪي. <sup>44</sup> او لڳائي پرڻو يسوع ري لاري شون آئي هان اوئي ري گاپون ري پلي ني هات لڳايو، تو او يڪدم شاجي هوئي گئي. <sup>45</sup> پرڻو يسوع ڪهيو ڪه، ”مهني ڪي هات لڳايو هي؟“ جڏي شجون انڪار ڪيئو، تو بطرس ڪهيو ڪه، ”اي پرڻو، تموم گهٺا منڪ تونري چوڌاري ڦريوڙا هي هان او تون مائي ڪري پڙيا.“ <sup>46</sup> پڻ پرڻو يسوع ڪهيو ڪه، ”نام ضرور مهني ڪي هات لڳايو هي، ڪيونڪه مهني خبر هي ڪه مهني شون قدرت نڪري هي.“ <sup>47</sup> جڏي لڳائي ڏينو ڪه همي هون لڪي ڪونهي شگهتي، تو پيٺاڃي پرڻو يسوع ري پگون ۾ ڪري هان شجون ري روبرو پرڻو يسوع ني سٺايو ڪه اوئي ڪيئون پرڻو يسوع ني هات لڳايو هان ڪيڪر يڪدم شاجي هوئي هي. <sup>48</sup> پرڻو يسوع ڪهيو ڪه، ”ڏيڪري جام ٿاري وشواس ٿني شاجي ڪي هي، ايشور ٿني شڪي راڪي.“

49 پرڻو يسوع آجون بولتو ئي پڙيوم، تو پگتي گهر زي سردار يائير زي گهرون شون ڪو آيو هان شُٿايو ڪم، ”تاري ڏيڪري مئي ري، همي گرو جي ني تڪليف ني ڏي.“ 50 پرڻو يسوع آي شُٿي يائير ني ڪهيو ڪم، ”گڻي ني ڪم، رگو وشواس راکم، تو او بچي جاشي.“

51 جڏي او يائير زي گهري پڳام، تو پرڻو يسوع پطرس، يوحنا، يعقوب هان چوڪري ري ما باپ شون ٽال بيجو ڪيني پي آپ پڙو گهر ۾ اوڻ ڪونهي ڏينو. 52 شجائي منڪ چوڪري ري شارو روتا پڙيام، پڻ پرڻو يسوع اوئون ني ڪهيو ڪم، ”ني روئو، ڪيونڪ او مئي ڪونهي، پڻ اونگاجوڙي هي.“

53 ايني تي منڪ پرڻو يسوع تي هسن لاگام، ڪيونڪ اوئون ني خبر هتي ڪه او مئي ري. 54 پرڻو يسوع چوڪري رو هات جهالي ڪهيو ڪم، ”ڏيڪري، اُٺ.“ 55 تو چوڪري جيتي هوئي اُٺي. پچي پرڻو يسوع حڪم ڏينو ڪم، ”چوڪري ني ڪئين ڪاوڻ ري شارو ڏينو.“ 56 ايني پرچي تي چوڪري را ما باپ تموم گهڻا حيرون هويا. پچي پرڻو يسوع اوئون ني هوشيار ڪري ڪهيو ڪم، ”ايت جڪو ڪئين هويو هي، او ڪيني پي ني شُٿايا.“

### پرڻو يسوع رو ٻارهي سنت ميلڻ

(متي 15:10-15؛ مرقس 7:6-13)

9<sup>1</sup> پرڻو يسوع آري ٻارهون چيلون ني اٿايا هان اوئون ني شجائي پوت ڪاڍڻ هان بيمارون ني شاجا ڪرڻ ري طاقت هان اختياري ڏيني.

2<sup>2</sup> پچي اوئي اوئون ني ايشور ري بادشاهي رو پرچار ڪرڻ هان بيمارون ني شاجا ڪرڻ ري شارو ميليا 3 هان اوئون ني ڪهيو ڪم، ”مارگ ري شارو ڪئين ني ليام، ني گيڏي، ني ٿيلوم، ني ٻائي، ني پشا هان ني بي ڪميش. 4 تي جڪي گهر ۾ جائوم، تو رات اوڻج رهيا هان اوئي گهر شون بيجي شهر ڏيشا جايا. 5 جڪي شهر ۾ منڪ ٿوري ني شُٿي، تو ٿي او شهر چوڙي ڏيا هان جاوتي بلا آري پگون ري متي چنڊي چوڙيا ڪه اوئون ري خلاف گواهي ري نشوني هووي.“ 6 پچي چيلا بئير هويا هان گون گون ۾ ايشور ري بادشاهي رو پرچار ڪرتا رهيا هان جيت ڪيت بيمارون ني شاجا ڪرتا رهيا.

### هيروديس بادشاه ري پريشوني

(متي 12:14-14؛ مرقس 6:14-29)

7 جڏي گليل صوبي ري چوڻي حصي ري گورنر هيروديس انتپاس ني پرڻو يسوع ري ايئون باتون ري خبر پڙي، تو او تموم گهڻو پريشون هويو، ڪيونڪ ڪئينڪ منڪ ڪيتا ڪم، ”يوحنا پويتر سنون ڏيوڻ آو موٽوڙو شون جيتو هوئي اُٺيو هي.“ 8 ڪئينڪ منڪ آي پي ڪيتا ڪم، ”ايلياھ ني پڙي ظاهر هويو هي.“ ڪئينڪ منڪ ايئون پي ڪيتا ڪم، ”پروٽي زموني رو ڪو ني جيتو هويو هي.“ 9 پڻ هيروديس انتپاس ڪهيو ڪم، ”يوحنا ري مهِي آپ نَش بڊائي هتي. پچي آي ڪڻ هي جڪي ري باري ۾ هون اهڙي باتون شئون پڙيو؟“ تو او پرڻو يسوع شون ملڻ ري ڪوشش ڪرتو رهيو.

## پونج هزار منكون نِي ٻاٽي ڪلاوڻ

(متي 14:13-21؛ مرقس 6:30-44؛ يوحنا 6:1-14)

<sup>10</sup> پڇي ميليوڙا سنت پاڇا آيا هانَ جڪو ڪوم اُونون ڪيئو هتو، او پرڻو يسوع نِي سُٿايو. پڇي پرڻو يسوع رُگو اُونون نِي آپ پيڙا لي بيت صيدا شهر ڏيما گيو. <sup>11</sup> پڻ جڏي منڪون نِي ايني بات ري خبر پڙي، تو پڇي او پي تولون ۾ پرڻو يسوع لاري بيوڻ لاگا. پرڻو يسوع اُونون ري اوڻ شون خوش هتو هانَ اُونون نِي ايشور ري بادشاهي ري باتون سُٿاوڻ لاگو. اوٽ جڪو بيمار هتا اُونون شجون نِي پرڻو يسوع شاجا ڪينا. <sup>12</sup> جڏي شام هوڻن آئي هتي، تو ٻارهون چيلون آئي پرڻو يسوع نِي ڪهيو ڪم، ”ايئون منڪون نِي ميلوم تو او آشي پاشي ري گون هانَ بستيون ۾ جائي رات ري هانَ آڀري ساڙو ڪاوڻ پيئڻ رو بندوبست ڪري، ڪيونڪه آيون ايت رڻ پَت ۾ هون.“ <sup>13</sup> پڻ پرڻو يسوع چيلون نِي ڪهيو ڪم، ”تي آپ ايئون نِي ڪاوڻ ري ساڙو ڪئين ڏيئو.“ چيلون بلٽي ڏيئي ڪم، ”مهون ڪيڏي پونج ٻاٽي هانَ بي مڇي هي، ايني شون نال بيجو ڪئين ڪونهي. ڪي مهني جائي شجون ري ساڙو ٻاٽي مول لي ائون؟“ <sup>14</sup> اُونون آي ايني ري ڪري ڪهيو، ڪيونڪه اوٽ رُگو آدمي اندازن پونج هزار هتا. پڇي پرڻو يسوع آڀري چيلون نِي ڪهيو ڪم، ”ايئون منڪون نِي پنجاه پنجاه ري تولون ۾ پيشاڙو.“ <sup>15</sup> چيلون ايئوج ڪيئو هانَ شجي منڪون نِي پنجاه پنجاه ري تولون ۾ پيشاڙيا. <sup>16</sup> پڇي پرڻو يسوع پونج ٻاٽي هانَ بي مڇي لي آڪاش ڏيما جويو هانَ برڪت ڏيئي. پڇي پرڻو يسوع ٻاٽي هانَ مڇي پونگي چيلون نِي ڏيئي ڪم او منڪون نِي ڪاوڻ ري ساڙو ڏي. <sup>17</sup> شجي منڪون ڏيو ڪري ٻاٽي ڪاڏي هانَ ڪاوڻ شون پڇي، چيلون بچوڙي تُڪڙون را ٻارهي توڪرا پري ڪيا.

## پطرس ري پرڻو يسوع ري ٻاري ۾ گواهي

(متي 16:13-19؛ مرقس 8:27-29)

<sup>18</sup> هيڪ گهمرو جڏي پرڻو يسوع هيڪلو پرائنا ڪرتو پڙيو، تو اوني را چيلا اوني پيڙا هتا. اوني اُونون شون پوچو ڪم، ”منڪ مهاري ٻاري ۾ ڪي ڪي هي ڪم هون ڪڻ هون؟“ <sup>19</sup> چيلون بلٽي ڏيئي ڪم، ”ڪئينڪه منڪ ڪي هي ڪم تو پويتر سنون ڏيوڻ آئي يوحنا ري رُوب ۾ آيوڙو هي، ڪئينڪه منڪ ڪي هي ڪم تو ايلياھ نبي هي جڪو اوڻ آڻو هتو هانَ ڪئين ڪي هي ڪم پروڻي زموني رو ڪو نبي جيتو هيو هي.“ <sup>20</sup> پرڻو يسوع اُونون شون پوچو ڪم، ”پڻ ٿي مهاري ٻاري ۾ ڪي ڪو هو ڪم هون ڪڻ هون؟“ ايني تي پطرس بلٽي ڏيئي ڪم، ”تو ايشور رو چونديوڙو، مسيح هي.“ <sup>21</sup> پڇي پرڻو يسوع آڀري چيلون نِي شمجھائي حڪم ڏينو ڪم، ”آي بات ڪيني پي ني سُٿايا.“

## پرڻو يسوع ري آڀري موت ري اگڪٽي

(متي 16:20-28؛ مرقس 8:30-9:1)

<sup>22</sup> پرڻو يسوع آي پي ڪهيو ڪم، ”آي ضرور هي ڪم هون مُنش پتر تموم گهٽا ڏڪ ڏيڪون. يهودي اگروڻ، ايشور را موتا پوجاري هانَ ڌرمي گرو مهني نُڪراوي. او مهني مارشي هانَ تيجي ڏن هون پڙي موٽوڙون شون جيتو هوئي جائين.“

## پريو يسوع رو چيلو هوئن رو شرط

(متي 39:10، 28-24:16؛ مرقس 38-34:8؛ لُوقا 33:17؛ يوحنا 25:12)

<sup>23</sup> پچي پريو يسوع شجون ني كهيو كه ”جي ڪيري مرضي هي كه مهاري لاري ني، تو او آيري مرضي چوڙي هان مهاري شارو هروز آيري شولي ڪئي يعني آيري جان ڏيون ري شارو تيار ري، تو پچي او مهاري لاري آئي شگهي هي، <sup>24</sup> ڪيونڪه جڪو آيري آي حياتي بچاشي، تو او اوني امر جيون ني گماشي، پڻ جڪو مهاري شارو آيري آي حياتي گماشي، تو اوني ني امر جيون ملشي. <sup>25</sup> جي ڪن شجي دنيا پيڙي ڪري، پڻ آيري حياتي گماوي، تو اوني ني ايني رو ڪهڙو فاندو؟ <sup>26</sup> ڪيونڪه جڪو پي مهني شون جون مهاري باتون شون شرماشي، تو جڏي هون منش پڻ آيري، آيري پتا ري هان پويتر فريشتون پيڙو موتي مهما شون آئين، تو اوني ڏن هون پي اوني شون شرمائين. <sup>27</sup> هون ٿوني شاجي ڪونه هون ڪه ڪينڪه منڪ جڪو ايت ايا هي، او آيري زندگي ۾ ايشور ري بادشاهي ني جوشي ري.“

## پريو يسوع رو چمتڪاري رُوپ

(متي 8-1:17؛ مرقس 8-2:9)

<sup>28</sup> ايني باتون شون آت ڏن پچي پريو يسوع پطرس، يوحنا هان يعقوب ني لي هيڪي جبل تي پرائتا ڪرڻ گيو. <sup>29</sup> جڏي او پرائتا ڪرتو پڙيو، تو اوني رو رُوپ بدليجي گيو هان اوني را گايا آچا هوئي چمڪڻ لاگا. <sup>30</sup> اوٽ پي منڪ پريو يسوع شون باتون ڪرڻ لاگا. جڪو موسي هان ايلياھ نبي هئا. <sup>31</sup> اوتون را گايا پي آچا هان چمڪيلا هئا. او پريو يسوع ري موت ري بازي ۾ باتون ڪرتا پڙيا، جڪو يروشلم شهر ۾ هوئن آئي هتي. <sup>32</sup> پڻ اوني تيم پطرس هان اوني را ساٿي اونگ ۾ هئا. جڏي او جاگيا، تو اوتون پريو يسوع ري مهما ڏيني هان اوتون بيتون منڪون ني پريو يسوع پيڙا ايوڙا ڏينا. <sup>33</sup> جڏي موسي هان ايلياھ پريو يسوع شون جاوڻ لاگا، تو پطرس پريو يسوع ني كهيو كه، ”گرو جي، ڪتري شني بات هي كه مهني ايت هون. ڪيون ني مهني ايت تين تنبو ڪوڙون، هيڪ ٿونري شارو، هيڪ موسي ري شارو هان هيڪ ايلياھ ري شارو.“ حقيقت ۾ پطرس ني خبر ڪونهي هتي كه او ڪي ڪي پڙيو. <sup>34</sup> او ٻولنو ئي پڙيو، تو باڏل آئي اوتون ماتي چان ڪي. جڏي باڏل اوني ني گهيريوم، تو چيلا پيئاجڻ لاگا. <sup>35</sup> پچي باڏل شون آواز آيو كه، ”آي مهارو ڏيڪرو هي جڪي ني مهني چونديو هي. ئي ايني ري باتون ذهيون ڏي شئو.“ <sup>36</sup> آي آواز شئن شون پچي اوٽ رگو پريو يسوع هيڪلو ڏيڪيچڻ ۾ آيو. پڻ چيلا ايني بات تي مات هئا هان جڪو ڪئين اوتون ڏينو اوتون ڏنون ۾ اوتون ڪيني پي ڪونهي شئايو.

## پريو يسوع رو چوڪري شون پوت ڪاڍڻ

(متي 18-14:17؛ مرقس 27-14:9)

<sup>37</sup> پيچي ڏن ايتون هويو كه جڏي پريو يسوع هان اوني را چيلا جبل شون هينا اترتا پڙيا، تو منڪون رو موتو تولو پريو يسوع شون ملڻ ري شارو ايو هتو. <sup>38</sup> تولي شون هيڪي منڪ رڙ ڪري كهيو كه، ”گرو جي، هون ٿوني منٽ ڪرون هون ڪه مهاري ڏيڪري ني آئي جوئو. او مهارو هيڪج

ڏيکرو هي. <sup>39</sup> هڪ ڀوت آئي اوهي نِي جهالي هي هان او اوچتو رڙي ڪري هي. او ڀوت اوهي نِي ايترو تو مروڙي هي ڪه چوڪري ري موڏي شون گوگهي بي هي. ڀوت اوهي نِي تموم گهڙي تڪليف ڏي پڇي نڪري جاوي هي. <sup>40</sup> مهڙي تاري چيلون نِي منٽ ڪي ڪه. 'ايهي شون ڀوت ڪاڍو. ڀٽ او ڪونهي ڪاڍي شگهيا.'

<sup>41</sup> ايهي تي پريو يسوع ڪهيو ڪه، "تي بنا وشواس آلا هان سڌي مارگ شون پتڪيوڙا هو. هون ڪتري توتي تون پيڙو رئين هان تونري باتون سڻتو رئين؟" پڇي پريو يسوع اوهي منڪ نِي ڪهيو ڪه، "آپري ڏيڪري نِي اينا لي آ." <sup>42</sup> جڏي چوڪرو پريو يسوع ڏيسا آتو پڙيوم، تو ڀوت اوهي نِي هيئا نوڪيو هان تموم گهڙو مروڙيو. ڀٽ پريو يسوع اوهي ڀوت نِي نڪرڻ رو حڪم ڏينوم، تو او ڀوت اوهي چوڪري شون نڪري گيو. پريو يسوع اوهي چوڪري نِي اوهي ري باب ري حوالي ڪيو. <sup>43</sup> شجائي منڪ ايشور ري ايهي موتي قدرت نِي جوئي تموم گهڙا حيرون هويا.

### پريو يسوع ري آپري موت ري اگڪتي

(متي 17:22-23؛ مرقس 9:30-32)

جڏي شجائي منڪ پريو يسوع ري پرچون تي حيرون هتا، تو پريو يسوع آپري چيلون نِي ڪهيو ڪه، <sup>44</sup> "مهاري اي باتون ڏهيون ڏي سڻو ڪه هون منش پتر منڪون ري حوالي ڪيو جائين." <sup>45</sup> ڀٽ چيلا اي بات ڪونهي شمعها ڪيونڪه اي خاص پيد هتو جڪو اوتون شون لڪايوڙو هتو ڪه او شمعهي ني شگهي. چيلا پريو يسوع شون او پيد بي پر پوچي پي ڪونهي شگهيا.

### شجون شون موتو ڪڻ هي؟

(متي 18:1-5؛ مرقس 9:33-37)

<sup>46</sup> پڇي چيلا آبت پر اي بحث ڪرڻ لاگا ڪه، "آپون پر شجون شون موتو ڪڻ هي؟" <sup>47</sup> پريو يسوع اوتون ري من ري بات شمعهي گيو هان اوهي هيڪي ڀال نِي اٿائي آب ڪيڍي اڀايو. <sup>48</sup> اوهي آپري چيلون نِي ڪهيو ڪه، "جڪو مهاري نون تي اهڙي ڀال نِي قبول ڪري هي، تو شمعهو ڪه او مهني قبول ڪري هي هان جڪو مهني قبول ڪري هي، تو شمعهو ڪه او ايشور نِي قبول ڪري هي، جڪي مهني ميلي هي. ڪيونڪه تون پر جڪو شجون شون نيو هي، اوج ايشور ري نظر پر شجون شون موتو هي." <sup>49</sup>

### جڪو خلاف ڪونهي او پيڙو هي

(مرقس 9:38-40)

<sup>49</sup> پڇي يوحنا ڪهيو ڪه، "گرو جي، مهون هيڪي منڪ نِي تونري نون شون ڀوت ڪاڍتي ڏينوم، تو مهون اوهي نِي پاليوم، ڪيونڪه او مهون آئي ڪار تون پيڙو ڪونهي هي." <sup>50</sup> ايهي تي پريو يسوع ڪهيو ڪه، "اوهي نِي پالو ني، ڪيونڪه جڪو تونري خلاف ڪونهي، او تون پيڙو هي."

## پريو يسوع ني سامري منكون رو ني منن

51 جڏي پريو يسوع را آڪاش ڏيشا جاوڻ را ڏن نيڙا آيا، تو اُئي يروشلم شهر ڏيشا جاوڻ رو پڪو ارادو ڪيو. 52 اُئي آپ شون پيل ڪئينڪه منڪ سامريا علائقي ري هيڪي گون ۾ مليا ڪه او اوت جائي پريو يسوع ري شارو ريوڻ ري تباري ڪري. 53 پڻ اُئي گون آئون پريو يسوع ني قبول ڪونهي ڪيو، ڪيونڪه پريو يسوع يروشلم ڏيشا جاوتو پڙيو. 54 اي جوئي پريو يسوع ري چيلون، يعقوب هان يوحنا ڪهيو ڪه، ”اي پريو، جي تونري مرضي هووي، تو مهني ايشور ني منن ڪرون ڪه او آڪاش شون باشدي برشاوي هان ايئون ني ختم ڪري.“ 55 پڻ پريو يسوع اُئون ڏيشا پاچل قوري جويو هان اُئون ني دڙڪو ڏينو. 56 پڇي او پڇي گون ڏيشا بئير هويا.

## پريو يسوع رو شاجو چيلو

(مرقس 8: 19-22)

57 جڏي پريو يسوع هان اُئي را چيلا آيو مارگ ڏي جاوتا پڙيا، تو هيڪي منڪ آئي پريو يسوع ني ڪهيو ڪه، ”تي جيت پي جاشو هون تونرو چيلو هوئي تون لاري بيتو رئين.“ 58 پريو يسوع اُئي ني ڪهيو ڪه، ”لوڪيون ري ڏرون هووي هي هان پڪيون را آلا، پڻ مهني منن پڙ ري شارو ماڻو لڪاوڻ ري پي جگها ڪونهي هي.“

59 پڇي پريو يسوع هيڪي پڇي منڪ ني ڪهيو ڪه، ”مهرو چيلو هوئي مهاري لاري ني.“ پڻ اُئي بلتي ڏيني ڪه، ”اي پريو، مهني موڪل ڏيو، تو هون پيل جائي آڀري ابا ري شيوا ڪرون جڪو مرڻ آو هي. اُئي ني متي حوالي ڪرڻ شون پڇي، هون تونرو چيلو هوئي تون لاري بيتو رئين.“ 60 پڻ پريو يسوع ڪهيو ڪه، ”مڙدا آڀري مڙدون ري گتتي ڪري. پڻ تو جا هان منڪون ۾ ايشور ري بادشاهي رو پرچار ڪر.“

61 هيڪي پڇي منڪ پريو يسوع ني ڪهيو ڪه، ”اي پريو، هون تونرو چيلو هوئي تون لاري بئين، پڻ مهني موڪل ڏيو، تو جائي آڀري گهر آئون شون موڪلائي آئون.“ 62 ايئي تي پريو يسوع اُئي ني ڪهيو ڪه، ”جڪو آڀرو هات هل تي راڪي لاري جووي هي، تو او ايشور ري بادشاهي ۾ اوڻ ري لائق ڪونهي.“

## پريو يسوع رو ٻاهتر چيلون ني ميلن

1 پڇي پريو يسوع آڀري چيلون ۾ ٻاهتر جڻا چونديا جڪون ني بي بي ڪري آپ شون پيل اُئون شهرن هان گون ۾ مليا، جيت آڀني جاوڻو هتو. 2 اُئون چيلون ني ميلن ري نيم پريو يسوع اي بات سمجھائي ڪه شاستر رو پرچار ڪرڻ آلا توڙيا هي. پڇي پريو يسوع اُئون ني ڪهيو ڪه، ”پوک تو گهڻي هي، پڻ مڙور توڙا هي. ايئي ري ڪري پوک ري مالڪ ني منن ڪرو ڪه پوک ري شارو بيجا مڙور ميلي. 3 تي جائو، هون تونني اي پي شٽائون هون ڪه تي رڍون آئي ڪار هو هان هون تونني بگڙون ۾ ميلون هون. 4 تي آپ پيڙو ڪئين ني لي جايا، ني جهوڻي، ني ٿيلو، ني بيجا جڻا هان ني مارگ ۾ ڪي شون خبرچار پوڇڻ ۾ نيم گمايا. 5 جڪي گهر ۾ جائو، تو پيل اُئي گهر ري خيريت ري

10

شارو پرائتا ڪريا. <sup>6</sup> جي اُوئي گهر ۾ ڪو اهڙو منڪ هويو، تو ايشور رو سُڪ اُوئي ني ملشي. جي ني هويو، تو ايشور رو سُڪ تون ڪڍي پاڇو آشي. <sup>7</sup> جڪو توني خوشي شون اون ڏي، اُوئي ري گهري رهيا. اُوئي گهر ۾ ڪاوڻ پيئڻ ري شارو جڪو ڪئين ملي تي او ڪايا پيئام ڪيونڪه مزور آپري مزوري رو حقدار هي. ٿي ميمون هويي گهر گهر ني جايا.

<sup>8</sup> جي ٿي ڪي شهر ۾ جائو هان اوٿ را منڪ توني آپ ڪڍي ريوڻ ڏي، تو او جڪو ڪئين توني ڪاوڻ ري شارو ڏي، او ڪايا. <sup>9</sup> جي اوٿ ڪو بيمار هويو، تو اُوئي ني شاجا ڪريا. اوٿ ري منڪون ني سُٿايا ڪم، 'ايشور ري بادشاهي تونري نيڙي آئي ري.' <sup>10</sup> پڻ جي ٿي ڪي شهر ۾ جائو هان اوٿ را منڪ توني آپ ڪڍي ريوڻ ني ڏي، تو اوئون ري شهر ۾ جائي ڪهيا ڪم، <sup>11</sup> 'مهني تونري شهر ري متي جڪو مهوري پگون ني لاڳي هي، تونري شومهو چنڊون هون، پڻ ٿي اترو ياد راکيا ڪم ايشور ري بادشاهي نيڙي آئي ري.' <sup>12</sup> هون توني ڪونه هون ڪه اُوئي ڏن جڏي ايشور ڏنيا رو انصاف ڪرشي، تو اُوئي شهر ني سدوم شهر شون پي وڌيڪ سزا ملشي." "

### توبهون ني ڪرڻ آتون تي ڏک

(متي 11:20-24)

<sup>13</sup> پڇي پريو يسوع ڪهيو ڪم، "اي خرازين هان بيت صيدا شهر ري منڪون، ڏک هي تون تي، ڪيونڪه جڪو موتا موتا پرچا تون ۾ ڪيا گيا هي، جي او صور هان صيدا شهر ۾ ڪيا جائون تو، تو اوٿ را منڪ ڪتا اوڍي هان ماڻي ۾ راک گهاتي اونيج تيم توبهون ڪرون تو. <sup>14</sup> پڻ جڏي ايشور ڏنيا رو انصاف ڪرشي، تو اُوئي ڏن توني صور شهر هان صيدا شهر شون پي وڌيڪ سزا ملشي. <sup>15</sup> اي ڪفرنحوم شهر ڪي تو سمجهي هي ڪه تو آڪاش تي ڪٿيو جائي. نام پڻ تو نرگ ۾ نوڪيو جائي." <sup>16</sup> پڇي پريو يسوع اونون ني ڪهيو ڪم، "جڪو تونري سُٽي هي، سمجهو ڪه او مهاري بات سُٽي هي هان جڪو تونري بات ڪونهي سُٽوم تو او مهاري بات پي ڪونهي منتو هان جڪو مهاري بات ڪونهي منتو، تو او ايشور ني پي ڪونهي منتو، جڪي مهني ميليو هي." "

### باهتر چيلون رو پاڇو اوڻ

<sup>17</sup> پڇي او باهتر چيلا پرچار رو ڪوم پورو ڪري خوش هوني پاڇا آيا هان پريو يسوع ني ڪيوڻ لاڳا ڪم، "اي پريو، تونري نون شون پوت پي مهورو حڪم متي هي." <sup>18</sup> پريو يسوع اونون ني ڪهيو ڪم، "مهني شيطون ني ايئون ڪرتو ڏينو هي، جون آڪاش شون بجلي ڪري هي. <sup>19</sup> مهني توني ايئون پوت ڪاڍڻ رو اختيار ڏينو هي، جهڙي نموني ٿي ناگ هان پڇو پگون هينا لتاڙي مارو هو. ٿي آپري دشمن شيطون شون ڪتي جاشو. توني ڪو پي شئي نقصون ڪونهي ڏي. <sup>20</sup> پڻ ٿي ايئي بات ۾ خوش ني هويا ڪه پوت تونرو حڪم متي هي، پڻ ايئي بات ۾ خوش هويا ڪه ايشور توني شرگ ۾ جاوڻ رو حق ڏينو هي." "

## پريو يسوع رو آپري چيلون شون خوش هوئن

(متي 11:25-27، 13:16-17)

<sup>21</sup> اُوئي تيم پريو يسوع پويتر آتما ري خوشي شون پريجي ايشور ني كهيو كم، ”اي پنام آكاش هان درتي را مالكم، هون تارو شُكر كرون هون كه ئي آي باتون ذاهون هان سمجهدار منكون شون لكائي، پڻ ابوجه منكون تي ظاهر كئي. هاوي ابا، ئي آي شجو آپري مرضي هان خوشي شون كيئو هي.“

<sup>22</sup> پچي پريو يسوع منكون ني كهيو كم، ”مهاري پنام مهني هر هيڪ شئي ري اختياري ذيني هي. پنا شون تال كيني پي خبر كونهي كه ذيكرو كڻ هي هان ذيكري شون تال كيني پي خبر كونهي كه پنا كڻ هي. ايشور ني رگو اوج منڪ اولكي هي، جڪي ني ذيكرو ظاهر كري.“ <sup>23</sup> پچي پريو يسوع چيلون ذيشا پاچل قوري، اُونون ني آپري مونه كهيو كم، ”ذن هي، ئي جكو آي شجو كئين ذيكو پڙيا. <sup>24</sup> كيونكه هون توني شاجي كونه هون كه تموم گهڻا نبي هان بادشاهم ايني اميد ۾ هتا كه جكو كئين ئي ذيكو پڙيا، او جووي، پڻ او جوئي كونهي شگهيا هان جكو باتون ئي شُڻو پڙيا او شُڻي، پڻ او شُڻي كونهي شگهيا.“

## نيڪ منڪ سامري رو مثال

<sup>25</sup> هيڪ دن هيڪ درمي گرو آيو هان پريو يسوع رو آزموتو ليون ري شارو كيون لاگو كم، ”گرو جي، هون جي كرون كه مهني امر جيون ملي؟“ <sup>26</sup> پريو يسوع اُوئي ني بلتي ذيني كم، ”شريت ۾ كي لڪيڙو هي؟ تو پڙهڻ شون كي سمجهي هي؟“ <sup>27</sup> اُوئي پريو يسوع ني بلتي ذيني كم، ”تو پرميشور آپري ايشور ني آپري پوري دل، پوري جان، پوري طاقت هان آپري پوري سمجه شون پريم كر هان آپري پاڙي آلي شون آب جترو پريم كر.“ <sup>28</sup> ايني تي پريو يسوع اُوئي ني كهيو كم، ”تي صحيح بلتي ذيني هي. تو اينوج كر، تو تني امر جيون ملشي.“ <sup>29</sup> او درمي گرو هتو، ايني ري كري آپري هوشاري بناوڻ ري شارو پريو يسوع ني كيون لاگو كم، ”تو پچي مهارو پاڙي آلو كڻ هي؟“ <sup>30</sup> پريو يسوع اُوئي ني سمجهاوڻ ري شارو آي مثال ذينو كم، ”هيڪ يهودي هتو جكو يروشلم شهر شون يريخو شهر ذيشا جاتو پڙيو، تو مارگ ۾ اُوئي ني ڌاڙيل قري آيا هان اُونون اُوئي را گاپا اتاري ليئا هان اُوئي ني ماري آڌ مئو كري چوڙي بونا گيا. <sup>31</sup> پچي اينون هويو كه ايشور رو هيڪ پوجاري اُوئي مارگ شون لنگهيو. جڏي اُوئي، اُوئي زخمي ني ذينو، تو او اُوئي ني لاش سمجهي پاشو ڏي بئو گيو كه اُوئي ني هات لگاوڻ شون ڪيت پليت ني هوئي جاوي. <sup>32</sup> ايني نموني هيڪ لاوي قوم رو منڪ پي آيو جكو ايشور رو شيوڌاري هتو. او پي اُوئي ني لاش سمجهي پاشو ڏي بئو گيو.“

<sup>33</sup> پڻ هيڪ پرديسي جكو سامريا علائقي رو هتو، پيندو ڪرتو اُوئي مارگ شون لنگهيو هان جڏي اُوئي زخمي ني ذينو، تو اُوئي سامري ني دايا آئي.

<sup>34</sup> پچي او نيڙو گيو هان اُوئي ري قتون تي تيل هان انگورون رو رس لگايو هان قتون تي پتي بوندي. پچي اُوئي ني آپري گڏي تي چاڙهي مسافرخوني



<sup>5</sup> پڇي پريو يسوع اوتون ني ڪهيو ڪم، ”جي تون ۾ ڪو منڪ آڏي رات رو آڀري ڪي دوست ڪڍي جائي ڪي ڪم، ادا، مهني تين بائي اودار ڏي. <sup>6</sup> ڪيونڪ مهارو هيڪ دوست الڳي پون شون مهني ڪڍي آيو هي هان اوتني ني ڪلاوڙ ري شارو مهني ڪڍي ڪئين ڪونهي.“ <sup>7</sup> تو او گهر شون بلتي ڏيشي ڪم، ”مهني تنگ ني ڪر. همي در بند هي هان بال پي شوتوڙا هي، ايئي ري ڪري همي هون اتي تني ڪئين ڪونهي ڏي شگهو.“ <sup>8</sup> پڻ هون توني ڪونه هون ڪه جي او تونري دوستي ري ڪري ني اتي، پڻ تو پي تونري گهڙي گهڙي مونگڻ ري ڪري اُنشي هان جتري بائي ڪپشي، اترري او توني ڏيشي.“

### مونگڻ، جوڻڻ، در ڪٽڪاوڻ

(متي 7:7-12)

<sup>9</sup> پڇي پريو يسوع ڪهيو ڪم، ”ايئي ري ڪري هون توني ڪونه هون ڪه ايشور شون مونگڻا روم، تو توني ملشي. جوتا روم، تو توني لادشي. در ڪٽڪاوڻ، تو تونري شارو ڪوليو جاشي. <sup>10</sup> ڪيونڪ جڪو مونگي هي اوتني ني ملي هي هان جڪو جوڙي هي اوتني ني لادشي هي هان جڪو در ڪٽڪاڙي هي، اوتني ري شارو ڪلشي. <sup>11</sup> ڪي تون ۾ اهڙو ڪو باب هي جڪي رو ڏيڪرو مڇي مونگي، تو اوتني ني ناگ ڏي؟ <sup>12</sup> جون ايندو مونگي، تو اوتني ني پڇو ڏي؟ <sup>13</sup> جڏي ڪه ٿي بچڙا هوم، تو پي آڀري بالون ني سني شيون ڏيوڻ سمجهو هوم، تو پڇي ياد راکو ڪه آڪاشي پتا آڀري مونگڻ آتون ني پويتر اتما ضرور ڏيشي.“

### پريو يسوع هان بعل زبول

(متي 12:22-30؛ مرقس 3:20-27)

<sup>14</sup> هيڪ ڏن پريو يسوع هيڪي منڪ ۾ گونگو پوت ڪاڍيو. جڏي پوت نڪري گيو، تو او ٻولڻ لاگو هان منڪ آي جوئي تموم گهڻا حيرون هوبا. <sup>15</sup> اوتون ۾ ڪئينڪ منڪ آبت ۾ ڪيوڻ لاگا ڪم، ”آي تو پوتون ري سردار بعل زبول ري مدد شون پوت ڪاڍي هي.“ <sup>16</sup> ايئي ري ڪري ڪئينڪ منڪون پريو يسوع رو آزموتو ليون ري شارو ڪهيو ڪم، ”مهوني ڪو اهڙو نشون بتا جڪي شون خبر پڙي ڪه ٿو آي ڪوم ايشور ري طرفون ڪري هي.“ <sup>17</sup> پريو يسوع ني خبر هتي ڪه او ڪي شوچي پڙيا، ايئي ري ڪري اوتني ني ڪهيو ڪم، ”جڪي بادشاهي ۾ قوت پڙي، تو او برباد هوڙي هي هان جڪي گهر ۾ قوت پڙي هي، تو او گهر پي برباد هوڙي جاوي هي.“ <sup>18</sup> ايئي نموني جي شيطون ري بادشاهي ۾ قوت پڙي هان اوتني را چيلا هيڪي بيجي ري خلاف هوڙي جاوي، تو شيطون ري بادشاهي متي جاوي هي. تو پي ٿي ڪو هو ڪه هون پوتون ري سردار بعل زبول ري مدد شون پوت ڪاڍون هون. <sup>19</sup> جي ٿي سمجهو هو ڪه هون بعل زبول ري مدد شون پوت ڪاڍون هون، تو پڇي تونرا منڪ پي بعل زبول ري مدد شون پوت ڪاڍتا هوڙي. ايئي ري ڪري اوج منڪ فيصلو ڪرشي ڪه ٿي ڪوڙا هو. <sup>20</sup> پڻ هون پوتون ني ايشور ري طاقت شون ڪاڍون هون، جڪي شون خبر پڙي هي ڪه ايشور ري بادشاهي تون ڪڍي آئي ري. <sup>21</sup> جڏي ڪو طاقت آتو منڪ هتيار لي آڀري گهر رو پهرو ڏي هي، تو اوتني

ري دن مال ري چوري كونهي هوتي. <sup>22</sup> پڻ جڏي اُوئي شون پي وڌيڪ طاقت آڻو منڪ اُوئي تي حملو ڪري اُوئي ني ڪاڻو ڪري هي هان اُوئي را سڃاڻي هٿيار جڪون تي اُوئي رو پروسو هووي هي، ڪوشي لي هي هان اُوئي رو دن مال ڪوشي بلائي چوڙي هي. <sup>23</sup> ياد راکو، جڪو مهِي پيڙو ڪونهي، او مهاري خلاف هي هان جڪو مهِي پيڙو هوئي منڪون ني ايشور ڪيڊي ڪونهي لي اوتو، تو او منڪون ني ايشور شون انگا ڪري هي. “

### پُوت رو پاچو آوڻ هيڪ مثال

(متي 12:43-45)

<sup>24</sup> پڇي پريو يسوع آي مثال ڏي ڪهيو ڪم، ”جڏي پُوت منڪ شون نڪري هي، تو او آروم ڪرڻ ري شارو سڃي جگها ۾ رلي هي، پڻ جڏي اُوئي ني آروم ري جگها ڪونهي ملتي، تو او ڪي هي ڪم، ’هُن اُوئي منڪ ۾ پاچو جائين، جيٺ شون نڪريو هون.‘ <sup>25</sup> پڇي او آئي جووي هي ڪه او منڪ اهڙي گهر آئي ڪار هي جڪو آچو هان تيار هي. <sup>26</sup> پڇي او جائي آپ شون پي وڌيڪ شات بچڙا پُوت لي آوي هي هان او اُوئي منڪ ني لاڳي اُوئي ۾ ري هي. پڇي اُوئي منڪ ري حالت آڳي شون پي وڌيڪ خراب هوئي جاوي هي.“

### ايشور ري برڪت

<sup>27</sup> جڏي پريو يسوع آي باتون ڪرتو پڙيو، تو تولي ۾ هيڪي لڳائي زور شون ڪهيو ڪم، ”دن هي، او ما جڪي ٿئي جڻيو هان ڏوڏ پياڙيو.“  
<sup>28</sup> پڻ پريو يسوع ڪهيو ڪم، ”پڻ وڌيڪ دن هي، او جڪو ايشور ري باتون سُئي هان اُوئون تي بي هي.“

### پريو يسوع ني نشون بتاڻو رو ڪيوڻ

(متي 12:38-42؛ مرقس 8:12)

<sup>29</sup> جڏي پريو يسوع ري چوڌاري تموم گهڻا منڪ پيڙا هويام، تو او ڪيوڻ لاڳو ڪم، ”ايني زموني را منڪ بچڙا هي، ڪيونڪه آي نشون جوڻ ري شارو ڪري هي، پڻ اِيئون ني يونا نبي ري نشون شون نال بيجو ڪو پي نشون بتايو ڪونهي جاوي. <sup>30</sup> ڪيونڪه جهڙي نموني يونا نبي نينوا شهر ري منڪون ري شارو نشون هويوم، ايني نموني هون منس پتر پي ايني زموني ري منڪون ري شارو نشون هونين. <sup>31</sup> ڏڪڻ مُلڪ سبا ري روڻي تموم الڳي پون شون سلِيمون بادشاه ري ڏاهپ آئي باتون سُڻڻ آئي، پڻ هون تو سلِيمون شون پي موتو هون، تو پي ٿي مهاري ڪونهي سُڻتا. ايني ري ڪري قيامت ري ڏن ڏڪڻ مُلڪ سبا ري روڻي ايني زموني ري منڪون پيڙي اُني الزوم هڻي ڪشي ڪه آي ڏوهي هي. <sup>32</sup> نينوا شهر ري منڪون يونا نبي ري پرچار تي آپري پاپون شون توبهون ڪي، پڻ هون تو يونا شون پي موتو هون، تو پي ٿي مهاري باتون سُڻي آپري پاپون شون توبهون ڪونهي ڪرتا. ايني ري ڪري قيامت ري ڏن نينوا شهر را منڪ ايني زموني ري منڪون پيڙا اُنشي هان اِيئون تي الزوم هڻي ڪشي ڪه آي ڏوهي هي.“

## ڏيئي رو مثال

(متي 15:5، 23:22)

<sup>33</sup> پڇي پريو يسوع ڪهيو ڪم، ”ڪو پي منڪ ڏيئي ٻائي ڍڪنو ڪونهي جون اُوئي نِي ڪي نون هيٺا ڪونهي راکتو، پڻ اُوئي نِي اهڙي جڳها تي راکي هِي، جيٺ شون هر هيڪ رِي شارو اُجالو هووِي.“<sup>34</sup> تاري اونڪي تاري شري رِي شارو ڏيئي آلي ڪار هِي. جي تاري اونڪ شاجي هِي، تو تاري شجِي شري م اُجالو هِي هان جي تاري اونڪ خراب هِي، تو تارو شجو شري انداري م هِي.<sup>35</sup> اِيئي رِي ڪري خيال ڪرو ڪه جڪو اُجالو تون م هِي، او ڪيٺ اندارو تو ڪونهي.<sup>36</sup> اِيئي رِي ڪري جي تونرو شجو شري اُجالِي شون پريجوڙو هِي هان ڪي پي ڪنڊ م اندارو ڪونهي، تو تونرو شري اُوئي ڏيئي آلي ڪار هووِي هِي جڪو تونِي شجو اُجالو ڏي هِي.“

## پريو يسوع رو ننگون شون هوشيار ڪرڻ

(متي 36-1:23؛ مرقس 40-38:12؛ لُوقا 47-45:20)

<sup>37</sup> جڏي پريو يسوع آي باتون ڪري هئو ڪينوم، تو هيڪي فريسي منڪ اُوئي نِي آپري گهري ٻائي رِي دعوت ڏيئي. تو پريو يسوع اُوئي رِي گهري گيو هان ٻائي ڪاوڻ پينو.<sup>38</sup> فريسي آي جوئي حبرون هويو ڪه اُوئي ٻائي ڪاوڻ شون پيل هات ڪينون ڪونهي ڏويا.<sup>39</sup> پريو يسوع اُوئي نِي ڪهيو ڪم، ”اي فريسيون، تي آيو آڀني نيڪر آلي ڪار ٻاهر شون آچا تو ڪرو هوم، پڻ تونرو اندر لالچ هان بچڙائي شون پريجوڙو هِي.“<sup>40</sup> اي اڻ سمجه منڪون، ڪي ايشور انسون نِي رگو ٻاهر شون ٺاهيو هِي، ڪي اوتون نِي اندر شون ڪونهي ٺاهيا؟<sup>41</sup> جڪو ڪئين تون ڪيدي هِي، او غريبن م بلائوم، تو پڇي تي ٻاهر هان اندر آچا هوئي جاشو.<sup>42</sup> پڻ اي فريسيون، ڏک هِي تون تي ڪيونڪه تي ڦوڏني، ڏوٽون هان هر نموني رِي شاگ رو ڏهون حصو تو ڏيئي هوم، پڻ تون انصاف هان ايشور شون پريم ڪرڻ ڦٽو ڪيو رو. پڻ ڪرڻو ايتون هئو ڪه او پي ڪرون تو، هان آي پي ڪرون تو.<sup>43</sup> ڏک هِي تون تي، ڪيونڪه تونري مرضي هِي ڪه تونِي پگتي گهرون م شني ڪرسبون تي بيشاڙيا جاوي هان شهر م منڪ تون شون عزت شون ملي.<sup>44</sup> ڏک هِي تون تي، ڪيونڪه تي اوتون مڪومون آلي ڪار هو جڪو ڏيڪيجتا ڪونهي هان اوتون تي منڪ بي خبري م بي هِي.“<sup>45</sup> اِيئي تي هيڪي ڌرمي گرو ڪهيو ڪم، ”گرو جي، آي باتون ڪري تي مهوري بي عزتي ڪرو هو.“<sup>46</sup> پريو يسوع ڪهيو ڪم، ”اي ڌرمي گروئون، ڏک هِي تون تي، ڪيونڪه تي منڪون تي ڌرم را اهڙا پار راکو هو جڪي نِي ڪڻن تموم گهڻو ڏکيو هِي، پڻ اُوئي نِي پورو ڪرڻ رِي شارو منڪون رِي مدد پي ڪونهي ڪرتا.“<sup>47</sup> ڏک هِي تون تي، ڪيونڪه تي نببون را ڦها نائو هو جڪون نِي تونري ٻاپ ڏاڏون ماري هئا.<sup>48</sup> همي تي اوتون را ڦها نائي اِيئي بات رو ٿوڻ ڏيئي هو ڪه تي آپري ٻاپ ڏاڏون رِي ڪوم نِي پسند ڪرو هوم، ڪيونڪه اوتون نببون نِي ماري هئا.<sup>49</sup> اِيئي رِي ڪري ايشور آپري ڏاهپ شون ڪهيو هئو ڪم، ’هُون آيا نبي هان سنت اوتون ڪيدي ميلين هان او اوتون م ڪيني ڏک ڏيئي هان ڪيني ماري چوڙشي‘.<sup>50</sup> اِيئي رِي ڪري جگت رِي شروع شون جترا پي نبي ماريجا هِي، اوتون رو بدلو اِيئي زموني رِي منڪون شون ليئو جاشي.<sup>51</sup> يعني هابل رِي خُون

شون لي زڪريا ري خُون توڻي جڪي ني بليدون ري جگها هان ايشور ري گهر ري بچ ۾ ماريو گيوم هون تونني شاچي ڪونه هون ڪه اونون شجون ري خُون رو بدلو ايئي زموني ري منڪون شون ليئو جاشي. 52 ذڪ هِي تون تي، ذرمي گروئون، تون تو منڪون ري شارو ايشور ري باتون ني اولڪن رو در بند ڪري چوڙيو هي. تون آب ايشور ني ڪونهي اولڪيو هان پيجون ني پي پالو هو جڪون ري مرضي هتي ڪه او شاچيلي ايشور ني اولڪي.“

53 جڏي پريو يسوع اوت شون بوئو گيوم، تو ذرمي گرو هان فريسي اوئي ڏن شون اوئي ري خلاف هويا هان اوئي ني قاشاوڻ ري شارو اوتدا اوتدا سوال پوچڻ لاڳا. 54 او ايئي انتظار ۾ هئا ڪه پريو يسوع ني ڪي پي بات ۾ قشاوي.

### پريو يسوع رو ننگون شون هوشيار ڪرڻ

(متي 10:26-27)

**12** <sup>1</sup> اوئي نيم پريو يسوع ري چوڌاري هزاري منڪ آئي پيڙا هويا، اتر تي توڻي ڪه منڪ هيڪي پيچي مائي ڪرڻ لاڳا. ايئي تي پريو يسوع آڀري چيلون ني ڪهيو ڪه، ”تي فريسي منڪون ري نڱي شون هوشيار رهيا، ڪيونڪه او ڪمير آئي ڪار هي جڪو آئي ۾ ملاوڻ شون آئي ني قولائي چوڙي هي.“ <sup>2</sup> بيشڪ ايشور منڪون ري سجي ڊڪيوڙي شيون پڌري ڪرشي هان هر هيڪ لڪيوڙي بات ظاهر ڪرشي. <sup>3</sup> ايئي ري ڪري جڪو ڪئين تون اندازي ۾ ڪهيو هي، او اجائي ۾ سٿايو جاشي هان جڪو باتون تون بند ڪمرون ۾ ڪيئي هي، او اونچي جگها شون ايلون ڪري سٿايو جاشي.“

### ڪي شون پيڄاڻن ڪڍي

(متي 10:28-31)

<sup>4</sup> پچي پريو يسوع ڪهيو ڪه، ”دوستون، هون تونني شاچي ڪونه هون ڪه اونون شون ني پيڄاڻو جڪو شير ني ماري هي. او ايئي شون نال ڪئين ڪونهي ڪري سگهتا.“ <sup>5</sup> پڻ ايشور شون پيڄاڻو، ڪيونڪه اوئي ڪڍي پوري اختيار هي ڪه او ماري هان نرگ ۾ نوڪي. ايئي ري ڪري هون تونني ڪونه هون ڪه رگو ايشور شون پيڄاڻا رو.

<sup>6</sup> ڪي پيئون اونون ري پونج چڙڪي ڪونهي بڪتي؟ تو پي ايشور ايئون چڙڪيون ۾ ڪيئي پي ڪونهي پونترتو. <sup>7</sup> ايشور ني تونري مائي ري هيڪي هيڪي بال ري پي خبر هي. ايئي ري ڪري ني پيڄاڻو، ڪيونڪه اوئي آگهي تونرو قدر تو مموم گهڻي چڙڪيون شون پي وڌيڪ هي.“

پريو يسوع ني منن هان ني منن رو نتيجو

(متي 10:19-20, 32-33, 12:32)

8 پچي پريو يسوع كهيو ڪم، ”هون ٿوئي ڪونه هون ڪه جڪو پي منڪون ري روبرو مهني قبول ڪرشي، تو هون منن پتر پي ايشور ري فريشتون ري روبرو اوني ني قبول ڪرين. 9 پڻ جڪو منڪون آگهي مهني قبول ڪونهي ڪري، تو هون پي ايشور ري فريشتون ري روبرو اوني ني قبول ڪونهي ڪرون.“

10 جي ڪن مهني منن پتر ري خلاف ڪو پي بات ڪشي، تو اوني ني معاف ڪيو جاشي، پڻ جڪو پوتر آتما ري خلاف بات ڪرشي، تو اوني ني ڪڏي پي معافي ڪونهي ملي.“

11 جڏي منڪ ٿوئي پگني گهرون ۾ جون حاڪمون هان اختيار آتون ڪڍي لي جاوي، تو ٿي اوني تيم گنتي ني ڪريا ڪه ڪيڪر هان ڪهڙي بلتي ڏيوڙي هي. 12 ڪيونڪه پوتر آتما اوڻيج تيم ٿوئي شٽاشي ڪه ٿوئي ڪي ڪيوڙو هي.“

بي عقل امير منڪ رو مثال

13 پچي رش ۾ هيڪي منڪ پريو يسوع ني ڪهيو ڪم، ”گرو جي، مهاري پائي ني ڪو ڪه جڪو ملڪيت مهوري آبا مرڻ شون پچي مهوري شارو چوڙي هي، اوني ۾ مهارو حصو مهني ڏي.“ 14 پريو يسوع اوني ني ڪهيو ڪم، ”ادا، ٿورو انصاف ڪرڻ جون حصا بلاوڻ مهارو ڪوم ڪونهي.“ 15 پچي پريو يسوع منڪون ني ڪهيو ڪم، ”خيال راکيا آپرو آپني هر نموني ري لالچ شون بچائي راکيا، ڪيونڪه منڪ ري زندگي گهڙي دن مال تي باڏوڙي ڪونهي.“

16 پچي پريو يسوع اوڻون ني هيڪ مثال ڏي شمعهايو ڪم، ”ڪي امير منڪ ري بني ۾ تموم گهڙي پوک هوڻي. 17 امير منڪ آپري من ۾ شوچڻ لاگو ڪه همي هون ڪي ڪرون؟ ڪيونڪه مهني ڪڍي دنون راکڻ ري اترې جگها پي ڪونهي. 18 اوني شوچو ڪه هون ايئون ڪرين ڪه آپرا گڏوم پونگائي اوڻون ني موتا موتا نٿائين. پچي اوڻون ۾ آپرو شجوڻي دنون هان پيجو سيمون پيڙو ڪري راکين. 19 پچي هون آپرو آپني ڪئين ڪه ٿي ڪڍي تموم گهڙي شالون ري شارو تموم گهڙو دنون پيڙو ڪيوڙو هي. همي آروم شون ڪا پي هان خوش ري. 20 پڻ ايشور اوني امير ني ڪهيو ڪم، ”تو بي عقل هي، ڪيونڪه آج رات تو مري جائي. پچي آي شجو ڪئين جڪو ٿي آپري شارو پيڙو ڪيو هي، او بيجون رو هوڻي جاشي.“

21 ايڻي ري ڪري اهڙو منڪ جڪو ڌرتي تي آپري شارو دن پيڙو ڪري هي، او ايشور ري نظر ۾ امير ڪونهي.“

## ايشور تي وشواس راڪڻ

(متي 6:25-34)

22 پڇي پريو يسوع آڀري چيلون ني ڪهيو ڪم، ”ايئي ري ڪري هون ٿوني ڪونه هون ڪه آڀري زندگي ري ضرورتون ري گڻي ني ڪرو ڪه مهني ڪي ڪاشون هان ڪي پيشون؟“ 23 ڪيونڪه زندگي ڪاڏي شون هان شير گايون شون وڌيڪ قيمتي هي. 24 هاڏون ني جوئوم او نڪو پوک پوکنا نڪو لهارو ڪرنا، نڪو اوئون را ڪمرا جون گڏوم هي، تو پي ايشور اوئون ني ڪاوڻ ري شارو ڏي هي. پڻ ٿورو قدر تو پڪيون شون پي وڌيڪ هي. 25 ڪي ٿون ۾ ڪو اهڙو هي جڪو گڻي ڪري آڀري حياتي رو هيڪ منت پي بدائي شگهي؟ 26 جي ٿي اترې بات پي ڪونهي ڪري شگهتا، تو پڇي ٿي بيبي شيون ري شارو ڪيون گڻي ڪرو هو؟ 27 جهنگ را گل ڏهون ڏي جوئوم او ڪيڪر تو بددي هي، او نڪو محنت ڪرنا نڪو گاپا ناوتا. هون ٿوني ڪونه هون ڪه اڏي مون مرتبي آلي سليمون بادشاه پي اهڙي پوشاڪ ڪونهي پيري. 28 جهنگ رو گاش جڪو آج هي هان شواري ڇر ۾ ٻائيو جاشي، اوئي ني پي ايشور ڦوتري پوشاڪ پيراوي هي، تو اي گهت وشواس آئون، ڪي او ٿوني اهڙي پوشاڪ ڪونهي پيراوي؟ 29 ٿي ايئي بات ري گڻي ني ڪرو ڪه ڪي ڪاشون هان ڪي پيشون؟ 30 ڪيونڪه ايئون سجي شيون لاري ڏنبا ري قومون بي هي، پڻ ٿونري آڪاشي پتا ني خبر هي ڪه ٿوني اوئون شيون ري ضرورت هي. 31 ٿي رگو ايشور ري بادشاهي ۾ هان اوئي ري حڪمون تي بيتا روم، تو پڇي اي سجي شيون ٿوني ملي جاشي.“

## آڪاش تي ڏن پيڙو ڪرڻ

(متي 6:19-21)

32 پڇي پريو يسوع آڀري چيلون ني ڪهيو ڪم، ”ٿي ريون ري نڻي ڏڻ آلي ڪار تموم ٿوڙيا هوم، تو پي ني پيشاجوم، ڪيونڪه ٿونري آڪاشي پتا ري مرضي هي ڪه او ٿوني بادشاهي ڏي. 33 آڀرا مال ملڪيت بيبي غريبن ۾ بلائو هان آڀري شارو اهڙي گوٽلي نائوم، جڪو پروٽي ڪونهي هوني. اهڙو ڏن شرگ ۾ پيڙو ڪرو، جڪو ڪڏي پي ڪونهي ڪوتو. جيت نڪو چور چوري ڪرنا هان نڪو ڪيڙا خراب ڪرنا. 34 ڪيونڪه جيت ٿونرو ڏن هوشي، ٿونرو من پي اوئج لاگوڙو ريشي.“

## شجاگ غلوم رو مثال

35 پڇي پريو يسوع ڪهيو ڪم، ”جون غلوم آڀري مالڪ ري شيوا ڪرڻ ري شارو آڀرو سندرو بوندي ڏينو ٻائي راڪي هي، ايئوج ٿي پي مهاري شارو هر تيم تيار رو. 36 ٿي اوئون غلومون آلي ڪار هونوم، جڪو آڀري مالڪ ري اوڻ رو انتظار ڪرنا ري هي ڪه جڏي او بينان ري دعوت شون پاچو آئي در ڪرڪاوي، تو او يڪدم اوئي ري شارو در ڪولي. 37 ڏن هي، او غلوم جڪون رو مالڪ اوئون ني شجاگ ڏيڪي. هون ٿوني شاجي ڪونه هون

ڪه مالڪ، شبنو ري شارو تبار هوئي اونون ني پيشاڙي ٻائي ڪلاشي. 38 جي مالڪ آڏي رات رو جون تارهي آوي هان او آيري غلومون ني شجاگ ڏيڪي، تو او غلوم ڪترا ني ڏن هي.

39 پڻ ياد راکو، جي گهر ري ڏڻي ني خبر هووي ڪه چور ڪئي تيم آشي، تو او آيري گهر رو کات هڻڻ ڪونهي ڏينون تو. 40 ايئي ري ڪري ٿي پي تبار رو، ڪيونڪه ٿوني خبر پي ڪونهي پڙي، هون منش پتر آئي جائين.“

### وفادار غلوم رو مثال

(متي 24:45-51)

41 پطرس ڪهيو ڪم، ”اي پريو، ڪي تو اي مثال مهوني شتاوي هي، جون شجون ري شارو هي؟“ 42 پريو يسوع ڪهيو ڪم، ”اهڙو وفادار هان سمجهدار غلوم ڪيو هي، جڪي ني اونڙي رو مالڪ بيچي غلومون مائي راکي ڪه او هر هيڪ ني تيم تي ٻائي ڏيتو ري. 43 ڏن هي او غلوم جڪي ني اونڙي رو مالڪ ايئوج ڪرتو ڏيڪي. 44 هون ٿوني شاچي ڪونه هون ڪه مالڪ آيري گهر ري شجي آگوڙي اونڙي ري هات ۾ ڏيشي. 45 پڻ جي او غلوم آيري من ۾ شوچي ڪه مهاري مالڪ ري اوڻ ۾ دير هي هان او بونهون هان بونهيون ني ماري ڪوڻي، پڻ آپ ڏنو ڪري ڪاوي پيئي هان نشي ۾ ري. 46 تو اونڙي رو مالڪ اهڙي ڏن هان اهڙي تيم تي آشي، جڪو اونڙي ري شوچ ۾ پي ڪونهي هووي. پچي مالڪ آشي هان اونڙي ني چاڀڪون هڻي آڏو ڪرشي هان او بيمونون ۾ گڻيو جاشي. 47 او غلوم جڪو آيري مالڪ ري مرضي ڪونهي اولڪنو هان تياري ڪونهي ڪي هان نڪو اونڙي ري مرضي تي ٻوڙو، تو او تموم گهڻي مار ڪاشي. 48 پڻ جڪي ني آيري مالڪ ري مرضي ري خبر ڪونهي، تو او ٿوڙي مار ڪاشي. جڪي ني گهڻو ڏينوڙو هي، اونڙي شون حساب پي گهڻو ليو جاشي هان اونڙي شون پوچا ڪاچا پي تموم گهڻي ڪي جاشي.“

### پريو يسوع ري ڪري مينڪون رو خلاف هوڻ

(متي 10:34-36)

49 پچي پريو يسوع ڪهيو ڪم، ”هون ڌرتي تي انصاف رو باشدي لگاڙو آيو هون. جي اي باشدي پيل ٻليو هوڻت، تو ڪترو ني شنو هتو. 50 پڻ ايئي شون پيل مهني تموم گهڻا ڏڪ ڏيڪتا هي هان جتري توڻي هون ڏڪ ني ڏيڪون، اتر تي توڻي هون تموم گهڻو پريشون رئين. 51 ڪي ٿي اي سمجهو هو ڪه هون ڌرتي تي صلح ڪراڙو آيو هون؟ هون ٿوني ڪونه هون ڪه صلح نام، پڻ جدائي ڪراڙو آيو هون. 52 ڪيونڪه آڄ شون لي هيڪي گهر ري پونچون پاتيون ۾ تين پاتي هيڪي پاشي هان بي بيچي پاشي هوشي. 53 ٻاڻ ڏيڪري ري خلاف هان ڏيڪرو ٻاڻ ري خلاف هوشي، ما ڏيڪري ري خلاف هان ڏيڪري ما ري خلاف هوشي، شاشو بوڙاري ري خلاف هان بوڙاري شاشو ري خلاف هوشي.“

## زمونِي نِي اوڻڪڻ

(متي 3-2:16)

<sup>54</sup> پڇي پريو يسوع منڪون نِي ڪهيو ڪم ”جڏي ٿي آڻوڻي شون باڌل جوڻو هوم، تو يڪدم ڪو هو ڪم مي آشي هان اِينوج هوڙي هي-

<sup>55</sup> جڏي ڏڪڻ رو بائرو لاڳي هي، تو ٿي ڪو هو ڪم لو لاڳشي هان اِينوج هوڙي هي. <sup>56</sup> اي نڱون، جڏي ٿي ڌرتي هان آڪاش ري نيشونيون نِي

شمجهي شگهو هوم، تو پڇي اِئي زمونِي نِي ڪيئون ڪونهي شمجھتا؟ <sup>57</sup> ٿي آب آي فيصلو ڪيئون ڪونهي ڪرنا ڪم مهونِي ڪي ڪرڻ ڪي؟“

## دُشمنون شون صلح

(متي 26-25:5)

<sup>58</sup> پڇي پريو يسوع ڪهيو ڪم، ”جي ڪڻ ٿي تي ڪيس ڪري هان او ٿني ڪورٽ ۾ لي جاوي، تو مارگ ۾ ڪوشش ڪري اوڻي شون ٿي جا-

اِينون ني هوڙي ڪم او ٿني جج ڪيڏي لي جاوي هان جج ٿني پوليس ري حوالي ڪري هان پوليس ٿني جيل ۾ گهاتي. <sup>59</sup> هون ٿني شاجي ڪونه

هون ڪم جتري توڻي ٿو ڏنڊ رو ٽڪو ٽڪو ڪونهي پري، اُتري توڻي ٿو جيل شون ڪڏي پي ڪونهي نڪري.“

## پاپون شون توبهون نِي ڪرڻ رو نتيجو

<sup>1</sup> جڏي پريو يسوع شيڪاوتو پريوم، تو ڪئينڪ منڪون اوڻي نِي گليل صوبي ري اوڻون منڪون ري باري ۾ سٿايوم، جڪو يروشلم شهر

۾ ٻليدون ڪرڻ گيا هتا هان رومي گورنر پلاطس اوڻون نِي مرايا هتا. <sup>2</sup> اِئي تي پريو يسوع اوڻون شون پوچو ڪم، ”ٿي ڪي شمجهو

هو ڪم او گليل صوبي ري باقي منڪون شون وڌيڪ پاپي هتا، اِئي ري ڪري اوڻون شون اِينون هويو؟ <sup>3</sup> هون ٿوني ڪونه هون ڪم اِينون ڪونهي،

پڻ جي ٿي آبري پاپون شون توبهون ڪونهي ڪرو، تو ٿي شجائي اوڻون آلي ڪار ماريا جاشو. <sup>4</sup> ڪي او اداري منڪ جڪون تي يروشلم شهر ري

علائقي شيلوخ ۾ مينار ڪريو هتا هان او ديجي موئا هتا. ٿي ڪي شمجهو هو ڪم او يروشلم ري باقي شجي منڪون شون وڌيڪ پاپي هتا؟ <sup>5</sup> هون

ٿوني ڪونه هون ڪم اِينون ڪونهي، پڻ جي ٿي آبري پاپون شون توبهون ڪونهي ڪرو، تو ٿي پي اِينوج ماريا جاشو.“

## بي قل انجير ري بن رو مثال

<sup>6</sup> پڇي پريو يسوع اِي مثال ڏينو ڪم، ”ڪي منڪ آبري انگورون ري باگ ۾ هيڪ انجير رو بن پوڪيو. هيڪ ڏن او قل جوڻڻ گيو، پڻ اوڻي بن ۾

ڪو پي قل ڪونهي هتا. <sup>7</sup> اِئي تي اوڻي باگائي نِي ڪهيو ڪم، ’جو، هون تينون شالون شون اِئي انجير ري بن ۾ ڪو پي قل ڪونهي ڏيڪتو. اِئي

ري ڪري اِئي بن نِي باڊي چوڙ، ڪيونڪ هروپرو جگها رکائي ايو هي.‘ <sup>8</sup> باگائي اوڻي نِي ڪهيو ڪم، ’اي مالڪ، هيڪ شال آجون پي اِئي

نِي ايو ريوڻ ڏي، تو هون اِئي ري چوڌاري چلهو ڪوترون هان اِئي نِي پوڻ ڏيئون. <sup>9</sup> جي قل لاڳي، تو سڻي بات هي، ني تو پلي ٿي بدائي چوڙيا.“

## پوټر ڏن تي ڏوٻي لڳائي ني شاجي ڪرڻ

10 هيڪ ڏن پريو يسوع پوټر ڏن رو ڪي پگتي گهر ۾ شيڪاوتو پٿيو. 11 اوت هيڪ لڳائي هتي جڪو اڍاري شالون شون ڪي پوت ري ڪري ڏوٻي هوئي هتي هان او ڪڏي پي شڏي ڪونهي اٿي. 12 پريو يسوع اوتني ني جوئي آپ ڏيما هيلو ڪري ڪهيو ڪم ”باٿي، همي تو شاجي هوئي ري.“ 13 پچي پريو يسوع اوتني لڳائي ري ڏوٻ تي هات راکيوم، تو او يڪدم شڏي هوئي گئي هان ايشور ري ٻڌائي ڪرڻ لاڳي.

14 پريو يسوع پوټر ڏن رو اوتني لڳائي ني شاجي ڪي هتي. ايئي ري ڪري پگتي گهر ري سردار ريش ۾ منڪون ني ڪهيو ڪم ”هفتي ۾ چي ڏن هي جڪي ۾ ڪوم ڪار ڪرڻ ڪبي. ايئي ري ڪري اوتون ڏنن ۾ آئي شاجا هوئو، پڻ پوټر ڏن رو نا.“ 15 پريو يسوع اوتني ني ڪهيو ڪم ”اي نگون، ڪي ٿي پوټر ڏن رو آپري مال ني بتوڻ شون ڪولي پوٿي پياڻڻ ڪونهي لي جاوتا؟“ 16 ايئي ري ڪري اي ضروري ڪونهي هتو ڪه اي لڳائي جڪو ايراهيم ري پٿري شون هي، جڪي ني شيطون اڍاري شالون شون ڪاڻو ڪري پينو هتو، ڪي پوټر ڏن رو ايئي ني بيماري شون شاجي ڪرڻ پلو ڪونهي؟“ 17 جڏي پريو يسوع اي باتون ڪئي، تو اوتني ري خلاف باتون ڪرڻ آلا شجائي منڪ شرمندا هويا، پڻ شجو تولو اوتني را پرچا جوئي خوش هويو.

## شرشيون ري بيچ رو مثال

(متي 32-31:13، مرقس 32-30:4)

18 پچي پريو يسوع ڪهيو ڪم، ”ايشور ري بادشاهي ڪهڙي هي هان هون اوتني ني ڪي شون پيتائون؟“ 19 او شرشيون ري بيچ آئي ڪار هي، جڪي ني هيڪي منڪ لي آپري باگ ۾ پوڪيو. او اڳي موتو بڻ هويو هان اوتني ري تائون تي پڪيون آلا ناهيا.“

## ڪمير رو مثال

(متي 33:13)

20 پچي پريو يسوع ڪهيو ڪم، ”هون ايشور ري بادشاهي ني ڪي شون پيتائون؟“ 21 او اوتني ڪمير آئي ڪار هي جڪي ني هيڪي لڳائي آڌ من آتو گوتي بلا اوتني ۾ ملايو هان شجو آتو اٿئي گيو.“

## شوڙهي در رو مثال

(متي 23-21، 14-13:7)

22 پريو يسوع شهر شهر هان گون گون ۾ شيڪاوتو يروشلم شهر ڏيما جاتو پٿيو. 23 تو هيڪي منڪ اوتني شون پوچو ڪم، ”اي پريو، ڪي جڪون ني مگتي ملشي، او توڙيا هي؟“ 24 پريو يسوع اوتني ني ڪهيو ڪم، ”ايشور ري بادشاهي اهڙي گهر آئي ڪار هي جڪي رو در شوڙهو هي. تي شاجي من شون اوتني در شون جاوڻ ري ڪوشش ڪرو. هون توني شاجي ڪونه هون ڪه تموم گهڻا منڪ اوتني در شون جاوڻ ري ڪوشش

ڪرشي، پڻ او جائی ڪونهي شگهي. <sup>25</sup> هيڪ اهڙو ڏن آشي جڏي گهر رو مالڪ اُئي در بند ڪرشي. پڇي ٿي باهر اُئي در ڪڙڪائي ڪشو ڪم، ’اي پرڻو، مهوري سازو در ڪولو.‘ تو او بلتي ڏيشي ڪم، ’تي ڪڻ هو؟ هون توني ڪونهي اولکتو.‘ <sup>26</sup> اوني تيم تي ڪشو ڪم، ’مهني تو تي پيڙا کاوتا پيتا هان تو مهوري پاڙي ۾ شيڪاوتو.‘ <sup>27</sup> پڻ او پڙي توني ڪشي ڪم، ’هون شاجي ڪونه هون ڪه هون توني ڪونهي اولکتو ڪه تي ڪڻ هو. اي بچزون، تي شجائي مهاري اونڪيون شون ٿئي جائو.‘ <sup>28</sup> جڏي ٿي آپني باهر اُپوڙا ڏيڪشو هان ايراهيم، اضحاق، يعقوب هان شجائي نبي، ايشور ري بادشاهي ۾ پينوڙا ڏيڪشو، تو تي روتا هان ڏونت پيشتا ريشو. <sup>29</sup> پڇي اُوگوني، آتوني، اتر هان ڏڪڻ شون منڪ آني ايشور ري بادشاهي ري دعوت ۾ پيڙا هوشي. <sup>30</sup> جوئو، جڪو هئون لاري هي، او آگهي هوشي هان جڪو آگهي هي، او لاري هوشي.‘

### پرڻو يسوع رو يروشلم ري منڪون تي ڏڪ

(متي 23:37-39)

<sup>31</sup> اوني تيم ڪئينڪه فريسيون، پرڻو يسوع ني آني ڪهيو ڪم، ’تي ايت شون نڪري جائو ڪيونڪه هيروديس بادشاه ري مرضي هي ڪه او توني مراوي.‘ <sup>32</sup> پرڻو يسوع ائون ني ڪهيو ڪم، ’جائي اوني چالاڪ لوڪي ني ڪو ڪه جو، هون آج هان شواري، پوت ڪاڊتو هان بيمارون ني شاجا ڪرتو رئين هان تيجي ڏن آبرو ڪوم پورو ڪرين.‘ <sup>33</sup> پڻ آي ضرور هي ڪه هون آج، شواري هان پريون آبرو پيندو ڪرتو رون ڪه يروشلم شهر پڻو، ڪيونڪه ائون هوني ڪونهي شگهو ڪه ڪو پي نبي يروشلم شون باهر ماريو جاوي. <sup>34</sup> اي يروشلم ائون، تي نبيون را خوني هوم، ڪيونڪه جڪو ايشور ري طرفون تون ڪڍي ميليڙا هتا، ائون ني پتر هني ٺپ مارو هو. مهني ڪترائي گهمرا ڪوشش ڪي ڪه تون شجون ني ائون پيڙا ڪرون جون ڪوڪڙي آبري بچيون ني پونڪيون هينا پيڙا ڪري هي، پڻ تون مهاري بات ڪونهي مني. <sup>35</sup> همي ياد راکوم، يروشلم شهر جيٽ ايشور رو گهر هي، ورون هوني جاشي. هون توني ڪونه هون ڪه تي مهني اتر تي توڻي ڪونهي ڏيڪوم، جتري توڻي ائون ڪونهي ڪو ڪم، ’ڏن هي او جڪو پرميشور ري نون شون آوي هي.‘

### پويت ڏن تي بيمار ني شاجو ڪرڻ

**14** <sup>1</sup> هيڪي گهمري پرڻو يسوع پويت ڏن رو فريسيون ري هيڪي سردار ري گهري دعوت تي گيو. اوت ڪئينڪه فريسي، پرڻو يسوع ني قاشاڻ ري تال ۾ هتا. <sup>2</sup> اوت هيڪ منڪ هتو جڪي را هات پگ بيماري ري ڪري شوجوڙا هتا. <sup>3</sup> پرڻو يسوع، درمي گروئون هان فريسيون شون پوچو ڪم، ’ڪي پويت ڏن رو ڪي بيمار ني شاجو ڪرڻ جائز هي، جون نا؟‘ <sup>4</sup> پڻ ائون ڪو پي بلتي ڪونهي ڏيني. پڇي پرڻو يسوع اوني بيمار تي آبرو هات راکي اويج تيم شاجو ڪيو هان اوني ني اوت شون بئير ڪيو. <sup>5</sup> پرڻو يسوع ائون شون پوچو ڪم، ’جي تون ۾ ڪيرو ڏيڪرو جون ڊگو پويت ڏن رو ڪوه ۾ ڪري، تو ڪي ٿي اوني ني اويج تيم ڪوه شون باهر ڪاڊشوم جون نا؟‘ <sup>6</sup> پڻ ڪو پي بلتي ڏي ڪونهي شگهيو.

## نوٽ هان ميموٽي ري باري ۾ شيڪاوٽ

7 جڏي پريو يسوع ڏينو ڪه دعوت ۾ ميموٽ آگهي جائي سُني جگها تي پيشن پسند ڪري هي، تو اُوئي اي مثال ڏينو ڪه،<sup>8</sup> ”جي تني بيان ري دعوت ملي، تو تُو آگهي جائي سُني جگها تي ني پيش، ڪيونڪه هوئي شگهي هي ڪه دعوت ڏيوڻ آئي او جگها اهڙي منڪ ري شارو راکي هووي جڪو اُوئي ري نظر ۾ ئي شون وڌيڪ عزت آو هووي.“<sup>9</sup> جي دعوت ڏيوڻ آو تني آئي ڪي ڪه، ’اي جگها ايئي ني ڏي-‘ تو پيچي تاري بي عزتي هوشي هان تني شجون شون لاري پيشنو پڙشي-<sup>10</sup> ايئي ري ڪري جڏي تني دعوت ملي، تو تُو شجون شون لاري پيش، جڏي دعوت ڏيوڻ آو آپ آئي تني ڪشي ڪه، ’اڏام آئي آگهي پيش-‘ تو پيچي اُونون شجون ري نظر ۾ تاري تموم گهڻي عزت هوشي، جڪو تني پيٽا دعوت ۾ آيا هوشي-<sup>11</sup> ڪيونڪه جڪو آيو آپني موتو شمعهي هي، او گهت ڪيو جاشي هان جڪو آپني گهت شمعهي هي، او موتو ڪيو جاشي-“<sup>12</sup> پيچي پريو يسوع دعوت ڏيوڻ آئي ني اي پي ڪهيو ڪه، ”جڏي تُو ڏن رو جون رات ري ٻاتي تيار ڪراوي، تو آپري دوستون، پايون، عزيزون جون شاهوڪار گون آلا ني اٿا، متان او پي تني دعوت ڏي اٿاوي هان آيو بدلو اٿاري-<sup>13</sup> پڻ جڏي تُو دعوت ڪري، تو غريبن، مندوبن لولهون هان اونڌون ني اٿا.“<sup>14</sup> ايئون ڪڙ شون ايشور تني برڪت ڏيشي، ڪيونڪه اُونون ڪيڏي ٿارو بدلو اٿارڻ ري شارو ڪئين ڪونهي هووي- پڻ تني ايئي رو بدلو پيچي وشواسيون پيٽو پڙي جيتا هوڻ آئي ڏن ملشي، جڏي ايشور جگت رو انصاف ڪري-“

## موتني دعوت رو مثال

(متي 10:1-22)

15 پريو يسوع ري اي باتون سُني هيڪي ميموٽ ڪهيو ڪه، ”ڏن هي او جڪو ايشور ري بادشاهي ۾ دعوت ڪاشي-“<sup>16</sup> پريو يسوع اي سُني اُونون ني اي مثال ڏي ڪهيو ڪه، ”هيڪي منڪ موتني دعوت ڪي هان تموم گهڻا منڪ اٿايا-<sup>17</sup> جڏي ٻاتي تيار هوئي، تو اُوئي آيو غلوم ميلو ڪه ميموٽون ني هيلو ڪري آوي-<sup>18</sup> غلوم هيلو ڪڙ گيوم پڻ شجائي منڪ بهونا ڪڙ لاگا- پيلڪي ڪهيو ڪه، ’مهني بني لي هي جڪي ني جوئڻ ري شارو مهني ضرور جاوڻو هي- ايئي ري ڪري مهربوني ڪري مهاري طرفون معافي مونگي، ڪيونڪه هون آئي ڪونهي شگهون-‘<sup>19</sup> پيچي ڪهيو ڪه، ’مهني پونج جوڙا ڊگون را ليئا هي، ايئي ري ڪري مهني اُونون ني باوڻ ري شارو جاوڻو هي- مهربوني ڪري مهاري طرفون معافي مونگي، ڪيونڪه هون آئي ڪونهي شگهون-‘<sup>20</sup> تيجي منڪ ڪهيو ڪه، ’مهرو تازو بيان هويو هي، ايئي ري ڪري هون آئي ڪونهي شگهون-‘<sup>21</sup> پيچي غلوم جائي شجي بات آپري مالڪ ني سُٿائي، مالڪ سُٿي تموم گهڻو ڪاروڙيو هان اُوئي آپري غلوم ني حڪم ڏينو ڪه، ’چيڪو جا هان شهر ري مارگون هان گهتيون ۾ غريبن، مندوبن لولهون هان اونڌون ني ايت لي آ-‘<sup>22</sup> پيچي غلوم گيو هان پاچو آئي ڪهيو ڪه، ’اي مالڪ، جون تون حڪم ڏينو هتو، مهني اينوج ڪيو، پڻ تو پي آجون توڻي ميموٽون ري شارو جگها بچوڙي هي-‘<sup>23</sup> پيچي مالڪ آپري غلوم ني حڪم

ڏٺو ڪم، 'مارگون هانَ بني تي جا هانَ منڪون نِي مجبور ڪري دعوت ۾ لي آءِ ڪم مهارو گهر پريجي. 24 ڪيونڪ هون شاجي ڪونه هون ڪم جڪو آٿايوڙا هيءَ، اُونون ۾ ڪو پي مهاري ٻائي چاڪي ڪونهي شگهيءَ.'"

### پريو يسوع را چيلا هوئن را شرط

(متي 10:37-38)

25 جڏي تموم گهڻا منڪ پريو يسوع لاري بيوڻ لاڳام، تو اوني پاچل قوري ڪهيو ڪم، 26 "جي ڪڻ مهاري لاري آويءِ، تو اوني نِي آيرا ما بابءِ، لڳائيءِ، ٻائيا، پائي هانَ بينون پڻ آيري جان شون وڌيڪ مهِي شون پريم ڪونهي ڪرتو، تو او مهارو چيلو ڪونهي هوئي شگهتو. 27 جڪو پي آيري شولي ڪونهي ڪتو يعني مهاري شارو ڏڪ تڪليف ڏيڪڻ هانَ آيري جان ڏيوڻ ري شارو تيار ڪونهي، تو او مهارو چيلو هوئي ڪونهي شگهتو. 28 ڪيونڪ تون ۾ اهڙو ڪو پي ڪونهي جڪو هيڪ موتو مينار نٿاڻو رو شوچيءَ، تو پيل پيشي اندازو نِي ڪري ڪه اوني ڪيدي مينار نٿاڻو ري شارو ڪو سيمون هيءَ، جون نا. 29 ايتون نِي هووي ڪه جڏي بُنياد ناوڻ شون پچي مينار نائي نِي شگهيءَ، تو شجائي جوئڻ آلا گجر ڪري ڪشي ڪم، 30 'ايني منڪ مينار رو ڪوم شروع تو ڪيو هيءَ، پڻ پورو ڪونهي ڪرائي شگهيو.' 31 جي ڪو بادشاه پيجي ڪي بادشاه شون پڙهڻ جاوي هيءَ، تو او پيل ضرور پيشي شوچشي ڪم، 'ڪي هون آيري ڏس هزار فوج شون دشمن ري بيش هزار فوج شون پڙهي شگهون هون، جون نا؟' 32 جي او سمجهي هيءَ ڪه هون ڪتي ڪونهي شگهون، تو دشمن آيون الگو هوشيءَ، تو او بات ڪرڻ ري شارو آيرا خاص منڪ ميلشي جڪو منوئي ڪرڻ را شرط پوچشي. 33 ايني نموني تون ۾ جي ڪڻ آيرو شجو ڪئين چوڙي ڪونهي، تو او مهارو چيلو هوئي ڪونهي شگهتو."

### بي سوادو لوڻ

(متي 13:5؛ مرقس 9:50)

34 پچي پريو يسوع ڪهيو ڪم، "لوڻ تو سُنو هيءَ، پڻ جي لوڻ رو سواد ختم هوتو جاويءِ، تو اوني نِي ڪئي شئي شون سوادو ڪيو جاشي؟ 35 پچي او نڪو بني ري ڪوم رو ريءِ، نڪو پوڻ ري ڪوم رو. منڪ اوني نِي ٻاهر نوڪي هيءَ. سُنڻ آلا سمجهي را."

### گميجوڙي رڍ رو مثال

(متي 12:14-18)

1 شجائي ناڪوليون آلا هانَ پابي منڪ پريو يسوع ري باتون سُنڻ ري شارو اوني ڪيدي آوتا. 2 فريسي هانَ ڌرمي گرو آيت ۾ ڪيوڻ

لاڳا ڪم، "آي منڪ پايون شون ملي هيءَ هانَ اُونون پيڙو ڪاوي پيئي هيءَ."

3 ايني تي پريو يسوع اُونون نِي هيڪ مثال ڏي ڪهيو ڪم، 4 "جي تون ۾ ڪي ڪيدي سَنو رڍون هووي هانَ اُونون ۾ هيڪ گميجي ريءِ، تو او

ڪي ڪرشي؟ او نوانوي رڍون نِي ميدون ۾ چوڙي اوني گميجوڙي رڍ نِي اُترِي توڻي جوتو ريشي، جتري توڻي او نِي لاڏي. 5 پچي جڏي او رڍ لاڏي

هي، تو او خوش هوئي اوني ني کوئي تي کئي هي. 6 پچي گهري پڳي دوستون هان گون آئون ني هيلو ڪري ڪي هي ڪم، مهني پيڙا هوئي خوشي ملهائون ڪيونڪه مهاري گميجوڙي رڍ لادي هي. 7 هون توني ڪونه هون ڪه ايئي نموني نوانوي نيڪ منڪون، جڪون ني توبهون ڪرڻ ري ضرورت ڪونهي، ائون ري پيت ۾ هيڪي توبهون ڪرڻ آلي پاپي ري ڪري آڪاش ۾ تموم گهڻي خوشي هوشي. 8

### گميجوڙي شڪي رو مثال

8 پچي پريو يسوع ڪهيو ڪم، ”جي هيڪي لگائي ڪيڍي چونڊي را ڏس شڪا هووي هان ائون ۾ هيڪ شڪو گميجي روم، تو او ڪي ڪرشي؟ تو او لگائي ڏيئو ٻالي گهر ۾ بونگهري ڏيشي هان اتر تي توڻي جوتي ريشي، جتري توڻي او ني لادي. 9 پچي جڏي او شڪو لادي هي، تو او آڀري شائڪيون ني هان گون آئون ني هيلو ڪري ڪشي ڪم، مهني پيڙا خوشي ملهائون ڪيونڪه مهاري گميجوڙو شڪو مهني لادو رو. 10 هون توني ڪونه هون ڪه ايئي نموني جڏي هيڪ پاپي توبهون ڪري هي، تو اوني ري ڪري ايشور آڀري فريشتون پيڙو خوشي ملهائي هي.“

### گميجوڙي ڏيڪري رو مثال

11 پچي پريو يسوع ڪهيو ڪم، ”هيڪي منڪ را بي ڏيڪرا هئا. 12 نني ڏيڪري آڀري باپ ني ڪهيو ڪم، ’ابا، ملڪيت ۾ جڪو پي مهاري حصو هي، او مهني ڏي.‘ ايئي تي اوني ري باپ آڀري ملڪيت بيئون ڏيڪرون ۾ بلائي چوڙي. 13 ڪينڪه ڏنون شون پچي ننيو ڏيڪرو آڀرو شجو ڪين لي ڪي الگي ملڪ بونو گيو هان اوڻ آڀري ملڪيت پونڏي ڪومون ۾ اڏائي چوڙي 14 هان اوني رو شجو ڪين ختم هوئي گيو. ائون ڏنون ۾ اوني ملڪ ۾ تموم گهڻو ڏڪال پڙيو هان او بوک مرڻ لاگو. 15 تو او اوني ملڪ ري هيڪي منڪ ڪيڍي مڙوري ڪرڻ گيو هان اوني منڪ اوني ني آڀري بني ۾ شوئر چارڻ رو ڪوم ڏينو. 16 اوڻ اوني ني ڪو پي ٻاتي ڪونهي ڏيتو، ايئي ري ڪري اوني رو من ڪرتو ڪه جڪو قلبي شوئر ڪاوي هي، ائون شون آڀرو پيت ڀري، پڻ او پي اوني ني ڪونهي ملتي. 17 پچي اوني آڀري من ۾ شوچو ڪم، ’مهاري ابا ري نوڪرون ني ڏنو شون ٻاتي ملي هي، پڻ هون تو ايت بوتي مرو هون. 18 همي هون آڀري ابا ڪيڍي جائين هان اوني ني ڪين ڪه ابا، هون ايشور رو هان تارو ڏوهي هون. 19 هون ايئي لائق ڪونهي ڪه همي تارو ڏيڪرو ڪهيجون، پڻ دايا ڪري مهني آڀرو نوڪر ڪري راڪ.‘ 20 او آي شوچي آڀري باپ ڏيما جاوڻ لاگو. جڏي اوني ري باپ آڀري ڏيڪري ني الگي پون شون آونو ڏينو، تو اوني ني آڀري ڏيڪري تي دايا آئي هان ناشي جائي اوني ڪيڍي گيو هان ٻات گهاتي مينڪي ڏيني. 21 ڏيڪري اوني ني ڪهيو ڪم، ’ابا، هون ايشور رو هان تارو ڏوهي هون. هون همي ايئي لائق پي ڪونهي ڪه تارو ڏيڪرو ڪهيجون.‘ 22 باپ آڀري غلومون ني ڪهيو ڪم، ’چيڪا هوئي فوٽري شون فوٽرا گاپا ايئي ني پيرائو هان پگون ۾ جتا هان هات ۾ بيتي پيرائو. 23 پچي جائو هان هيڪ موتو پهرو باڊي شنو طعوم تيار ڪرو ڪه آبي پيڙا ڪائون هان خوشي ملهائون. 24 ڪيونڪه مهاري آي ڏيڪرو موتو هتو، همي جيتو هيو هي، گميجو هتو، همي لادو هي.‘ پچي او خوشي ڪرڻ لاگو.



ملڪيت ڪُن ڏيڻي؟<sup>13</sup> ڪو پي نوڪر هيڪي ٿيم ۾ پيئون مالڪون ري شيوا ڪري ڪونهي شگهتو، ڪيونڪه جون تو هيڪي ري گلا ڪرشي هان بيجي شون پريم ڪرشي جون هيڪي شون وفادار ريشي هان بيجي شون دگا ڪرشي. ايني نموني تي هيڪي ٿيم ۾ ايشور هان دن پيئون ري شيوا ڪري ڪونهي شگهتا.“

### پريو يسوع رو فريسي منڪون ني چينيٽ

<sup>14</sup> فريسي منڪ دن شون تموم گهڻو پريم ڪرنا، ايني ري ڪري او پريو يسوع ري بات سڻي نونلي ڪرڻ لاگا. <sup>15</sup> پريو يسوع اوتون ني ڪهيو ڪم، ”تي او هو جڪو منڪون آگهي آبي شاجا شمعجو هو، پڻ ايشور تونري من ني اولڪي هي. ڪيونڪه جڪي شيون ري قدر دنياوي منڪ ڪري هي ايشور ري نظر ۾ اوني ري ڪو پي قدر ڪونهي.“

### پريو يسوع رو شريعت ري باري ۾ شيڪاوڻ

(متي 5:31-32، 11:12-13؛ مرقس 10:11-12)

<sup>16</sup> پريو يسوع ڪهيو ڪم، ”شريعت هان نبين ري باتون پويتر سنون ڏيوڻ آلي يوحنا توڻي هي. اوني شون بيجي ايشور ري بادشاهي ري باري ۾ خوشي ري خبر سڻائي جاوي پري هان هر هيڪ اوني بادشاهي ۾ جاوڻ ري شارو تموم گهڻي ڪوشش ڪري پڙيو. <sup>17</sup> پڻ ايني رو اي مطلب ڪونهي ڪه شريعت ختم هوئي ري. ڌرتي هان آڪاش تو متي شگهي هي، پڻ شريعت رو هيڪ پي آڪر متي ڪونهي. <sup>18</sup> مثال ري بات، جي ڪن آپري لگائي ني ڦٽي ڪري بيجي لگائي شون بيان ڪري هي، تو او زنا ڪري هي هان جڪو ڦٽي ڪيوڙي لگائي شون بيان ڪري هي، تو او پي زنا ڪري هي.“

### امير هان لعزر نون ري غريب رو مثال

<sup>19</sup> پچي پريو يسوع ڪهيو ڪم، ”هيڪ امير منڪ هتو جڪو ڦوترا گاپا پيرتو هان هر روز سنا سنا طعوم کاوتو هان تموم گهڻو موج شون ريتو. <sup>20</sup> اوني امير منڪ ري در تي لعزر نون رو هيڪ غريب منڪ پڙيو ريتو، جڪو ناسورون شون پريجوڙو هتو. <sup>21</sup> او ايني آسري ۾ بيٺو هتو ڪه امير منڪ ري بچوڙي ٽڪڙون شون آپرو پيت پري. اتر توڻي ڪه ڪنا پي اوني راقت چاتنا. <sup>22</sup> پچي ايتون هوپو ڪه او غريب مري گيو هان فريشتون اوني ني ڪڍي سرگ ۾ ايراهيم ري پاسي ۾ پيشاڙيو. پچي امير منڪ پي مئون هان منڪون لي جاني بوري چوڙيو. <sup>23</sup> او امير منڪ نرگ ۾ گيو جيٽ او تموم گهڻو ڏڪون ۾ هتو. پچي جڏي اوني آپري اونڪي ڪولي، تو الڳي پون شون ايراهيم ڪڍي لعزر ني پينوڙو ڏينو. <sup>24</sup> ايني تي اوني رڙ ڪري ڪهيو ڪم، ’ڏاڏا ايراهيم، مهني تي دايا ڪرو هان لعزر ني ميلو، تو او آپري اونگڙي پوڻي ۾ پوڙي مهاري زبون ني ناري، ڪيونڪه هون ايني باشڏي ۾ تڙيون پڙيو.‘ <sup>25</sup> ايراهيم ڪهيو ڪم، ’ڏيڪرام، ياد ڪر ڪه تي آپري زندگي ۾ آپري حصي ري سڻي سڻي شيون ليئي ري، پڻ لعزر ني خراب شيون ملتي. ايني ري ڪري همي ايت اي آروم ۾ هي هان تو ڏڪون ۾ هي. <sup>26</sup> ايني شجي باتون شون تال تونري هان مهوري بچ ۾ هيڪ موتي ڪڏ هي. ايني

ري ڪري نڪو ٿون ۾ ڪو ايت آئي شگهي هان نڪو ايت شون ڪو اوت جائئي شگهي. 27 امير منڪ ڪهيو ڪم، 'شاجيلي ڏاڏا، هون ٿئي منٽ ڪرون هون ڪه ٿي لعز نِي پاچو جگت ۾ مهاري باب ري گهري ميلو. 28 ڪيونڪه مهارا پونج پائي هي. او جائئي اوئون نِي شمجهاوي هان ايشون باتون ري گواهي ڏي، متان او پي ايئي ڏڪون ري جگها ۾ آوي. 29 ايراهيم اوئي نِي ڪهيو ڪم، 'اؤون ڪيڏي توريت شاستر هان نبيون را شاستر تو هي. او اوئون نِي پڙهي شئي هان اوئون تي بي. 30 پچي امير منڪ ڪهيو ڪم، 'نا ڏاڏا نام جي ڪو مئونزون شون اوئون ڪيڏي جاشي، تو او توبهون ڪرشي. 31 ايراهيم اوئي نِي ڪهيو ڪم، 'جڏي او موسي هان نبيون ري ڪونهي شنتام، تو پچي جي ڪو مئونزون شون جيتو هووي، تو او اوئي ري پي ڪونهي مني. 32

### ڏوه معاف ڪرڻ

(متي 18:6-7، 21-22؛ مرقس 9:42)

**17** 1 پچي پريو يسوع آڀري چيلون نِي ڪهيو ڪم، "ايئون هوئي ڪونهي شگهو ڪه منڪ پاپ ني ڪري، پڻ ڏڪ هي اوئي تي جڪي ري ڪري منڪ پاپ ڪري. 2 اهڙي منڪ ري شارو شنو آي هوشي ڪه اوئي ري گلي ۾ گهتي رو پڙ پوندي شمندر ۾ نوڪيو جاوي ڪه اوئي ري ڪري گهت وشواس آلا پاپ ني ڪري. 3 ياد راک، جي تارو پائي تارو ڏوه ڪري، تو اوئي نِي شمجها هان جي او معافي مونگي، تو اوئي نِي معاف ڪر. 4 جي او هيڪي ڏن ۾ شات گهمرا تارو ڏوه ڪري هان شاتوين گهمري ٿي ڪيڏي آئي معافي مونگي، تو اوئي نِي معاف ڪر."

### وشواس

5 پچي پريو يسوع ري سنتون ڪهيو ڪم، "مهورو وشواس بدائو." 6 پريو يسوع ڪهيو ڪم، "جي تونرو وشواس شرسيون ري ڏوئي جترو پي هووي، تو ٿي ايئي ٿوت ري بڻ ني ڪئي شگهو هو ڪه پال شون اڪڙي شمندر ۾ جائئي اگ، تو او تونرو ڪيوڻ ضرور ڪرشي."

### مالڪ هان غلوم رو مثال

7 پچي پريو يسوع ڪهيو ڪم، "ايئون شمجهو ڪه ٿون ۾ ڪي هيڪي رو غلوم هل ڪيڙي جون مال چاري پاچو آوي، تو ڪي تي اوئي نِي ڪشو ڪم، 'پيل مهني ڪيڏي آئي بائي ڪا. 8 نام، ٿي ايئون ڪڏي پي ڪونهي ڪو، پڻ ٿي آي ڪشو ڪم، 'مهاري شارو بائي گهڙ هان جتري توڻي هون ڪائون پيئون ني، اٿري توڻي مهاري شيوا ري شارو ايو ري. اوئي شون پچي ٿو بائي ڪائي. 9 جي غلوم آڀري مالڪ رو حڪم مني هي، تو او آڀري مالڪ تي ٿورو ڪونهي ڪرتو. 10 ايئي آلي ڪار جڏي ٿي شجي حڪمون تي بو هوم، تو ايئون شمجهو ڪم، 'مهني ڪي تي ڪو ٿورو ڪونهي ڪرتا، ڪيونڪه جڪو ڪوم مهوني ڪرڻو هي، اوج مهني ڪرون هون."

## پريو يسوع رو دَس ڪوڙهيا شاجا ڪرڻ

11 هيڪ ڏن پريو يسوع يروشلم شهر ڏيشا جاوڻ ري شارو سامريا هان گليل علائقي ري بچ شون لنگهيو. 12 جڏي او هيڪي گون ۾ پڳڻ آڻو هتو، تو مارگ ۾ دَس ڪوڙهيا اُئي ڪڍي آيا. 13 او ڪوڙهيا الگا اُئي زور شون ڪيوڻ لاگا ڪم، ”يسوع، اي گرو جي، مهون تي دايا ڪرو.“ 14 پريو يسوع اوتون ني جوئي ڪهيو ڪم، ”جائو هان آيو آيني ايشور ري بوجاريون ني بتائو ڪه تي شاجا هوئي آچا اوجلا هويا هو.“

جڏي او جاوتا پتيا، تو ايتون هويو ڪه بيتي مارگ ۾ او آپري بيماري شون پويتر هوئي ڳيا. 15 ايني شون پچي هيڪ جڪو آپري بيماري شون شاجو هويو هتو، او ايشور ري بدائي ڪرتو پاچو آيو. 16 او منڪ سامري قوم رو هتو. او پريو يسوع ري بگون ۾ موڏي توڻي ڪريو هان اُئي را تورا منڻ لاگو.

17 پريو يسوع اي جوئي ڪهيو ڪم، ”ڪي دَس را دَس آپري بيماري شون شاجا ڪونهي هويا؟ تو پچي بيجا نئو ڪيٽ هي؟“ 18 ڪي ايني شون تال، جڪو يهودي ڪونهي، بيجو ڪو پي ڪونهي هتو، جڪو پاچو آئي ايشور ري بدائي ڪري؟“ 19 پچي پريو يسوع اُئي ني ڪهيو ڪم، ”اُئي، آپري گهري جا. تاري وشواس ٿي شاجو ڪئو هي.“

## ايشور ري بادشاهي رو آوڻ

(متي 24:23-28، 37-41)

20 هيڪ ڏن فريسي منڪون پريو يسوع شون پوچو ڪم، ”ايشور ري بادشاهي ڪڏي آشي؟“ تو پريو يسوع اوتون ني بلتي ڏيني ڪم، ”اهڙي ڪو پي نشوني ڪونهي هوئي، جڪي شون ايشور ري بادشاهي ري آوڻ ري خبر پڙي. 21 منڪ ايتون ڪونهي ڪي ڪم، ايشور ري بادشاهي ايت هي جون اوڻ هي.“ پڻ حقيقت ۾ ايشور ري بادشاهي، تو تون ۾ هي، تي جڪو مهني تي وشواس راکو هو.“

22 پچي پريو يسوع آپري چيلون ني ڪهيو ڪم، ”او ڏن آشي جڏي تي مهني يعني منس پتر ري ڏنون ۾ هيڪي ڏن ني جوئڻ ري اميد راکشوم پڻ تي جوئي ڪونهي شگهو. 23 منڪ توني ڪشي ڪه جوئو، منس پتر ايت هي، جون اوڻ هي، پڻ تي اوتون ري بات ني منيا هان ني اوتون لاري جايا.“

24 ڪيونڪه جون ڪيوڻ آڪاش ۾ چمڪي هي هان شجائي منڪ اُئي ني ڏيڪي هي، ايتوچ هون منس پتر آپري ڏن تي آئين. 25 پڻ ايني شون پيل مهني تموم گهڻا ڏڪ ڏيڪڻا هي هان ايني زموني را منڪ مهني ڪونهي مٺي. 26 جون نوح ري ڏنون ۾ هويو هتو، اوتوچ نموني مهني منس پتر ري ڏنون ۾ پي هوشي. 27 نوح رو بيڙي ۾ چڙهڻ توڻي منڪ کاوتا پيتا هان بينان بدوڻا ڪرڻ هان ڪراوڻ ۾ لاگوڙا هتا. پچي بوڏ ائي هان شجائي بوڏي مونا.

28 لوط ري زموني ۾ پي ايتوچ هويو هتو منڪ کاوتا پيتا، ڪاروبار ڪرتا، بني ڪرڻ هان آپرا گهر ناوڻ ۾ لاگوڙا هتا. 29 پڻ جڪي ڏن لوط سدوم شهر شون نڪريو، تو ايشور آڪاش شون باشدي هان بلڻ آلا پتر برشاي هان شجون ني برباد ڪري چوڙيا. 30 مهني منس پتر ري آوڻ ري ڏنون ۾ پي ايتوچ هوشي. 31 اُئي ڏن جڪو آپري گهر ري چت تي هوئي، تو او ڪو پي سيمون ليون ري شارو هينا ني اُتر هان ايني نموني جي ڪڻ بني ۾ هوئي، تو او پي ڪو سيمون ليون ري شارو پاچو ني جاوي. 32 ياد راکو، لوط ري لڳائي شون ڪي هويو هتو. 33 جڪو پي آپري حياتي بچاشي، تو

او اُوئي نِي گُماشِي پڻ جڪو آڀري حياتي گُماشِي، تو او اُوئي نِي بچاشي. 34 هُون تُونِي ڪونه هون ڪه اُوئي رات بي جڻا هيڪي بچوڻي تي سوتوڙا هوشي، تو ايشور هيڪي نِي آپ ڪڍي اُتاشي هان بيجو ڦنو ڪرشي. 35 بي لڳائي پيڙي گهڙي پيشتي هوشي، تو ايشور هيڪي نِي آپ ڏيشا اُتاشي هان بيجي نِي ڦٽي ڪرشي. 36 [بي آڏمي بني ۾ ڪوم ڪرنا هوشي، تو ايشور هيڪي نِي ڪڍي ليشي هان بيجي نِي اوتج ڦنو ڪرشي. 37 پچي چيلون پريو يسوع شون پوچو ڪه، ”اي پريو، اي ڪيت هوشي؟“ اُوئي اوتون نِي ڪهيو ڪه، ”جيت ڏونڊ هوشي، اوت گريجون پيڙي هوشي.“

### رونڊپير هان جج رو مثال

18 <sup>1</sup> پچي پريو يسوع آڀري چيلون نِي ڪهيو ڪه، ”هر تيم پرائنا ڪرنا رهيا هان همت نِي هاريا.“ اي بات شمجهاوڙ ري سازو اوتون نِي اي مثال ڏي ڪهيو ڪه، <sup>2</sup> ”ڪي شهر ۾ هيڪ جج هتو. او نڪو ايشور شون بيئاجتو هان نڪو اُوئي نِي منڪون ري ڪو پرواه هتي. <sup>3</sup> اُوئي شهر ۾ هيڪ رونڊپير لڳائي هتي، جڪو گهڙي گهڙي جج ڪڍي آئي اُوئي نِي منٽ ڪري ڪيتي ڪه، ’مهرونڀي ڪري مهارو انصاف ڪرو هان مهني مهاري دشمن شون بچائو.‘ <sup>4</sup> جج تموم گهڙي ڏنون توڙي اُوئي ري ڪو پي بات ڪونهي شطي، پڻ نيٺ اُوئي شوچو ڪه، ’مهني نڪو تو ايشور رو پي هتي هان نڪو تو منڪون ري پرواه هتي. <sup>5</sup> پڻ اي رونڊپير مهني ڪڪ ڪرتي ري هتي، ايئي ري ڪري هون ايئي رو انصاف ڪرين. ايئون ني هوڙي ڪه اي گهڙي گهڙي آئي مهني بيزار ڪري.‘ <sup>6</sup> شٽو، جي اي بي انصاف جج پي ايئوج شوچي هتي، <sup>7</sup> تو پچي ايشور آڀري چونڊيوڙي منڪون رو انصاف ضرور ڪرشي، جڪو ڏن رات اُوئي شون مدد ري منٽ ڪري هتي، او اوتون ري مدد ڪرڻ ۾ ڪڏي پي دير ڪونهي ڪري. <sup>8</sup> هون تونِي ڪونه هون ڪه او يڪدم اوتون رو انصاف ڪرشي. تو پي جڏي هون منش پتر پاچو آئين، تو ڪي منڪون ۾ اهڙو وشواس هوشي، جون نا؟“

### فريسي هان ناڪو ليون آڻي رو مثال

<sup>9</sup> پچي پريو يسوع اوتون منڪون نِي اي مثال شٽايو جڪو آڀرو آڀني نيڪ شمجھتا هان بيجون نِي گهٽ شمجھتا. <sup>10</sup> پريو يسوع ڪهيو ڪه، ”بي منڪ ايشور ري گهر ۾ پرائنا ڪرڻ گيا. اوتون ۾ هيڪ فريسي هان بيجو ناڪو ليون آڻو هتو. <sup>11</sup> فريسي منڪ آڻي آڀري من ايئون پرائنا ڪرڻ لاگو ڪه، ’اي ايشور، هون تارو شڪر ڪرون هون، ڪيونڪه هون بيجون آڻي ڪار ڏلمي، بئيمون، زناڪار هان نڪو ايئي ناڪو ليون آڻي جهڙو هون. <sup>12</sup> هون هفتي ۾ بي گهمرا روزا پي راکون هون هان آڀري سجي ڪمائي رو ڏهون حصو پي ڏيون هون.‘ <sup>13</sup> پڻ ناڪو ليون آڻو الگو ايو رهيو هان آڪاش ڏيشا پي ڪونهي جوپو هان آڀري چاتي پيتي ايئون ڪيوڻ لاگو ڪه، ’اي ايشور، مهني پاپي تي دايا ڪر.‘ <sup>14</sup> هون تونِي ڪونه هون ڪه فريسي نام، پڻ ناڪو ليون آڻو ايشور ري نظر ۾ نيڪ هوئي آڀري گهري گيو. ڪيونڪه جڪو آڀرو آڀني موتو شمجھي هتي، او گهٽ ڪيو جاشي، پڻ جڪو آڀرو آڀني گهٽ شمجھي هتي، او موتو ڪيو جاشي.“

## پريو يسوع رو ٻالون ني برکت ڏيوڻ

(متي 15:13-19؛ مرقس 10:13-16)

<sup>15</sup> پڇي ڪئينڪه منڪ آڀرا ٻالبا پريو يسوع ڪڍي لي آيا ڪه او اُونون ماڻي هات راڪي برکت ڏي، تو آي جوئي چيلون اُونون ني دڙڪا ڏي ٻالبا.

<sup>16</sup> پڻ پريو يسوع ٻالون ني آب ڪڍي هيلو ڪيو هان چيلون ني ڪهيو ڪه، ”ٻالون ني مهني ڪڍي اوڻ ڏيئون، اُونون ني ٻالو ني، ڪيونڪه ايشور

ري بادشاهي اُونون ري شارو هي جڪو ايشور ٻالون آئي ڪار هي. <sup>17</sup> هون توني شاجي ڪونه هون ڪه جڪو پي ايشور ري بادشاهي ني ٻال آئي

ڪار قبول ڪونهي ڪري، تو او ڪڏي پي ايشور ري بادشاهي ۾ جائي ڪونهي شگهتو.“

## شاهوڪار هان ايشور ري بادشاهي

(متي 16:19-30؛ مرقس 10:17-31)

<sup>18</sup> هيڪ ڏن يهوديون ري هيڪي سردار پريو يسوع شون پوڄو ڪه، ”گرو جي، ٿي تو نيڪ هو. مهني سٺائو ڪه هون ڪي ڪرون ڪه ايشور مهني

امر جيون ڏي؟“ <sup>19</sup> پريو يسوع اوني ني ڪهيو ڪه، ”تو مهني نيڪ ڪيئون ڪي هي؟ ايشور شون نال بيجو ڪو پي نيڪ ڪونهي. <sup>20</sup> تني ايشور

ري حڪمون ري تو خبر هي ڪه زنا ني ڪم، خون ني ڪم، چوري ني ڪم، ڪوڙي شاک ني پر هان آڀري ما ٻاپ ري عزت ڪر.“ <sup>21</sup> اوني ڪهيو

ڪه، ”هون ايئي شجي باتون تي ٻالڪيڻ شون بيتو ائون پڙيو.“ <sup>22</sup> جڏي پريو يسوع آي سٺيو، تو اوني ڪهيو ڪه، ”آيون ٿي ۾ هيڪ گهتائي هي.

همي تو ايشور ڪر ڪه آڀرو شجو ڪئين بيچي غريبن ۾ ٻلام، تو تني آڪاش ۾ خزونو ملشي. پڇي تو آه، هان مهارو چيلو هوئي مهاري لاري بي.“

<sup>23</sup> آي بات سٺي او منڪ تموم گهڻو پريشون هويم، ڪيونڪه او موتو شاهوڪار هتو. <sup>24</sup> پريو يسوع اوني ني پريشون ڏيڪي ڪهيو ڪه، ”شاهوڪار

منڪ رو ايشور ري بادشاهي ۾ جاوڻ تموم گهڻو ڏڪيو هي. <sup>25</sup> ايئي ۾ ڪو پي شڪ ڪونهي ڪه اونٺ رو سٺي ري ناڪي ۾ لنگهڻ ڏڪيو هي،

پڻ شاهوڪار رو ايشور ري بادشاهي ۾ جاوڻ اوني شون پي وڌيڪ ڏڪيو هي.“ <sup>26</sup> جڪون سٺيو او پوڄي لاگا ڪه، ”تو پڇي ڪيني پي مگتي

ڪونهي ملي.“ <sup>27</sup> پريو يسوع ڪهيو ڪه، ”جڪو ڪوم انسون شون ڪونهي هوتا، او ايشور ڪري شگهي هي.“ <sup>28</sup> پطرس ڪهيو ڪه، ”جوئو،

مهون آڀرا گهر چوڙي هان تونرا چيلا هوئي تون لاري بون پڙيا.“ <sup>29</sup> پريو يسوع اُونون ني ڪهيو ڪه، ”هون توني شاجي ڪونه هون ڪه جڪو ايشور

ري بادشاهي ري شارو آڀرو گهر، لڳائي، اولاد، بين پائي جون ما ٻاپ، چوڙي هي <sup>30</sup> اوني ني، ني رڱو ايئي جگت ۾ گهڻو ڪئين ملشي، پڻ اوڻ

آئي جگت ۾ امر جيون پي ملشي.“

## پريو يسوع ري تيجو گهمرو آپري موت ري اگكتي

(متي 19-17:20؛ مرقس 10:32-34)

<sup>31</sup> پچي پريو يسوع آپري بارهون چيلون ني هيڪي پاشي لي جائي كهيو ڪم، ”شئو، همي آبي يروشلم شهر ڏيسا هالون پڙيا. اوت جڪو باتون نبين مهني منش پتر ري باري ۾ لڪئي هي، او سجي باتون پوري هوشي.“<sup>32</sup> مهاري قوم را منڪ مهني جهلائي بيچي قوم ري حوالي ڪرشي. منڪ مهني تي هاشا ڪرشي، بي عزتي ڪرشي هان مهني تي ٽوڪشي.“<sup>33</sup> مهني چاهڪون هئشي هان ماري چوڙشي، پڻ هون تيجي ڏن جيتو هوئي جائين.“<sup>34</sup> چيلا آي پيد شمعهي ڪونهي شگهيا ڪه پريو يسوع رو ايني باتون رو مطلب ڪي هي.

## پريو يسوع رو اونڌي ني شاجو ڪرڻ

(متي 29:20-34؛ مرقس 10:46-52)

<sup>35</sup> پچي جڏي پريو يسوع بيتو بيتو يريخو شهر ري نيڙو پڳوم، تو مارگ ري هيڪي پاشي هيڪ اونڌو فقير پنتو پڙيو.“<sup>36</sup> اوني تموم گهڻي منڪون رو هاڪو شئي پوچو ڪم، ”آي ڪهڙو هل هي؟“<sup>37</sup> منڪون اوني ني شٽايو ڪم، ”ايت شون يسوع ناصري جاوي پڙيو.“<sup>38</sup> تو اوني فقير رڙ ڪري ڪهيو ڪم، ”اي يسوع، دائود بادشاه را اولاد، مهني تي دايا ڪرو.“<sup>39</sup> ايني تي جڪو منڪ آگهي هتا، اونون دڙڪا ڏي ڪهيو ڪم، ”مان ڪر.“ پڻ او آجون پي زور شون ڪيوڻ لاگو ڪم، ”اي دائود بادشاه را اولاد، مهني تي دايا ڪر.“<sup>40</sup> جڏي پريو يسوع آي شٽيو، تو او ابي رهيو هان حڪم ڏينو ڪم، ”اوني ني مهني ڪيڏي لي آتو.“ جڏي اوني ني پريو يسوع ڪيڏي لي آيا، تو پريو يسوع اوني شون پوچو ڪم،<sup>41</sup> ”شٽام هون تاري شارو ڪي ڪرون؟“ اوني ڪهيو ڪم، ”اي پريو، مهاري اونڪي ڪولو.“<sup>42</sup> پريو يسوع اوني ني ڪهيو ڪم، ”تاري وشواس تني شاجو ڪيو هي، همي آپري اونڪي ڪول هان جو.“<sup>43</sup> او اونچ تيم جوڻ لاگو هان ايشور ري بدائي ڪرڻ لاگو هان پريو يسوع رو چيلو هوئي اوني لاري بيوڻ لاگو. جڏي منڪون آي ڏينوم، تو اونون پي ايشور ري بدائي ڪي.

## پريو يسوع هان زڪائي

**19** <sup>1</sup> جڏي پريو يسوع يريخو شهر شون جاوتو پڙيو،<sup>2</sup> تو اوت هيڪ ناکو ليوڻ آتون رو سردار هتوم، جڪي رو نون زڪائي هتو. او موتو شاهوڪار هتو.<sup>3</sup> او پريو يسوع ني جوڻ ري ڪوشش ۾ هتوم، پڻ اوني رو قد نينو هتو هان رش ري ڪري پريو يسوع ني جوڻي ڪونهي شگهيو.<sup>4</sup> ايني ري ڪري او جوڻ ري شارو ناشي آگهي گيو هان جائي انجبر ري بڻ تي چڙهيو جڪو اوني مارگ تي هتوم، جيت شون پريو يسوع ني جاوڻو هتو.<sup>5</sup> جڏي پريو يسوع اوني جگها تي پڳوم، تو اونچو جوڻي اوني ني ڪهيو ڪم، ”زڪائي، چيڪو هينو اتر آ، ڪيونڪه آج هون تاري گهري ٻاتي ڪائين.“<sup>6</sup> آي شئي زڪائي تموم گهڻو خوش هويو هان چيڪو هينو اتريو هان پريو يسوع ني آپري گهري لي گيو.<sup>7</sup> آي جوڻي شجائي منڪ آت ۾ باتون ڪرڻ لاگا ڪم، ”جوڻو، او هيڪي پابي منڪ ري گهري گيو هي.“

8 پڇي زڪائي آڀري گهر ۾ اُٺي ڪيوڻ لاڳو ڪم، ”اي ڀرڻو، جوڻو هون آڀري مال ملڪيت رو آڏ حصو غريبن ني ڏيئون هون هان جي مهني ڪي شون نڳي ڪي هي، تو هون اونون ني چئوڻو پري ڏيئون هون.“ 9 ڀرڻو يسوع ڪهيو ڪم، ”آج ائيني گهر ۾ مڱني آئي هي، ڪيونڪه ائيني پي آڀري پڙ ڏاڏي ايراهيم آئي ڪار ايشور تي وشواس راکيو هي.“ 10 هون منهن پتر، گميجوڙون ني جوڻو هان مڱني ڏيوڻ آيو هون.“

### شونني ري شڪون رو مثال

(متي 14:25-30)

11 جڏي ڀرڻو يسوع يروشلم شهر ۾ پڳڻ آڻو هتو هان پيڙا جاوڻ آلا منڪ اينون شمعهن لاڳا ڪه ايشور ري بادشاهي همي ظاهر هوشي ري، تو ڀرڻو يسوع اونون ني اي مثال ڏينو ڪم، 12 ”هڪ امير منڪ هتو. او آڀري علائقي رو بادشاهي اختيار ليون ري شارو ڪي انگي ملڪ ڏيشا گيو. 13 جاوڻ شون پيل اوئي آڀري غلومون ۾ ڏشون ني هيلو ڪرايو هان اونون ني هڪ هڪ شونني رو شڪو ڏينو هان ڪهيو ڪم، ’مهاري پاڇي اوڻ توڻي ائيني شون ڪاروبار ڪريا.‘ 14 اوئي علائقي آلا امير منڪ شون دشمني راکتا. ائيني ري ڪري اوئي ري جاوڻ شون پڇي اونون آڀرا منڪ اي ڪي مهارجا ڪي ميليا ڪم، ’مهوري مرضي ڪونهي ڪه اي منڪ مهورو بادشاه هوي.‘

15 پڻ تو پي او منڪ بادشاه هوني پاڇو آيو. پڇي اوئي آڀرا غلوم آتيا جڪون ني شونني را شڪا ڏينا هتا ڪه اونون شون پوڇي ڪه ڪهڙو ڪاروبار ڪيو هان ڪترو فائدو ڪمايو هي؟ 16 پيلڪي غلوم آئي ڪهيو ڪم، ’اي مالڪ، تونري ڏينوڙي شونني ري شڪي شون مهني ڏش بيجا ڪمايا هي.‘ 17 بادشاه اوئي ني ڪهيو ڪم، ’شبابش، ٿي توڙي ۾ ايمونداري بتائي هي، ائيني ري ڪري همي ٿني ڏشون شهرن ري اختياري ملشي.‘ 18 پڇي بيڇي غلوم آئي ڪهيو ڪم، ’اي مالڪ، تونري ڏينوڙي شونني ري شڪي شون مهني پونج بيجا ڪمايا هي.‘ 19 بادشاه اوئي ني پي ڪهيو ڪم، ’ٿني پي پونجون شهرن رو اختيار ملشي.‘ 20 تيڇي غلوم آئي ڪهيو ڪم، ’اي مالڪ، جوڻو، تونرو ڏينوڙو شونني رو شڪو مهني زمال ۾ شينالي راکيو هتو. 21 ٿي تموم گهڻا ڏڪيا منڪ هوم ائيني ري ڪري هون تون شون بيتاجو. ڪيونڪه جڪو ٿي پيڙو ڪونهي ڪرتا او لينو هو هان جڪو ٿي ڪونهي پوڪتا، او لئو هو.‘ 22 بادشاه اوئي ني ڪهيو ڪم، ’اي پڇڙا غلوم، هون تاري باتون شون ٿني ڏوهي ڪرون هون. تو مهني اولڪنو ڪه هون ڏڪيو منڪ هون، جڪو مهني پيڙو ڪونهي ڪيو، او لينون هون هان جڪو پوڪنو ڪونهي، او لئون هون. 23 تو پڇي ٿي مهارو شڪو بياج تي ڪيون ڪونهي ڏينو ڪه او مهاري اوڻ شون پڇي بياج شوڏو پاڇو لينون تو؟‘ 24 پڇي اوئي پاشي ۾ اڀوڙي منڪون ني ڪهيو ڪم، ’او شڪو اوئي شون لي اوئي ني ڏينو جڪي ڪيڏي ڏش هي.‘ 25 منڪون اوئي ني ڪهيو ڪم، ’اي مالڪ، اوئي ڪيڏي تو اگني ڏش شڪا هي.‘ 26 بادشاه ڪهيو ڪم، ’هون توڻي ڪونه هون ڪه جڪي ڪيڏي گهڻو هي، اوئي ني آجون پي وڌيڪ ڏينو جاشي هان جڪي ڪيڏي توڙو هي، اوئي شون او پي لينو جاشي جڪو اوئي ڪيڏي هي. 27 همي ٿي مهاري اونون دشمنون ني ايت لي آتو جڪون ري مرضي ڪونهي هتي ڪه هون اونون تي بادشاهي ڪرون. اونون ني مهاري اونڪيون اگهي ماري چوڙو.‘

پريُو يسوع رو بادشاه آئي كار يروشلم ۾ جاوڻ

(متي 11-1:21؛ مرقس 11-1:11؛ يوحنا 12:12-19)

<sup>28</sup> پڇي پريُو يسوع آي باتون ڪري يروشلم شهر ڏيشا منڪون آگهي بيوڻ لاگو. <sup>29</sup> جڏي او زيتون ري جبل ڪڍي بيت فگي گون هان بيت عنيا گون ري نيڙو پڳو، تو اُوئي بيئون چيلون ني آي ڪئي ميليا ڪم. <sup>30</sup> ”شوملي گون ۾ جاو هان پڳئي ٿي هيڪ گڏيو بادوڙو ڏيڪشوم، جڪي تي آجون توڻي ڪو پي شوار ڪونهي هويو. او ڪولي مهِي ڪڍي لي آڻو. <sup>31</sup> جي ٿون شون ڪڻ پوڇي ڪم، ’ڪيئون ڪولو هو؟‘ تو ٿي ڪهيا ڪم، ’پريُو ني ايئي ري ضرورت هي.‘“

<sup>32</sup> پڇي چيلون جائِي ايتوج ڏينو جون پريُو يسوع ڪهيو هتو. <sup>33</sup> جڏي او گڏو ڪولڻ لاگام، تو اُوئي ري مالڪ اُوئون ني ڪهيو ڪم، ”ايئي ني ڪيئون ڪولو هو؟“ <sup>34</sup> اُوئون بلتي ڏيني ڪم، ”ايئي ري پريُو ني ضرورت هي.“

<sup>35</sup> پڇي او گڏي ني لي پريُو يسوع ڪڍي آيا هان گڏي مائي آيرا گاپا ڍاڙيا هان پريُو يسوع ني اُوئي تي شوار ڪيو. <sup>36</sup> جڏي او بيوڻ لاگو، تو منڪ آيرا گاپا مارگ تي پچاوڻ لاگا. <sup>37</sup> پڇي جڏي او يروشلم ري نيڙو زيتون ري جبل ري لاهي تي پڳو، تو اُوئي را سجائي چيلا خوش هوئي ايشور ري ٻڌائي ڪرڻ لاگام ڪيونڪه اُوئون پريُو يسوع را سجائي پرچا ڏينا هتا. او زور شون جني كار ڪرڻ لاگا ڪم.

<sup>38</sup> ”ڏن هي آي بادشاهم

جڪو پرميشور ري نون شون آوي هي.

آڪاش ۾ سُڪ هووي

هان شرگ ۾ ايشور ري جني جني كار.“

<sup>39</sup> رش ۾ فريسيون ري ڪئينڪه منڪون ڪهيو ڪم، ”گرو جي، آيري چيلون ني ماڻ ڪرائو.“ <sup>40</sup> پريُو يسوع ڪهيو ڪم، ”هُن توڻي ڪونه هون ڪه جي آي ماڻ هويا، تو پتر پي رڙي ڪرڻ شروع ڪشي.“

<sup>41</sup> جڏي پريُو يسوع يروشلم ري نيڙو آيو، تو اُوئي ني جوئي روڻڻ لاگو، پڇي ڪهيو ڪم، <sup>42</sup> ”اي يروشلم آئون، جي ٿون رگو آجوكي ڏن ري او

باتون اولڪئي هوونت، جڪو سُڪ ڏي هي، تو ڪترو سُنو هتو، پڻ همي او باتون ٿونري سمجه شون باهر هي. <sup>43</sup> ڪيونڪه او ڏن اوڻ آلا هي،

جڏي ٿونرا ڏشمن ٿونري چوڌاري مورچا نائي ٿوني چارئي پاشي شوڙها ڪري پريشون ڪشي. <sup>44</sup> ٿوني هان ٿونري ٻائون ني ماري چوڙشي هان ٿونري

شهر ني ايئون برباد ڪشي ڪه هيڪ پي پتر شاجو ڪونهي بجي، ڪيونڪه ٿون اُوئي تيم ني ڪونهي اولڪيو، جڏي ايشور ٿوني پچاوڻ آيو هتو.“

## ايشور ري گهر شون واپاري ڪاڍڻ

(متي 17-12:21؛ مرقس 19-15:11؛ يوحنا 22-13:2)

45 جڏي پريو يسوع يروشلم شهر ۾ پڳوم، تو او ايشور ري گهر ۾ گيو. پيچي او اوئون منڪون ني باهر ڪاڍڻ لاگوم، جڪو اوت ڪاروبار ڪرتا پڙيا.

46 پريو يسوع اوئون ني ڪهيو ڪم، ”شاستر ۾ لڪيوڙو هي ڪم.

’مهرو گهر پرائنا رو گهر هوشي‘

پڻ تون ايئي ني ڌاريلون رو آڏو نائي چوڙيو هي.“

47 پيچي پريو يسوع هرور ايشور ري گهر ۾ شيڪاوتو. ايشور را موتا پوجاري هان ڌرمي گرو هان يهودي اگروڻ اوئي ني مارڻ ري ڪوشش ۾ هتا

48 پڻ اوئون ني ڪو پي موقعيو ڪونهي مليوم، ڪيونڪ چارئي پاشي منڪ هوتا هان او پريو يسوع ري باتون شوق شون سٺتا.

## پريو يسوع ري اختيار ري باري ۾ سوال

(متي 27-23:21؛ مرقس 33-27:11)

1 هيڪ ڏن جڏي پريو يسوع ايشور ري گهر ۾ منڪون ني شيڪاوتو پريو هان ايشور ري بادشاهي ري باري ۾ خوشي ري خبر سٺاوتو

**20** پريو، تو ايشور را موتا پوجاري، ڌرمي گرو هان يهودي اگروڻ اوئي ڪيڍي آيا. 2 اوئون اوئي شون پوچو ڪم، ”مهوني سٺا، تو آي ڪوم ڪيري اختيار شون ڪري هي؟ ٿئي آي اختيار ڪي ڏينو هي؟“ 3 پريو يسوع اوئون ني ڪهيو ڪم، ”هون پي تون شون هيڪ سوال پوچون هون. مهني سٺاوم، 4 ڪي يوحنا ايشور ري طرفون پوٽر سنون ڏيتوم، جون انسون ري طرفون؟“ 5 ايئي تي او آيت ۾ ڪيوڻ لاگا ڪم، ”جي آبي ڪونه ڪه ايشور ري طرفون، تو پيچي او آيون ني ڪشي ڪه تو پيچي تون اوئي تي پروسو ڪيون ڪونهي ڪيئو؟“ 6 هان جي آبي ڪونه ڪه انسون ري طرفون، تو سچائي منڪ آيون ني پتر هئي ماري چوڙشي، ڪيونڪ منڪون ني پڪ هي ڪه يوحنا نبي هتو.“ 7 ايئي ري ڪري اوئون ڪهيو ڪم، ”مهوني خبر ڪونهي ڪه او ڪيري طرفون پوٽر سنون ڏيتو.“ 8 پريو يسوع اوئون ني ڪهيو ڪم، ”تو پيچي هون پي توني ڪونهي سٺائون ڪه هون آي ڪوم ڪيري اختيار شون ڪرون هون.“

## انگورون ري باگ ري نيڪدارون رو مثال

(متي 46-33:21؛ مرقس 12-1:12)

9 پيچي پريو يسوع منڪون ني آي مثال ڏينو ڪم، ”هيڪي منڪ انگورون رو باگ لگايو. پيچي باگيون ني نيڪي تي ڏي آڀ گهڻي ڏنون ري ساڙو

بيجي ملڪ بونو گيو. 10 جڏي انگورون ري مند آئي، تو اوئي آڀري هيڪي غلوم ني باگيون ڏينسا ميليو ڪه اوئون شون انگورون رو حصو لي آوي،

پڻ باگيون غلوم ني مار ڏي ڪالي هات پاچو ميليو. 11 پيچي مالڪ آڀرو بيجو غلوم ميليو. اوئون اوئي ني پي مار ڏيني هان بي عزتو ڪري ڪالي

هاٽ پاڇو ملبو. 12 پڇي مالڪ آيو تيجو غلوم ملبو. اُونون، اُوئي نِي پِي لُوئي جهوڻ ڪري ڏڪا ڏي ڪاڍي چوڙيو. 13 اِئي تي باگ رِي مالڪ سوچو ڪم، ’هَمي هُون ڪي ڪرون؟ هُون آيو پيارو ڏيڪرو ميلين. هُوئي شگهي، او اِئي رو خيال ڪري.‘ 14 جڏي باگيون اُوئي نِي ڏينوم تو آيت ۾ صلاح ڪي ڪم، ’اِي باگ رو بارش هي. جي آبي اِئي نِي ماري چوڙون، تو اِي باگ آيتو هُوئي جاشي.‘ 15 پڇي اُونون، اُوئي نِي باگ شون ٻاهر ڪاڍي ماري چوڙيو. هَمي باگ رو مالڪ اُونون شون ڪي ڪرشي؟ 16 او آئي باگيون نِي نپ ماري چوڙشي هان باگ ڪي پيجون نِي ڏيشي.‘ اُونون اِي شئيو تو ڪيوڻ لاگا ڪم ”ايشور خير ڪري.“ 17 پريو يسوع اُونون ڏيما جوئي ڪهيو ڪم ”نو پڇي شاستر ري اِئي لکت رو مطلب ڪي هي؟“

’جڪي پتر نِي ڪاريگرون بيڪار سمجهوم

اوج شجون شون خاص پتر هويو.‘

18 جڪو پي اُوئي پتر تي ڪرشي، تو او ٽڪڙا ٽڪڙا هُوئي جاشي، پڻ جڪي ماڻي او پتر ڪرشي اُوئي نِي چپلي چوڙشي.‘ 19 ڌرمي گرو هان ايشور را موتا پوجاري سمجهي گيا ڪه اُوئي اِي مثال مهوري باري ۾ سٿايو هي. اِئي ري ڪري اُونون اُوئي نِي اُوئج تيم جهال ري ڪوشش ڪي، پڻ او منڪون شون پيئاجتا.

### ٽيڪس ري باري ۾ سوال

(متي 22:15-22؛ مرقس 12:13-17)

20 پڇي ڌرمي گروئون هان ايشور ري موتي پوجاريون پريو يسوع نِي نظر ۾ راکيو هان جاچوس چوڙيا ڪه نيڪ هُوئي اُوئي نِي ڪي بات ۾ قشاوي هان پڇي اُوئي نِي رومي گورنر ري حوالي ڪري سزا ڏيراوي. 21 اُونون پريو يسوع شون سوال پوچيو ڪم، ”گرو جي، مهني سمجهون هون ڪه جڪو پي تي ڪو هان شيڪائو هوم او صحيح هي هان تي ڪيرو پي پاشو ڪونهي ليتام، پڻ شچائي شون ايشور رو مارگ بتائو هو. 22 هَمي مهوني سٿائو ڪه روم ملڪ ري مهاراجا قيصر نِي ٽيڪس ڏيوڻ ڪبي، جون نا؟“ 23 پريو يسوع اُونون ري چالاڪي سمجهي گيو هان اُونون نِي ڪهيو ڪم، 24 ”مهني چوندي رو هيڪ شيڪو بتائو. هَمي سٿائوم اِئي تي ڪيرو قوڻو هان نون هي؟“ اُونون ڪهيو ڪم، ”مهاراجا قيصر رو.“ 25 پريو يسوع اُونون نِي ڪهيو ڪم، ”جڪو قيصر رو هي، او قيصر نِي ڏيو هان جڪو ايشور رو هي، او ايشور نِي ڏيو.“ 26 اِئي نموني او منڪون ري روبرو پريو يسوع نِي ڪي پي بات ۾ قشائي ڪونهي شگهيام، پڻ اُوئي ري بلتي تي حيرون هُوئي مات هويا.

## قيامت ري ڏن ري باري ۾ سوال

(متي 23:22-33؛ مرقس 12:18-27)

27 پڇي ڪئينڪه صدوقي منڪ، پرڻو يسوع ڪڍي آيا جڪون رو وشواس هتو ڪه مرڻ شون پڇي پڙي ڪو پي جيتو ڪونهي هوڙي. اُونڙو پرڻو يسوع شون پوڇو ڪه. 28 ”گرو جي، موسيٰ نبي مهوري شارو لکيو هي ڪه، ’جي ڪيرو پرڻيجوڙو پائي بنا اولاد مري جاوي، تو اُوڙي ري پائي رو فرض هي ڪه او آپري باپي شون بيان ڪري ڪه آپري پائي ري شارو اولاد هوڙي.‘ 29 فرض ڪرو ڪه ڪو شات پائي هتا. پيلڪي بيان ڪيو هان او بنا اولاد مري گيو. 30 پڇي پيڇي پائي، آپري باپي شون بيان ڪيو هان ڪئينڪه ڏنون شون پڇي او پي بنا اولاد مري گيو. 31 پڇي تيڃي پائي پي شاگي باپي شون بيان ڪيو. ايئي نموني شاتون پايون اينوج ڪيو هان او بنا اولاد مرنا گيا. 32 نيٺ او لڳائي پي مري گئي. 33 همي مهوني آي شنائو ڪه پڙي جيتا هوڙن آلي ڏن، او لڳائي اُونڙو شاتون پايون ۾ ڪيري لڳائي هوڙي، ڪيونڪه اُونڙو شاتون هيڪي شون بيان ڪيو هتو؟“ 34 ايئي تي پرڻو يسوع اُونڙو ني ڪهيو ڪه، ”ايئي جگت را منڪ بيان بدوڻا ڪري هي، 35 پڻ او منڪ جڪو ايشور ري نظر ۾ نيڪ هوڙي، ايشور اُونڙو ني موڙوڙو شون جيتا ڪري شُرگ ۾ راکشي. اُونڙو ۾ بيان بدوڻا ڪونهي هوڙي. 36 او موڙوڙو شون جيتا هوڙي پڙي ڪڏي پي ڪونهي مري، ڪيونڪه او ايشور ري فريشتون آلي ڪار هوڙي هان او ايشور را بال هوڙي. 37 موڙوڙو رو جيتا هوڙي اُنڙ ري باري ۾ موسيٰ پي آب بلتي بوڙي ري بات ۾ پرميشور ني ابراهيم، اضرحاق هان يعقوب رو ايشور ڪي هي. 38 ايئي ري ڪري ايشور موڙوڙو رو نام پڻ جيتون رو ايشور هي، ڪيونڪه اُوڙي ري شارو شجائي جيتا هي.“ 39 تو درمي گروڻون ۾ ڪئينڪه منڪون اُوڙي ني ڪهيو ڪه، ”گرو جي، تون صحيح بات ڪي هي.“ 40 ايئي شون پڇي ڪيني پي همت ڪونهي هوڙي ڪه او پرڻو يسوع شون ڪو سوال پوڇي.

## واعدي ڪيٽوڙي مسيح ري باري ۾ سوال

(متي 22:41-46؛ مرقس 12:35-37)

41 پڇي پرڻو يسوع درمي گروڻون شون پوڇو ڪه، ”منڪ ڪيئون مسيح ري باري ۾ ڪي هي ڪه او دائود رو اولاد هي؟“ 42 دائود تو آب، آپري زبور شاستر ۾ ڪي هي ڪه،

’پرميشور مهاري پرڻو ني ڪهيو ڪه،

تو مهاري شاجي پاشي پيش.

43 جتري توڙي هون تارا دشمن هرائي

تاري پگون هينا ني ڪرون.

44 جڏي دائود آب، مسيح ني پرڻو ڪي هي، تو پڇي او اُوڙي رو ڏيڪرو ڪيڪر هويو؟“

### نگ ڌرمي منڪون شون هوشيار ڪرڻ

(متي 1:23-36؛ مرقس 12:38-40)

45 جڏي شجائي منڪ آي باتون سُڻتا پڙيا، تو پرڻو يسوع آڀري چيلون ني ڪهيو ڪم، 46 ”تي ڌرمي گروئون شون هوشيار رهيا، جڪو موتا موتا جُبا پيري اينا اونا ڦرڻ پسند ڪري هي ڪه شهر ۾ منڪ اوتون ني عزت شون نمسڪار ڪري هان او پگتي گهرون هان موتي دعوتون ۾ شجون شون عزت آلي خاص جگها تي پيشاڙي. 47 او رونڊبير لگايون ري گهرون تي قبضا ڪري هي هان آڀني نيڪ بناوڻ ري شارو لونبي لونبي پرائنائون ڪري هي. اهڙي منڪون ني تموم گهڻي سزا ملشي.“

### رونڊبير لگائي رو دون ڏيوڻ

(مرقس 12:41-44)

21 <sup>1</sup> پڇي پرڻو يسوع ڏينو ڪه ڪئينڪه امير منڪ ايشور ري گهر ۾ راکيوڙي دون ري بيتي ۾ آڀا آڀا دون ڏي پڙيا. <sup>2</sup> اوڻ هيڪ غريب رونڊبير لگائي پي آئي جڪي بي شڪا ڏينا. <sup>3</sup> آي جوئي پرڻو يسوع ڪهيو ڪم، ”هُن توني ڪونه هون ڪه حقيقت ائي غريب رونڊبير شجون شون وڌيڪ دون ڏينو هي. <sup>4</sup> ڪيونڪه اوتون شجون آڀري گهڻي ملڪيت ري ڪري دون ڏينو هي، پڻ ائي رونڊبير آڀري غريبي حال ۾ جڪو ڪئين ائي ڪڍي هتم، او شجوئي دون ۾ ڏينو هي.“

### ايشور ري گهر ري باري ۾ اگڪتي

(متي 2:1-24؛ مرقس 1:13-2)

<sup>5</sup> جڏي پرڻو يسوع را چيلا ايشور ري گهر ري باري ۾ آي ڪيتا پڙيا ڪم، ”ايشور رو گهر قيمتي پترون هان دون ڪيوڙي شيون شون فونرو شجايڙو هي.“ ائي تي پرڻو يسوع ڪهيو ڪم، <sup>6</sup> ”او ڏن پي آشي ڪه جڪو ڪئين تي ايت ڏيڪو هو، اوتون رو هيڪ پي پتر شاجو ڪونهي بچي هان شجو ڪئين پڪوريو جاشي.“

### ڏڪ مڙيوتون ري باري ۾ اگڪتي

(متي 14:3-24؛ مرقس 13:3-13)

<sup>7</sup> چيلون اوني شون پوڇو ڪم، ”گرو جي، آي باتون ڪڏي هوشي هان ڪهڙو نشون هوشي جڪي شون خبر پڙشي ڪه همي آي هوڻڻ آو هي؟“ <sup>8</sup> پرڻو يسوع ڪهيو ڪم، ”هوشيار رهيا، متان ڪو توني دوکو ڏي، ڪيونڪه تموم گهڻا مهاري نون شون آشي هان ڪشي ڪم، هون مسيح هون.“ <sup>9</sup> پڇي آي پي ڪشي ڪم، ”تيم نيڙو آيو رو.“ پڻ تي اوتون ري باتون تي ڪڏي پي ڀروسو ني ڪريا. <sup>9</sup> تي جنگ هان جهيڙون ري باتون سُڻوم، تو گهرايا ني، ڪيونڪه ائون ضرور هوشي، پڻ آي جگت چيڪو ختم ڪونهي هووي.“

10 پچي پريو يسوع اوتون ني كهيو كه، ”قوم، قوم شون هان بادشاهي، بادشاهي شون پڙشي. 11 موتا موتا زلزلا آشي هان هر جگها دکال پڙشي هان موتي موتي بيماري بدي جاشي. آکاش تي موتا موتا نشون ڏيکيجشي، جگي شون منک بيناجي جاشي. 12 پڻ اي شجو کين هوڻ شون پيل منک مهاري نون ري کري توني جهلاشي هان دک ڏيشي. او توني پگني گهرون ري اگوڻون ري حوالي کڙشي هان جيل ڏيراشي هان بادشاهون هان اگوڻون کيڊي لي جاشي. 13 اهڙي تيم توني مهاري گواهي ڏيوڻ رو موقعو ملشي. 14 ايئي ري کري تي آپري من ڀر گڻي ني کريا که مهني کهڙي بلتي ڏيشون. 15 کيونکه هون آپ توني سمجه هان بولڻ را آکر ڏين که کو پي دشمن تون شون هوڏ کري کونهي شگهي هان نکو تونري باتون ني کورڙي کري شگهي. 16 تورا ما باپ، پائي، عزيز هان دوست پي توني جهلاشي، پڻ تون ڀر او کيني مراني پي چورشي. 17 منک مهاري نون ري کري تون شون دشمني راکشي. 18 پڻ کو پي تونرو کين کونهي کري شگهي. 19 اي شجو کين برداش کڙو، تو توني امر جيون ملشي.“

### يروشله ري بربادي ري باري ڀر اگکتي

(متي 24:15-21؛ مرقس 13:14-19)

20 پچي پريو يسوع كهيو كه، ”جڏي تي يروشلم شهر تي فوج رو گهيرو ڏيکوم، تو سمجها که اوئي ري بربادي رو تيم نيڙو آيو هي. 21 اوئي تيم جکو يهوديا صوبي ڀر هووي، او جبلون ڏينما ناشي جاوي. جکو يروشلم ڀر هووي، او باهر نکري جاوي. جکو باهراڙي ڀر هووي، او شهر ني جاوي. 22 کيونکه اي او ڏن هوشي، جڏي ايشور پاپي منکون ني سزا ڏيشي هان شاستر ري شجي باتون پوري هوشي. 23 دک هي اوتون لگايون تي، جکو اوتون ڏنون ڀر اُميد شون هوشي، جون آپري بالون ني ڏوڏ پياڙي هوشي. کيونکه ايئي ملڪ تي موتي مصيبت آشي هان ايشور اسرائيلي قوم ني سزا ڏيشي. 24 اوتون ڀر کينکه تلوار شون ماريا جاشي هان کينکه بيچي ملڪون ڀر قيدي هوئي جاشي هان يروشلم بيچي قوم ري هات ڀر هوشي هان او اوئي ني اوئي تيم توڻي دک ڏينا ريشي جتري توڻي اوتون ري حڪومت رو مڊو پورو ني هووي.“

### منش پتر پريو يسوع رو پڙي اوڻ

(متي 24:29-31؛ مرقس 13:24-27)

25 پچي پريو يسوع كهيو كه، ”سورج، چندر هان تارون ڀر نشوني ظاهر هوشي هان ڌرتي ري شجي قومون پريشون هوئي جاشي، کيونکه او شمندر هان اوئي ري چوليون ري گوڙ ري کري بيناجي جاشي. 26 پچي آکاش ري شجي شيون هلائي جاشي هان منکون رو ايئي بي ڀر شاش شوکي جاشي که ڌرتي تي کهڙي مصيبت اوڻ آئي هي. 27 اوئي تيم منک مهني منش پتر ني طاقت هان مهما شون باڏلون پيڙو اوتو ڏيکشي. 28 جڏي اي باتون هوڻ آئي هووي، تو اونچا اُنيا هان آپرا کوندا اونچا کريا، کيونکه تونري مگتي رو تيم نيڙو آيو هوشي.“

## انجیر ری بٹ رو مثال

(متی 35-32:24؛ مرقس 13:28-31)

<sup>29</sup> پچی پریو یسوع اوتون نی هیک مثال ڈی کهیو که ”انجیر ری بٹ هان شجی بٹون نی جوئو۔<sup>30</sup> جدی اوتون را پون اگی هی، تو تی شمجھو هو که همی اوناٹو اوتو آلو هی۔<sup>31</sup> ایئی نمونی جدی تی آی باتون هوئی ڈیکوم، تو شمجھا که ایشور ری بادشاهی اوتو آلی هی۔<sup>32</sup> هون تونی شاجی کونھ هون که جتری توتی آی شجی باتون پوری کونھی هووی، اتری توتی آی نسل کونھی مئی۔<sup>33</sup> آکاش هان ذرتی تو متی جاشی، پٹ مھاری باتون کڈی پی کونھی مئی۔“

## هوشیار ریوٹ ری ضرورت

<sup>34</sup> پچی پریو یسوع کهیو که ”هوشیار رهیا، ایئون نی هووی که تونرا من عیاشی، نشی هان ایئی حیاتی ری گنتیون م قاشی هان مھاری پاچی اوتو رو دن تون مائی اوچتو<sup>35</sup> قندی آلی کار آوی۔ هاوی، جترا پی شجی ذرتی تی ریوٹ آلی هوشی، اوتون تی آی دن آشی۔<sup>36</sup> ایئی ری کری تی هر تیم شجاگ رو هان پرائنا کرتا رو که تی ایئی شجی باتون شون بچن هان مھی منش پتر ری شومها این جھڑا هوئی شگھو۔“

<sup>37</sup> پریو یسوع هرور ایشور ری گھر م شیکاوتو هان رات رو باهر جائی زیتون نون ری جبل تی ریتو۔<sup>38</sup> شاکلی تارھی شجائی منک اوتی ری باتون شٹ ری شارو ایشور ری گھر م اوتی کیدی اوتا۔

## پریو یسوع نی مارٹ ری رتا

(متی 5-1:26؛ مرقس 14:1-2؛ یوحنا 11:45-53)

<sup>1</sup> بنا کمیر ہاتی رو پرب جکی نی فسح رو پرب پی کیتا او نیڑو آيو۔<sup>2</sup> ایشور را موتا پوجاری هان ذرمی گرو پریو یسوع نی مارٹ ری شارو کرتا، پٹ او منکون شون بیناجتا۔ ایئی ری کری او تال م هتا که چپ چاپ م اوتی نی مرانی چوڑی۔

## یھودا اسکریوتی رو پریو یسوع نی دوکو ڈیوٹ

(متی 16-14:26؛ مرقس 14-10:11)

<sup>3</sup> پچی شیطون بارھون چیلون م هیکي یھودا ری من م آیوم، جکی نی اسکریوتی کیتا۔<sup>4</sup> اوتی جائی ایشور ری موتی پوجاریون هان ایشور ری گھر ری فوج ری صوبیدار شون مشورو کیئو که پریو یسوع نی کیکر جھلائی اوتون ری حوالی کری۔<sup>5</sup> او خوش هویا هان یھودا نی پشا ڈیوٹ رو واعدو کیئو۔<sup>6</sup> یھودا پی خوش هوویو هان تال م هتو که پریو یسوع نی اھڑی تیم اوتون ری حوالی کری، جدی تموم گھٹا منک اوتی پیٹا نی هووی۔

## فَسْح پَرَب رِي ٻاٽِي رِي تِياري

(متي 25-17:26؛ مرقس 21-12:14؛ يوحنا 30-21:13)

7 جڏي فَسْح يعني بنا ڪمير ٻاٽي رو پَرَب آيو، جڪي ۾ يهودي منڪ گهٽي رو ٻليدون ڪرتا. 8 پڇي پريو يسوع، بطرس هان يوحنا ني آي ڪئي ميليا ڪه، ”جائو، آڻي شارو فَسْح پَرَب رِي ٻاٽي رِي تِياري ڪرو.“ 9 ائون، اوني ني ڪهيو ڪه، ”ٿاري ڪهڙي مرضي هي ڪه مهڻي ڪيٽ ٻاٽي رِي تِياري ڪرون؟“ 10 ايني تي پريو يسوع ائون ني ڪهيو ڪه، ”شئو، شهر ۾ جاوتي ئي ٿوني هيڪ منڪ پيڙو هوشي، جڪو پوڻي رو ڍلو ڪئي جاوتو هوشي. ٿي اوني لاري جايا هان جڪي گهر ۾ او جاوي ٿي پي اوني گهر ۾ جايا. 11 پڇي گهر رِي مالڪ ني ڪهيا ڪه، ”گرو جي، ٿي ڪهيو هي ڪه او ڪمرو ڪيٽ هي، جيت هون آڀري چيلون پيڙو فَسْح رِي پَرَب رِي ٻاٽي ڪائين؟“ 12 او ٿوني چت تي هيڪ تيار ڪيوڙو ڪمرو بناشي، ٿي اوتج فَسْح رِي پَرَب رِي ٻاٽي رِي تِياري ڪريا.“

13 چيلون جائو اينيڙو ڏينو جون پريو يسوع ڪهيو هتو هان اوت فَسْح پَرَب رِي ٻاٽي رِي تِياري ڪي.

## فَسْح پَرَب رِي آخري ٻاٽي ڪاوڻ

(متي 30-26:26؛ مرقس 26-22:14؛ 1-ڪرنتيون 25-23:11)

14 جڏي ٻاٽي رو تيم آيو، تو پريو يسوع هان اوني را سنت ٻاٽي ڪاوڻ بنا. 15 پريو يسوع ائون ني ڪهيو ڪه، ”مهاري من رِي مرضي هتي ڪه هون ڏڪ سهڻ شون پيل ايني فَسْح پَرَب رِي ٻاٽي ٿون پيڙي ڪائون. 16 ڪيونڪ هون ٿوني ڪونه هون ڪه جتري ٿوڻي فَسْح پَرَب رو مقصد ايشور رِي بادشاهي ۾ پورو ني هوڙي، اٿري ٿوڻي فَسْح پَرَب رِي ٻاٽي، پيڙي ڪونهي ڪائون.“

17 پڇي اوني انگورون رِي رس رو پيالو لي ايشور رو سُڪر ڪيو هان ڪهيو ڪه، ”آي پيالو لئو هان ٿي شجائي ايني ۾ پيئو. 18 ڪيونڪ هون ٿوني ڪونه هون ڪه جتري ٿوڻي ايشور رِي بادشاهي ني آوي، اٿري ٿوڻي هون انگورون رو رس ڪڏي پي ڪونهي پيئون.“ 19 پڇي اوني ٻاٽي لي هان سُڪر ڪري پونگي هان آي ڪئي ائون ني ڏيني ڪه، ”آي مهارو شير هي، جڪو هون ٿونري شارو ٻليدون ڪرون هون. ٿي مهاري يادگيري ۾ آي رسم اينيڙو ڪرتا رهيا.“ 20 پڇي شاگي نموني ٻاٽي ڪاوڻ شون پڇي ائون ني پيالو ڏي ڪهيو ڪه، ”آي پيالو مهاري لوي رو ٿوڻو وچن هي، جڪو هون ٿونري شارو ڏيون هون. 21 پڻ جوڻو، جڪو مهني جهلاشي، او مهني پيڙو ٻاٽي ڪاڙي پيڙو. 22 ڪيونڪ جون ايشور فيصلو ڪيو هي ڪه هون مُنش پُتر، تو ايني جگت شون جائون پيڙو، پڻ ڏڪ هي اوني تي جڪي رِي هاڻون هون جهلايو جائين.“ 23 ايني تي چيلا هيڪي پيڇي شون پوڇڻ لاگا ڪه، ”آپون ۾ او ڪيو هي، جڪو اينيون ڪرشي؟“

## چیلون رو آپت ۾ موتي هونڻ تي باڏ

24 ڀڄي خاص چيلا آپت ۾ آي بحت ڪرڻ لاڳا ڪم، ”منڪ آيون ۾ ڪيئي موتو شمعجھي هي؟“ 25 پرڻو يسوع اوتون ني ڪهيو ڪم، ”ڀڄي قوم را بادشاه آڀري منڪون تي طاقت ري زور تي حڪومت ڪري هي، پڻ تو پي او آڀني منڪون ۾ پلائي ڪرڻ آلا ڪي هي. 26 پڻ تي اوتون آئي ڪار ني ڪريام، پڻ تون ۾ جڪو موتو هي، او ننيو هووي هان جڪو اڳوڻ هي، او شيواداري هووي. 27 منڪ ڪيئي موتو شمعجھي هي؟ او جڪو بائي ڪاوڻ بينو، جون او جڪو شيواداري هي؟ ڪي او ڪونهي جڪو بائي ڪاوڻ بينو؟ پڻ هون تون ۾ شيواداري آئي ڪار هون. 28 تي او هو جڪو مهاري ڏڪون ۾ مهني پيڙا هتا. 29 ائي ري ڪري جون مهاري پتا مهني بادشاهي ڪرڻ رو حق ڏينو هي، هون پي توني بادشاهي ڪرڻ رو حق ڏيون هون. 30 تي مهاري بادشاهي ۾ مهني پيڙا ڪائو پيڻو هان تخت تي بشي اسرائيلي قوم ري بارهون قبيلون را فيصلا ڪرشو.“

## پطرس ري انڪار ري باري ۾ اگڪتي

(متي 26:31-35؛ مرقس 14:27-31؛ يوحنا 13:36-38)

31 ڀڄي پرڻو يسوع شمعون پطرس ني ڪهيو ڪم، ”شمعون، اي شمعون، مهاري بات سُڻ، شيطون توني آزماون ري موڪل لي هي ڪه او تون شجون ني ايتون ڌار ڪري، جون ڪٿڪ ني هلر گائي بوه شون ڌار ڪري هي. 32 پڻ مهني تاري شارو پرائتا ڪي ڪه ڪيٽ تارو وشواس ختم ني هووي هان جڏي تُو مهني ڪيڊي پاڇو آوي، تو آڀري پايون رو وشواس پڪو ڪرڻ ۾ همت ڏي.“ 33 پطرس اوتني ني ڪهيو ڪم، ”اي پرڻو، هون تي پيڙو جيل ۾ جاوڻ تو نهيو، پڻ مرڻ ري شارو پي تيار هون.“ 34 ائي تي پرڻو يسوع ڪهيو ڪم، ”اي پطرس، هون تني ڪونه هون ڪه آڃ ڪوڪڙي ري هونگ ڏيون شون پيل، تُو تين گهمرا مهارو انڪار ڪري ڪي ڪه تُو مهني ڪونهي اولکتو.“ 35 ڀڄي پرڻو يسوع آڀري چيلون ني ڪهيو ڪم، ”جڏي مهني توني ميليا هتا، تو ڪهيو هتو ڪه تي آپ پيڙو ڪئين ني لي جايا. ني تيلوم ني جهوئي هان ني بيجا جتا. تو ڪي توني ڪي شني ري گهتائي هوني؟“ اوتون ڪهيو ڪم، ”ڪو پي ڪوت ڪونهي هوني.“ 36 ڀڄي پرڻو يسوع اوتون ني ڪهيو ڪم، ”همي جڪي ڪيڊي تيلو جون جهوئي هي، تو او آپ پيڙا لي. جڪي ڪيڊي تلوار ڪونهي، تو او آڀرا گاپا بيڄي مول لي. 37 ڪيونڪه هون توني ڪونه هون ڪه مهاري باري ۾ آي بات ضرور پوري هوشي جون شاستر ۾ لڪيوڙو هي ڪم،

’او پايي شمعجو جاشي-‘

ائي ري ڪري جڪو ڪئين مهاري باري ۾ لڪيوڙو هي، او ضرور پورو هوشي.“ 38 چيلون ڪهيو ڪم، ”پرڻو جي، هتون مهون ڪيڊي بي تلوارون

هي.“ پرڻو يسوع اوتون ني ڪهيو ڪم، ”هتو، چوڙو.“

## پرڀو يسوع رو زبئون جبل تي پرائتا ڪرڻ

(متي 26:36-46؛ مرقس 14:32-42)

<sup>39</sup> پڇي پرڀو يسوع اڳي آئي ڪار زبئون ري جبل تي گيو هان چيلا پي اوني پيڙا گيا. <sup>40</sup> جڏي او اوت پڳام، تو پرڀو يسوع ائونون ني ڪهيو ڪم، ”پرائتا ڪرنا رو ڪه شيطان ٿونرو آزموتو ني لي.“

<sup>41</sup> پڇي پرڀو يسوع آپري چيلون ني اوتج چوڙي ٿوڙو انگو گيو هان گوڏا ڪوڙي ايئون پرائتا ڪي ڪم، <sup>42</sup> ”اي پنام جي تاري مرضي هووي، تو مهني ايئي ڏڪ شون بچام پڻ تو پي مهاري نام پڻ تاري مرضي پوري هووي.“ <sup>43</sup> [پڇي جڏي او پرائتا ڪرتو پڙيوم، تو آڪاش شون هيڪ فريشتو آيو هان او پرڀو يسوع ني همت ڏيوڻ لاگو. <sup>44</sup> پڇي او ڏڪ ۾ آجون پي وڌيڪ پرائتا ڪرڻ لاگو. اوني رو پراشيو لوني آئي ڪار موتي موتي بوندون هوئي ڌرتي تي ٽڪڻ لاگو. <sup>45</sup> جڏي او پرائتا ڪري پاچو آيو، تو چيلون ني ڏينا ڪه او ڏڪون ري ڪري ٿڪي شوتا پڙيا هي. <sup>46</sup> پرڀو يسوع ائونون ني ڪهيو ڪم، ”تي ڪيئون شوتا پڙيا هو؟ اٺو، پرائتا ڪرو ڪه شيطان ٿونرو آزموتو ني لي.“

## پرڀو يسوع ني جهالڻ

(متي 26:47-56؛ مرقس 14:43-50؛ يوحنا 18:3-11)

<sup>47</sup> جڏي پرڀو يسوع ٻولنو پڙيوم، تو اوت تموم گهٽا منڪ آيا هان ٻارهون چيلون ۾ هيڪ چيلو جڪي رو نون يهودا هتوم او ائونون ري آگهي هتو. او پرڀو يسوع ڪڍي آيو هان اوني ني مينڪي ڏيني. <sup>48</sup> پرڀو يسوع اوني ني ڪهيو ڪم، ”يهودا، ڪي ٿو منش پتر ني مينڪي ڏي جهلاوي هي؟“

<sup>49</sup> جڏي چيلون ني خبر پڙي ڪه ڪي هوڻ آڻو هي، تو ائونون پوچو ڪم، ”پرڀو، ڪي مهني آپري تلوارون هلائون؟“ <sup>50</sup> آي ڪني ائونون ۾ هيڪي چيڪائي ڪري ايشور ري پوجاريون ري سردار ري غلوم رو شاجو ڪون تلوار شون باڊي چوڙيو. <sup>51</sup> پرڀو يسوع ڪهيو ڪم، ”ايئون ني ڪرو، گهڻو هويو رو.“ پڇي پرڀو يسوع اوني ري ڪون تي هات لگائي شاجو ڪيو. <sup>52</sup> ايشور ري پوجاريون رو سردار هان ايشور ري گهر رو فوج رو صوبيدار هان يهودي اڳوڻ جڪو پرڀو يسوع ني جهالڻ آيا هتا. پرڀو يسوع ائونون ني ڪهيو ڪم، ”تي تلوارون هان گيڏي ايئون لي آيا هو، جهڙو هون ڪو ڌاڙيل هون؟“ <sup>53</sup> جڏي هون هرور ايشور ري گهر ۾ ٿون پيڙو هتوم، تو ٿون مهني ڪونهي جهاليو. پڻ هتون ٿونرو تيم هي هان انڌاري رو راج هي.“

## پطرس رو پرڀو يسوع رو انڪار

(متي 26:57-69، 75؛ مرقس 14:53-54، 66-72؛ يوحنا 18:12-18، 25-27)

<sup>54</sup> پڇي ايشور ري گهر ري فوج ري صوبيدار، پرڀو يسوع ني جهاليو هان اوت شون ايشور ري پوجاريون ري سردار ري گهري لي گيا. پطرس انگو انگو ائونون لاري گيو. <sup>55</sup> جڏي منڪ اوت اوگتي ري بچ ۾ باشدي ٻائي پيشي رهيا، تو پطرس پي ائونون پيڙو پيشي رهيو. <sup>56</sup> هيڪي بونهي باشدي ري اڃائي ۾ پطرس ني پينوڙو ڏينوم، تو اوني پطرس ني اولڪيو هان ڪهيو ڪم، ”آي پي اوني پيڙو هتو.“ <sup>57</sup> پڻ پطرس انڪار ڪيو ڪم، ”نا ٻائي، هون

تو ايني نيٰ ڪونهي اولڪتو۔“ 58 ٿوڙي دير شون پڇي بيجي منڪ پطرس نيٰ ڏينو هان ڪهيو ڪم، ”تو پيٰ اوئون مٽيلو هي۔“ پٺ پطرس ڪهيو ڪم، ”نا سائين، هون تو ڪونهي اولڪتو۔“ 59 پڇي ڪلاڪ شون پڇي هيڪي بيجي منڪ پطرس نيٰ جوئي پڪ شون ڪهيو ڪم، ”بيشڪ ايٰ منڪ پيٰ اوئي پيٽرو هتو، ڪيونڪه ايٰ پيٰ گليل صوبي رو هي۔“ 60 پٺ پطرس ڪهيو ڪم، ”سائين، خبر ڪونهي ٿي ڪي ڪو هو۔“ پطرس آجون بولنو پٽيوم، تو اوئيچ تيم ڪوڪڙي بونگ ڏيني 61 هان پريو يسوع پاچل قوري پطرس ڏيشا جوپوم، تو پطرس نيٰ او بول ياد آيا ڪم، ”آج ڪوڪڙي ري بونگ ڏيون شون پيل، تو تين گهمرا ڪئي ڪه تو مهني ڪونهي اولڪتو۔“ 62 پطرس اوٺ شون باهر جائي زار زار روئي لاگو۔

### پريو يسوع تي هاشا ڪرڻ هان مارٽ ڪوٽڻ

(متي 67:26-68؛ مرقس 14:65)

63 جڪو فوجي پريو يسوع تي پهرو ڏيئا پٽيا، او اوئي تي هاشا ڪرڻ لاگا هان اوئي نيٰ مارٽ ڪوٽڻ لاگا۔ 64 او اوئي ري اونڪي بوندي اوئي شون پوچڻ لاگا ڪم، ”جي تو نبي هي، تو شٽا ٿئي ڪي ڏڪ هٽيو هي؟“ 65 ايني شون ٿال او پريو يسوع نيٰ تموم گهٽا تونا ڏي اوئي ري بي عزتي ڪرتا رهيا۔

### پريو يسوع يهودي ڌرمي پنچائيت آگهي

(متي 59:26-66؛ مرقس 14:55-64؛ يوحنا 18:19-24)

66 جڏي ڏن اگو، تو ايشور را موتا پوجاري هان ڌرمي گرو يعني يهودي اگوئون ري ڌرمي پنچائيت پيڙي هوئي۔ پڇي او پريو يسوع نيٰ يهوديون ري ڪورت ۾ لي گيا هان اوئي شون پوچو ڪم، 67 ”ڪي تو مسيح هي؟“ پريو يسوع اوئون نيٰ ڪهيو ڪم، ”جي هون توني ڪونه، تو ٿي مهارو پروسو ڪونهي ڪرو 68 هان جي هون تون شون سوال پوچون، تو ٿي مهني بلتي ڏي ڪونهي شگهو۔“ 69 پٺ همي شون هون منش پٽم، قدرت آئي ايشور پيٽرو شاجي پاشي عزت هان اختياري شون پينوڙو هوئين۔“ 70 اي شئي اوئون ڪهيو ڪم، ”تو پڇي ڪي تو ايشور رو ڏيڪرو هي؟“ پريو يسوع بلتي ڏيني ڪم، ”ٿي آپ ڪو هو ڪه هون هون۔“ 71 ايني تي اوئون ڪهيو ڪم، ”همي مهوني گواهون ري ڪو ضرورت ڪونهي، ڪيونڪه مهون آپ ايني ري موڏي شون شنيو رو۔“

### پريو يسوع گورنر پلاطس ري حوالي

(متي 27:1-2، 11:14؛ مرقس 15:1-5؛ يوحنا 18:28-38)

1 پڇي يهودي ڌرمي پنچائيت آلا انيا هان او پريو يسوع نيٰ رومي گورنر پلاطس ڪيڏي لي گيا۔ 2 اوٺ جائي او پريو يسوع تي الزوم هٿي ڪيوڻ لاگا ڪم، ”مهون ڏينو هي ڪه اي مهوري قوم نيٰ برگلاوي هي هان روم ملڪ ري مهاراجا قيصر نيٰ تيڪس ڏيون شون پالي هي هان آبي مسيح ڪئي بادشاه ڪي هي۔“ 3 پلاطس پريو يسوع شون پوچو ڪم، ”ڪي تو يهوديون رو بادشاه هي؟“ پريو يسوع ڪهيو ڪم، ”تو آپ ڪي هي۔“ 4 پلاطس ايشور ري موتي پوجاريون هان شجي منڪون نيٰ ڪهيو ڪم، ”مهني ايني منڪ ۾ ڪو پي ڏوه نظر ڪونهي

# 23

آوتو-“<sup>5</sup> پڻ او آجون پي وديڪ زور شون ڪيوڻ لاڳا ڪم، ”آي شجعي يهوديا صوبي ۾ منڪون ني شيڪائي حڪومت ري خلاف ڪري هي. ايئي آي ڪوم گليل صوبي شون شروع ڪيو هتو هان همي ايت پي پڳو هي.“<sup>6</sup> جدي پلاطس آي بات شئي، تو پوچو ڪم، ”ڪي آي منڪ گليل صوبي رو هي؟“<sup>7</sup> جدي اوئي ني خبر پڙي ڪه پريو يسوع گليل صوبي ري گورنر هيروديس انتپاس ري حد رو هي، تو اوئي پريو يسوع ني اوئي ڏيشا ميليوم او اوئون ڏنون ۾ يروشلم شهر ۾ آيوڙو هتو.

### پريو يسوع گورنر هيروديس اگهي

<sup>8</sup> جدي هيروديس پريو يسوع ني ڏينوم، تو تموم گهڻو خوش هو، ڪيونڪه اوئي پريو يسوع ري باري ۾ گهڻو ڪئين شئيو هتو هان او تموم گهڻي ڏنون شون اوئي شون ملڻ ري شارو ڪرتو. اوئي ري مرضي هتي ڪه او پريو يسوع رو ڪو پرچو جووي.<sup>9</sup> اوئي پريو يسوع شون تموم گهڻا سوال پوچا، پڻ پريو يسوع ڪو پي بلتي ڪونهي ڏيني.<sup>10</sup> ايشور را موتا پوجاري هان ڌرمي گرو جڪو اوت ايا هتا، او زور ڏي اوئي تي الزوم هئا رهيا.  
<sup>11</sup> پڇي هيروديس آپري فوجيون پيو ملي پريو يسوع تي ننولي ڪري اوئي ري بي عزتي ڪرڻ لاڳو هان اوئي ني بادشاهي جبو پيرائي پاچو پلاطس ڏيشا ميليوم.<sup>12</sup> اوئي ڏن شون هيروديس هان پلاطس آيت ۾ دوست هوئي ڪيا. ايئي شون پيل بيئون ري آيت ۾ دشمني هتي.

### پريو يسوع ني موت ري سزا ڏيوڻ

(متي 26:15-27؛ مرقس 15:6-15؛ يوحنا 18:39، 19:16)

<sup>13</sup> پڇي پلاطس ايشور ري موتي پوجاريون، سردارون هان شجعي منڪون ني آت ڏيشا هيلو ڪرايو<sup>14</sup> هان اوئون ني ڪهيو ڪم، ”تي ايئي منڪ تي آي الزوم لگائي مهني ڪيڏي لي آيا هو ڪه آي ٿونري قوم ري منڪون ني برگلاوي هي. ايئي ري ڪري جوئوم، مهني ٿونري روبرو ايئي شون پوچا گاجا ڪي هي، پڻ مهني ايئي ۾ ڪو پي ڏوه نظر ڪونهي آوتو.<sup>15</sup> نڪو هيروديس ني ايئي ۾ ڪو ڏوه نظر آيو، ايئي ري ڪري اوئي مهني ڪيڏي پاچو ميليوم هي. ايئي اهڙو ڪو پي ڏوه ڪونهي ڪيو، جڪي شون ايئي ني موت ري سزا ڏيني جاوي.<sup>16</sup> ايئي ري ڪري هون ايئي ني چاڪ هئائي چوڙي ڏيون هون.“<sup>17</sup> [هر فسح ري پرڻ تي پلاطس، منڪون ري شارو هيڪ قيدي ڦٽو ڪرتو.]<sup>18</sup> پڻ او شجائي رڙي ڪري ڪيوڻ لاڳا ڪم، ”ايئي ني ماري چوڙ هان برابا ني مهوري شارو چوڙ.“<sup>19</sup> برابا نون ري منڪ ني شهر ۾ ڏوه ڪرڻ هان خون ري ڏوه ۾ جيل ۾ گهاتيو هتو.  
<sup>20</sup> پلاطس ري مرضي هتي ڪه پريو يسوع ني ڦٽو ڪري، ايئي ري ڪري اوئي هيڪ گهمرو پڙي منڪون ني سمجهايو.<sup>21</sup> پڻ او زور شون ڪيوڻ لاڳا ڪم، ”ايئي ني شولي تي چاڙهوم، ايئي ني شولي تي چاڙهي ماري چوڙو.“<sup>22</sup> پلاطس تيجو گهمرو اوئون شون پوچو ڪم، ”ڪيون؟ ايئي ڪهڙو ڏوه ڪيو هي؟ هون ايئي ۾ ڪو پي ڏوه ڪونهي ڏيڪتو، جڪي شون ايئي ني موت ري سزا ڏيني جاوي، ايئي ري ڪري هون ايئي ني چاڪ هئائي چوڙي ڏيون هون.“<sup>23</sup> پڻ او وديڪ زور شون ڪيوڻ لاڳا ڪم، ”ايئي ني شولي تي چاڙهي ماري چوڙو.“ ايئي نموني او گوڙ ڪري

آپري بات منائي گيا. 24 ايئي تي پلاطس اوتون ري مرضي شون فيصلو شتايو. 25 پلاطس منكون ري مرضي تي برابر ني ڦٽو ڪيو جڪو ڏوه هان خون ري ڪري جبل ۾ هتو، پڻ پريو يسوع ني اوتون ري مرضي تي فوجيون ري حوالي ڪيو.

### پريو يسوع ني شولي تي ڪوڪا هٿن

(متي 27:32-44؛ مرقس 15:21-32؛ يوحنا 19:17-27)

26 جڏي فوجي پريو يسوع ني لي جاوتا پٿيا، تو اوتون ني هيڪ منڪ پيٿو هويو، جڪو ڪرين شهر رو هتو، اوتو نون شمعون هتو. او باهراڙي شون يروشلم شهر ڏيشا اوتو پٿيو. فوجيون اوتو ني ونگار ۾ جهالي شولي ڪٿائي هان پريو يسوع لاري بيون رو ڪهيو. 27 پريو يسوع لاري تموم گهٽا منڪ اوتا پٿيا. اوتون ۾ ڪينڪه لگائي پي هتي، جڪو زار زار روتي هان پار ڪادي اوتي پٿي. 28 پريو يسوع پاچل قوري اوتون ڏيشا جوئي ڪهيو ڪم، ”اي يروشلم ري ڏيڪريون، مهاري شارو ني روٽو، پڻ آپري هان آپري اولاد ري شارو روٽو.“ 29 ڪيونڪه جوٽو، او تيم اوڻ آتو هي، جڏي منڪ ڪٿي ڪم، ”ڏن هي او لگائي جڪو بونجڪي هي جڪون ڪڏي پي ٻال ڪونهي جٿيا هان نڪو اوتون ڏوڏ پياڙيو.“ 30 اوتو تيم منڪ جبلون ني ڪشي ڪم، ”مهون مائي ڪرو.“ هان ڏونگرون ني ڪشي ڪم، ”مهوني لڪائي چوڙو.“ 31 ڪيونڪه جڏي او شاوي بڻ شون ايئون ڪري هي، تو پڇي شوڪي بڻ شون ڪي ڪي ڪونهي ڪري؟“

32 فوجي بي پيڇي ڏوهي منڪون ني پريو يسوع پيٿا مارڻ ري شارو لي جاوتا پٿيا. 33 جڏي او اوتو جگها تي ڳا جڪي رو نون ”ڪوپٿي“ هتو، تو اوت اوتون پريو يسوع هان اوتون بيئون ڏوهاريون ني آپري آپري شولي تي چاڙهي ڪوڪا هٿيا. هيڪ پريو يسوع ري شاجي هان پيڇو ڪاڻي پاشي هتو. 34 پڇي پريو يسوع ڪهيو ڪم، ”اي پٽام ايئون ني معاف ڪم، ڪيونڪه اي شمجها ڪونهي ڪم مهني ڪي ڪرون پٿيا.“

پڇي فوجي پريو يسوع را گاپا آيت ۾ بلاوڻ ري شارو ڳا گهاتڻ لاگا. 35 اوت تموم گهٽا منڪ اتي جوتا پٿيا هان يهودي سردار پي نٽولي ڪري ڪيتا ڪم، ”آي تو پيڇون ني بچاوتو، همي جي اي ايشور رو چونديوڙو مسيح هي، تو آبرو آڻي بچاوي.“

36 فوجي پي پريو يسوع تي نٽولي ڪرڻ لاگا هان اوتون پريو يسوع ني انگورون رو ڪنورس ڏي ڪهيو ڪم، 37 ”جي تو يهوديون رو بادشاهه هي، تو آڻي بچا.“

38 اوتون پريو يسوع ري شولي مائي هيڪ تڪي لگائي جڪي تي لڪيوڙو هتو ڪم، ”آي يهوديون رو بادشاهه هي.“ 39 پڇي جڪو ڏوهاري پريو يسوع پيٿا شولي تي چاڙهيوڙا هتا اوتون ۾ هيڪي مهيوڙو ڏي پريو يسوع ني ڪهيو ڪم، ”ڪي تو مسيح ڪونهي؟ تو پڇي تو بچ هان مهوني پي بچا.“ 40 ايئي تي پيڇي ڏوهاري ڌڙڪو ڏي ڪهيو ڪم، ”ڪي ٿي آجون پي ايشور رو بي ڪونهي؟ ٿي پي ساڳي سزا ملي هي.“ 41 آيون ني تو ضرور سزا ملڻ ڪبي، ڪيونڪه آيون تو ڏوه ڪيتا هي هان اوتون رو بدلو ملي پٿيو، پڻ ايئي تو ڪو پي ڏوه ڪونهي ڪيو.“ 42 پڇي اوتو پريو

يسوع نِي كهيو كه، ”اي يسوع، جدي تي بادشاه هوئي اَوم، تو مهني ضرور ياد راكيا.“<sup>43</sup> پريو يسوع اُوئي ني كهيو كه، ”هُون تني شاجي كونه هون كه تُو آج ئي مهني پيڙو شُرك مِ هوئي.“

### پريو يسوع ري موت

(متي 27:45-56؛ مرقس 15:33-41؛ يوحنا 19:28-30)

<sup>44</sup> ڏن رو اندازن ٻارهون شون لي تيني بجي توڻي شجي مُلك مِ اندارو هوئي گيو. <sup>45</sup> ڪيونڪه سُورج رو اُجالو ختم هوئي گيو هتو. پچي ايشور ري گهر رو پويتر جگها آلو پڙدوم بچ شون قاتي بي حصا هوئي گيو. <sup>46</sup> پچي پريو يسوع زور شون رڙ ڪري كهيو كه، ”اي پنام هُون آپري آتما تاري هات مِ ڏينون هون.“ اِترو ڪئي دم ڏينو.

<sup>47</sup> جدي صوبيدار شجو ڪئين ڏينوم، تو ايشور ري ٻڌائي ڪري ڪيوڻ لاگو كه، ”بيشڪ اي هيڪ نيڪ منڪ هتو.“

<sup>48</sup> جڪو منڪ اوٽ آيوڙا هتام، اي شجو جوئي چاتي پيتا آپري گهرون ڏيشا پاچا گيا. <sup>49</sup> پڻ او شجائي منڪ جڪو پريو يسوع ني اولڪتام، او الگي پون شون اي شجو ڪئين آپري اونڪيون شون ڏيڪتا پڙيا. اُونون شون نال او لڳائي پي هتي جڪو گليل صوبي شون پريو يسوع پيڙي آيوڙي هتي.

### پريو يسوع ني مُڪوم مِ راکيو

(متي 27:57-61؛ مرقس 15:42-47؛ يوحنا 19:38-42)

<sup>50</sup> اوٽ هيڪ نيڪ هان پلو منڪ هتو. اُوئي رو نون يوسف هتو هان او ڌرمي پنچائيت رو ميمبر هتو. <sup>51</sup> او پنچائيت ري انصاف هان ڪوم شون خوش ڪونهي هتو. او يهوديا صوبي ري شهر ارميتيا رو ريوڻ آلو هتو هان او ايشور ري بادشاهي ري انتظار مِ هتو. <sup>52</sup> اُوئي پلاطس ڪيدي جاني پريو يسوع رو لاش مونگيو. <sup>53</sup> پچي اُوئي جاني پريو يسوع رو لاش شولي شون اُتاريو هان اُوئي ني قيمتي شوتي گايي مِ بيڙهي هيڪي مُڪوم مِ راکيو، جڪو هيڪي جبل ري چُر مِ ناهيوڙو هتو. اُوئي مُڪوم مِ پيل ڪيني پي ڪونهي راکيو هتو.

<sup>54</sup> او پويتر ڏن رو تياري رو ڏن هتو هان پويتر ڏن شروع هوڻ آلو هتو. <sup>55</sup> پچي او لڳائي جڪو پريو يسوع پيڙي گليل صوبي شون آئي هتي، او پي يوسف لاري گئي. اُونون جاني مُڪوم ني ڏينو كه پريو يسوع رو لاش ڪيڪر راکيو هي. <sup>56</sup> پچي پاچي گهري جاني پريو يسوع ري لاش ري ساڙو سُري شيون هان عطر ناهيو. پچي اُونون ايشور ري حُڪم تي پويتر ڏن رو آروم ڪيو.

### پريو يسوع رو جِي اُنڻ

(متي 28:1-10؛ مرقس 16:1-8؛ يوحنا 20:1-10)

<sup>1</sup> پچي آچر ري ڏن ساڪلي تارهي، او لڳائي آپري ناهيوڙي سُري شيون لي پريو يسوع ري مُڪوم تي گئي. <sup>2</sup> اُونون جاني ڏينو كه مُڪوم ري موڏي تي راکيوڙو پتر هتو پڙيو هي. <sup>3</sup> جدي او مُڪوم مِ گئي، تو ڏينو كه پريو يسوع رو لاش اوٽ هائي ڪونهي.

4 آجون او گهبرائي آبي هتي، تو اوچتو چمڪيلا گاڙا بيريوڙا بي آڏمي آئي ائون آگهي آيا. 5 لڳائي بيٺاجي هان آيا ڪونڌا هينا ڪيئا، پڻ ائون آڏميون ڪهيو ڪم، ”تي جيتي ني مونڙون ۾ ڪيئون جوئو هو؟“ 6 او ايت ڪونهي پڻ جي اٺيو هي. ياد ڪرو ڪه اوني توني گليل صوبي ۾ شٽايو هتو ڪم، 7 ’ضرور هي ڪه هون منس پتر، پايون ري حوالي ڪيو جائين هان شولي تي چاهيو جائين هان تيجي ڏن پڙي جيتو هوئي جائين.“ 8 جڏي ائون لڳايون آي شٽيو، تو ائون ني پريو يسوع را بول ياد آيا.

9 پڇي او لڳائي مڪوم شون پاڇي گئي هان اڳياري چيلون ني هان باقي شجون ني او باتون شٽائي. 10 جڪون لڳايون سنتون ني خبر شٽائي، ائون ۾ مريم مگدليني، يوثانا، يعقوب ري ما مريم هان ائون پيڙي ڪنين بيٺي لڳائي پي هتي. 11 پڻ چيلون شوچو ڪم، ”اينون ڪيڪر هوئي شگهي هي.“ ائون اينون باتون رو پروسو ڪونهي ڪيو. 12 پڻ پطرس اٺيو هان ناشتو مڪوم ڏيئا گيو. اوت پڳي اوني ڏينو ڪه رگو پريو يسوع رو ڪوڦڻ پڙيو هي. آي جوئي او تموم گهڻو حيرون هيو هان پاچو آڀري گهري گيو.

### پريو يسوع رو بيئون چيلون ني درشن

(مرقس 12:16-13)

13 اونيچ ڏن پريو يسوع را بي چيلا امانوس گون ڏيئا جاوتا پڙيا. او گون يروشلم شهر شون اندازن اڳياري ڪلو ميتر اٽگو هتو. 14 او ائون شجي باتون ري باري ۾ جڪو ائون ڏنون ۾ هوئي هتي، آبت ۾ باتون ڪرتا جاوتا پڙيا. 15 جڏي او هيڪي بيٺي شون باتون ڪرتا پڙيا، تو اينون هيو ڪه پريو يسوع آب ائون ري نيڙو آئي ائون پيڙو بيوڻ لاگو. 16 پڻ ائون ري اونڪيون تي اهڙو پڙو آئي گيو ڪه او پريو يسوع ني اولڪي ڪونهي شگهيا. 17 پريو يسوع ائون شون پوچو ڪم، ”تي ڪهڙي باتون ڪرتا جائو پڙيا؟“ آي شئي او ابي رهيا. ائون را مونڌا اٺريوڙا هتا. 18 پڇي ائون ۾ هيڪي، جڪي رو نون ڪليباس هتو ڪهيو ڪم، ”تو، يروشلم شهر شون آڙي پڙيو، تو پي تني خبر ڪونهي ڪه اوت اينون ڏنون ۾ ڪي هيو هي؟“ 19 پريو يسوع ائون شون پوچو ڪم، ”ڪي هيو هي؟“ ائون بلتي ڏيني ڪم، ”يسوع ناصري جڪو نبي هتو، او آڀري ڪوم آڀري باتون ۾ ايشور هان شجي منڪون ري نظر ۾ قدرت آتو هتو. 20 ايشور ري موتي پوجاريون هان مهوري سردارون اوني ني موت ري سزا ڏيوڻ ري شارو جهلايو هان اوني ني شولي تي چاهي مرائي چوڙيو. 21 پڻ مهوني اُميد هتي ڪه مهوري اسرائيلي قوم ني او مگتي ڏيشي. ايني شجي باتون ني آج تيجو ڏن هي. 22 مهوري تولي ري ڪنين لڳايون مهوني حيرون ڪري چوڙيا. او آج ساڪلي تارهي مڪوم تي گئي هتي، 23 پڻ جڏي او اوت پڳي، تو ڏينو ڪه پريو يسوع رو لاش اوت هائي ڪونهي. پڇي او پاڇي آئي هان شٽايو ڪه فريشتون مهوني درشن ڏي ڪهيو ڪم، ’پريو يسوع جيتو هي.‘ 24 اوني شون پڇي مهورا ڪنڪه دوست پي مڪوم تي گيا هتا، اينوج ڏينو جون لڳايون ڪهيو هتو ڪه پريو يسوع رو لاش اوت هائي ڪونهي.“ 25 پڇي پريو يسوع ائون ني ڪهيو ڪم، ”اي مورڪون، تون ائون شجي باتون رو پروسو ڪيئون ڪونهي ڪيو، جڪو نبيون ڪيئي هتي. 26 آي ضروري هتو ڪه مسيح ايني نموني ڏڪ ڏيڪڻ شون پڇي آڪاش ۾ جائي آڀرو مون مرتبو لي.“ 27 پڇي پريو يسوع موسي شون لي شجي نبيون توڻي شاستر ري شجي باتون ائون

ني سمجھائي جڪو اُٺي ري باري ۾ لڪيوڙي هتي. <sup>28</sup> بيتا بيتا او اُٺي گون ري نيڙا پڳا جيت اُٺون ني جاوڻو هتو. پريو يسوع ايتون بيوڻ لاگو جهڙو  
 ڪه اُٺي ني ايتون پي آگهي جاوڻو هووي. <sup>29</sup> پڻ اُٺون اُٺي ني مجبور ڪري ڪهيو ڪم ”ڏن آتو رو هان اندارو پي هوڻ آڻو هي، ايتي ري  
 ڪري ٿي مهون ڪيڍي رو.“ پڇي پريو يسوع اُٺون پيڙو گيو. <sup>30</sup> جڏي او اُٺون پيڙو ٻاتي ڪاوڻ بينوم، تو پريو يسوع ٻاتي لي ايشور رو سُڪر ڪيو  
 هان ٻاتي پونگي اُٺون ني ڏيوڻ لاگو. <sup>31</sup> پڇي اوچتو اُٺون ري اونگي ڪلني هان اُٺون پريو يسوع ني اولڪيوم پڻ يڪدم او اُٺون ري اونڪيون شون  
 آلوپ هوئي گيو. <sup>32</sup> پڇي او هيڪي پيڇي ني ڪيوڻ لاگا ڪم ”جڏي او مارگ ۾ آيون شون باتون ڪرتو پيڙو هان آيون ني شاستر ري سڃي باتون  
 ري باري ۾ سمجهاوتو پيڙو، تو اُٺي تيم اپڻا من ڪترا ني خوشي شون پريجا هتا.“

<sup>33</sup> پڇي اُٺي تيم او اُٺي يروشلم شهر ڏيما پاچا گيا. جڏي او اوت پڳا، تو اڳياري چيلون ني بيجون چيلون پيڙا ڏينا. <sup>34</sup> او آيت ۾ ڪيتا پڙيا ڪم،  
 ”پريو شاچيلي جي اُٺو هي. اُٺي سمعون ني درشن ڏينو هي.“ <sup>35</sup> آي بات سُٺي اُٺون پيڻون چيلون پي اُٺون ني سُٺايو ڪه امائوس گون ڏيما جاوتي  
 بلا ڪي ڪي هويو هتو هان ڪيڪر ٻاتي پونگي بلا اُٺون پريو يسوع ني اولڪيو هتو.

### پريو يسوع رو آپري چيلون ني درشن

(متي 20:16-28؛ مرقس 14:16-18؛ يوحنا 19:20-23؛ ڪوم 1:6-8)

<sup>36</sup> جڏي او آي باتون ڪرتا پڙيا، تو پريو يسوع آپ آي اُٺون ري بچ ۾ اُٺو هان اُٺون ني ڪهيو ڪم، ”ايشور توڻي سُڪيا راڪي.“ <sup>37</sup> آي سُٺي او تموم  
 گهڻا پيڻا هان سمجها ڪه آي ڪو پوت هي. <sup>38</sup> پريو يسوع اُٺون ني ڪهيو ڪم، ”تي ڪيون پيڻا جو؟ آيري من ۾ شڪ ڪيون ڪرو هو؟  
<sup>39</sup> مهارا هات هان پگ جوڻو هون شاگي هون. پوت ري موش هان هاڏڪي ڪونهي هوتي، پڻ ٿي مهني هات لگائي جوڻي شگهو هو.“ <sup>40</sup> پڇي آي  
 ڪي پريو يسوع اُٺون ني آيرا هات هان پگ بتايا. <sup>41</sup> پڇي او تموم گهڻا خوش هان حيرون هويا. تو پي اُٺون ني پروسو ڪونهي هويو. ايتي ري  
 ڪري پريو يسوع اُٺون ني ڪهيو ڪم، ”ڪي تون ڪيڍي ڪاوڻ ري شارو ڪئين هي؟“ <sup>42</sup> تو اُٺون پريو يسوع ني پونجوڙي مڇي رو هيڪ پيرو  
 ڏينو. <sup>43</sup> پريو يسوع اُٺون ري روبرو مڇي رو پيرو ڪادو.

<sup>44</sup> پڇي پريو يسوع اُٺون ني ڪهيو ڪم، ”آي مهاري باري ۾ او باتون هي جڪو مهني توڻي اُٺي تيم سُٺائي هتي، جڏي هون تون پيڙو هتو ڪه او  
 سڃي باتون پوري هووي جڪو موسي ري توريت شاستر، نيون ري شاستر هان زبور شاستر ۾ لڪيوڙي هي.“

<sup>45</sup> پڇي پريو يسوع اُٺون ني شاستر ري ايتون باتون رو مطلب سمجهايو. <sup>46</sup> پريو يسوع اُٺون ني ڪهيو ڪم، ”شاستر ۾ مهاري باري ۾ آي لڪيوڙو

هي ڪم

’مسيح ڏک ڏيڪشي، مري جاشي

هان تيڃي ڏن موٽوڙون شون جي اُنشي

47 هانَ اُوئيَ زي نون شون توبهون هانَ پايون ري معافي رو پرچارم

يروشللم شهر شون شروع كري سَجِي قومون ۾ كيئو جاشي-‘

48 تي ايئي سَجِي باتون را گواه هو- 49 شُوم همي هُون تون كيدي پويتر آتما ميلين جكي رو واعدو مهاري پتا كيئو هي- پڻ جتري توڻي ايشور زي

طرفون توڻي پويتر آتما ري طاقت ني ملي اُتري توڻي تي ايئي شهر ۾ بيٺا رهيا-“

### پريو يسوع رو آكاش تي جاوڻ

(مرقس 16:19-20؛ ڪوم 1:9-11)

50 پچي پريو يسوع آپري چيلون ني شهر شون باهر بيت عينا گون ري نيڙو لي گيو- اوت اُوئي آپرا هات ڪئي اُوئون ني برڪت ڏيئي- 51 جڏي او

اُوئون ني برڪت ڏيتو پڙيو، تو اِيئون هويو ڪ او اُوئون شون ڌار هوئي آكاش تي ڪڍجي گيو- 52 چيلون اُوئي آگهي آپرا شيش نمايا هانَ پچي او

خوش هوئي يروشلم شهر ڏيئا پاڇا گيا- 53 او هرروز ايشور زي گهر ۾ جائي ايشور ري ٻڌائي ڪرتا رهيا-